

AZ.


BIBLIOTECA NAZ.
Vittorio Emanuele III


XXV I


A

18

NAPOLI









SPRITUS
PRINCIPALIS,
SIVE

DOTES BONI
PRINCIPIS,

Aphorismis, Historiis, &
Dissertationibus Politicis

Declarata

AUTHORE

JOANNE ADAMO
WEBER,

Canonico Regulari S. Augustini,
Collegij Cellæ novæ in Tyroli Professo,
SS. Theologiæ Sacrorumque Canonum Do-
ctore, Majest. Cæsar. Consiliario, Præpo-
situs Högwërthenensis p. t.
Administratore.

Editio Secunda Emendatior.

Cum Facultate Superiorum.

SALISBURGI,

Typis & impens. JOANN. BAPT. MAYR,
Typographi Aulico-Academici.

1674.



**ILLUSTRISSIMO AC
REVERENDISSIMO
PRINCIPI AC DOMINO
DOMINO
FRANCISCO
CASPARO,**

EX

**ANTIQUISSIMA STADIANO-
RUM FAMILIA**

EPISCOPO LAVANTINO,

**Ecclesiarum Metropoli-
ticae SALISBURGENSIS, Impe-
rialis BAMBERGENSIS, & Ca-
thedralis HERBIPOL-**

LENSIS

CANONICO, &c. &c.

*Domino Domino meo
Gratissimò.*



ILLUSTRIS-SIME
AC REVERENDIS-
SIME

PRINCEPS,

*Domine Domine Gra-
tiosissime.*



ublica plauden-
tium gaudia, & cer-
tantes acclamantium
voces, hactenus mo-
ram injecerunt quò minus TIBI
REVERENDIS-SIME PRINCEPS, de
Lavantinâ Myrrâ humillimè gra-
tulari auderem. Decebat ma-
jorum votis cedere, & mea his
demum finitis accedere. Nunc
ali-

DEDICATIO.

aliquando hæc pagellas , grati
& gratulantis animi interpretes
ad pedes Tuos submississimè
demitto, quòd si ibidem pro-
cumbere patieris, vota mea ad
suum evecta crediturus sum.
Caput enim excelsius est quàm
ut hoc attingere liceat, & sem-
per vertices Principum trepida-
tione, genua coluntur osculatio-
ne. Fateor, deterruit Fastigij sul-
sublimitas, simul & modestum
ruborem incussit istius operis
humilitas; Verùm vacillantem
erexit innatæ benevolentiaæ Tuæ
fiducia, erectum confirmavit
splendidissimum nominis Tui
Lumen, quod undique omnia
fulgentissimè irradiabit. Unum
saltem est, quod chartaceum
hoc munusculum commendet,
nimi-

DEDICATIO.

nimirum dicendi argumentum,
quod TU IPSE REVERENDIS-
SIME PRINCEPS perfectissimè
nobis exhibes, dum *Dotes Boni*
Principis singulas in TE venera-
mur. Singularis in Deum Pietas
& zelus totum TE cœlestibus oc-
cupat, ut tamen à sollerti rerum
humanarum curâ nihil omittas,
Amabilitatem & Gravitatem a-
mico fœdere ita misces, ut
utramque æquo & æquali feras
pondere. Prudentia, quâ omnia
sagaciter prævides, summa in TE
est, quæ tamen aliorum consilia
audire & quærere non dedigna-
tur. Liberalis & munifica est
manus TUA, sed cum oculo, ut
quantum oculus viderit meriti,
tantum manus distribuat præ-
mij. Frugalis es, non tamen, ubi
magni-

DEDICATIO.

magnificentiâ opus est, condi-
tionis Tuæ immemor. Cle-
mentiam temperas Justitiâ, Ju-
sticiam mitigas Clementiâ, abs-
que quòd alterutram lædas. Ubi-
que par æquitas, & æqua paritas.
Verbo in TE

- - omnia in uno
*Quæ decorant alios singula, juncta
nitent.*

Nudè & sine fuce hæc loquer, ita
enim veritas vestiri solet. Nec
porro in vestibulo Encomia Tua
prætexere statui, cùm quot to-
tus continet libellus periodos,
tot in TE adornem Panegyres.
Accipe ergo *Archetype* Tuum
etlypon benigno quo solus cul-
tu, & *Spiritu* huic *Principali*
viam favoris publici *Spiritu &*
favore Principali apeti, mihi ve-
rò

DEDICATIO.

ro TUARUM Gratiarum janu-
am, quæ semper mihi gratiosissi-
mè patuit, ulterius apertam-
sine.

Illustrissima & Reve-
rendissima

Dominationis Tuæ

Servus humillimus

JOAN. BAPT. MAYR.

APPROBATIO

Imprimator

BALTHASAR

à Nolaren, p. t. Vien-
nensis Universitatis

Rector.

EGo infraſcriptus perlegi hoc o-
pusculum Admodum Reveren-
di & Clariffimi D. JOANNIS
ADAMI WEBERI, SS. Theo-
log. & Sacr. Canonum Doctoris,
nec non Cæſareæ Majeſtatis Con-
ſiliarij, nihilque in eo reperi, quod
ſanam Catholicam doctrinam non
ſpiret. Dignum proinde cenſeo,
quod pro utilitate publica in publi-
cum prodeat. *Datum Vienna Au-
ſtria 27. Octobr. 1670.*

JOANNES BAPTISTA MAIR,
SS. Theol. Doct. Aug. Impe-
ratricis viduæ Eieemoſynarius,
Reverendiſſ. & Illuſtriſſ. Prin-
cipis Episcopii Viennensis Con-
ſiliarius Conſiſtorialis, p. t. in-
clytæ Facultatis Theolog. De-
canus.

APPROBATIO
Reverendissimi Me-
tropolitici Consistorij
Salisburgensis.

Libellum istum: cui Titulus
Spiritus Principalis, sive doctes boni
Principis, Aphorismis, Historiis & dis-
sertationibus Politicis declarata; primi-
tus cum Licentiâ superiorum Vien-
næ Austriæ Impressum; ex Mandato
Reverendissimi Consistorij accuratè
perlegi, quem proinde cùm nihil a-
lienum ab Orthodoxâ fide aut bonis
moribus doceat, dignum censeo, ut
publico bono & privato, publicam
videat lucem & secundam.

Salisburgi 11. Maij. 1674.

JOANNES JULIUS De MOLL;
Provincialis Austriacus, Cel-
sissimi & Reverendissimi Prin-
cipis & Archiepiscopi Salis-
burg. S. Sedis Apostolicæ Le-
gati, &c. Consiliarius Confi-
storialis, & Colleg. B. M. V.
ad Nives Canonicus.



SPIRITUS PRINCIPALIS.

Sive

**DOTES BONI
PRINCIPIS**

**Aphorismis, Historiis,
& Dissertationibus Po-
liticis declaratæ.**

THE UNIVERSITY OF CHICAGO

1950-51
MIDWINTER

THE UNIVERSITY OF CHICAGO
2500 SOUTH DIXIE
CHICAGO, ILL.



PRÆFATIUNCULA.

REX David Boni Principis Illustrissimum Prototypon optavit Sibi *Spiritum Principalem*, cum dixit: *Spiritu Principali Confirma me*. Eundem Spiritum, cum dotibus ad eum requisitis, Ego quoque Serenissimis Cellissimisque nostri ævi Principibus tanto animi affectu precor, quanta studij laborisque contentione præsens opusculum in eum finem elucubravi; Spero autem Hanc meam lucubrationem non fore infructuosam, si *Lectorem* pariter & *Factorem* nactus fuerit.

CAPUT I.

*Quod oporteat Principem au-
spicari Regimen suorum à Re-
gimine Sui.*

Natura hominis, si bona est, Ho-
minem regere : si mala, ab Ho-
mine regi debet, præsertim ab eo, qui
alijs regendis præpositus est. Non
sunt boni Reges illi, qui sunt Reges
suorum non *Sui*. Primus Principis
subditus debet esse Princeps ipse. Di-
scat proinde Regimen *Sui*, antequam
exerceat Regimen *suorum*. Nam
Regimen *Sui* est fundamentum Re-
giminis *suorum*. Regimen *Sui* est
Horologium publicum, cui Regimen
suorum conformari debet. Regi-
men *Sui* Officio LUCIS & DUCIS
fungitur : LUCIS ad illuminan-
dum, DUCIS ad dirigendum.

Porro tria sunt Regiminis *Sui* im-
pedimenta principalia, quæ Viri
Principes tantâ animi contentione a-
moliri

moliri debent, quanto affectu Reipublicæ suæ salutem desiderant.

Primum impedimentum est *Ignorantia Sui*. Fieri enim non potest, ut bene regat seipsum, qui non bene cognoscit seipsum : quando prima & primaria totius gubernatricis Prudentiæ Regula continetur illo Sapientis Antiquitatis oraculo : *Nosce teipsum*.

Sed hæc notitia non minùs est rara quàm cara. Ut proinde Henricus IV. Imperator non immeritò usurpaverit pro symbolo hanc gnomon : *Multi multa sciunt, se autem nemo*.

Turpis enim verò Scientia (verùs ignorantia) nosse alios & alia, non nosse semetipsum. Tales sunt Argi alijs, Talpæ sibi : sapientes alijs, desipientes sibi. *Odi Sapientem, qui sibi non sapit*.

Nosce igitur teipsum, priusquam alios & alia noscas. Disces autem notitiam Tui, si aspexeris dissimiles tibi. Audi S. Gregorium : *Qui vult*

ligere qualis est, tales aspiciat qualis non est.

Secundum impedimentum est inordinatus animi affectus, siue indomita passio. Ineptissimus profecto Consiliarius est Affectus; quia ipsi frequenter res major apparet, quàm Veritati. Econtrario ibi sunt sana consilia, vigetque prudens gubernatio sui ipsius, ubi est parum passionis, & multum patientiae.

Tertium impedimentum est nimia in agendo præcipitancia, quam prudenter Itali sequentibus dissuadent adagijs: *Il Secondo pensiero sona migliore. Cosa presto fatta è presto disfatta. Misura tre volte, taglia una. Presto e' ben non se' convien. Chi va piano va sano.*

Sapientissimè censuit Carolus V. Imperator, quòd quemadmodum Saturnus inter septem Planetas supremum obtinet locum, & tamen tardissimus est omnium, lentissimèque circumvolvitur; ita Principes, qui

Agnovit veritatem hujus Dictaminis Serenissimus Maximilianus Elector Bavariae in ijs monitis, quæ ipse ad probam Filij sui Ferdinandi, cum adhuc trimulus esset, institutionem, scripto mandari, eidemq; adolescentiam ingresso proponi & explicari iussit. *Hoc certò statnendum est* (inquit sapientissimus Elector) *in Principis erga Deum pietate felicitatem ipsius, Subditorum mores, & utrorumq; fata librari.*

Cæterum duo sunt veræ pietatis adjumenta efficacissima : quorum alterum in refrænando rerum terrenarum amore , alterum in studio Christianis virtutibus impendendo consistit. Ac de postremo quidem sic statuunt Sapientes , eum Principem, qui Christianis virtutibus destitutus est, non tam Principem, quàm Monstrum Principis esse.

Tunc sanè Rex titulo Regis est usquequaq; dignissimus, quando in ejus solio sedet *Constantia* , in Purpura flagrat *Bonitas* , in Corona radiat *Sapientia* ,

in corde vivit *Clementia*, in ense armatur *Fortitudo*, in manu *Liberalitas* explicatur, in oculis *Humanitas* efflorescit, in victorijs *Divina gloria* triumphat.

Ad alterum quod attinet, persuadeant sibi Principes, bona mundi hujus minimè bona, adeòq; nomine suo tam indiga quàm indigna esse; cùm in prima fronte splendoris quidem aliquid, in intimo autem recessu nihil soliditatis veritatisque contineant; sed sint instar iridis, quæ quos colores ostendit, non habet. Quidquid enim Mundus amat ut pulchrum, suspicit ut Magnum, veneratur ut dignum, deprædicat ut excellens, appetit ut delectabile, usurpat ut commodum, possidet ut pretiosum, id omne vanum & umbraticum est.

Quemadmodum roris antelucani guttula cœlo delapsa in mare fit unda, unda assurgit in fluctum, fluctus concitatur in spumam, spuma salit in bullam, bulla extenuatur in vaporem,

vapor concrefcit in nubem, nubes defluit in imbrem, imber denfatur in lutum, lutum fatifcit in pulverem, pulvis diffipatur in ventum, ventus denique evanefcit & interit; ita Res terrenæ & bona mundi hujus, poft varias mutationum, aliarum ex alijs nafcentium, viciffitudines, tandem ficut fumus deficiunt & evanefcunt.



CAPIT III.

*Quod Principes ſpem ſuam
atque fiduciam in ſolo DEO
collocare debeant.*

Reges & Principes in Deo potiùs, quàm in rebus creatis ſpem & fiduciam ſuam collocent: malintque divinis, quàm humanis & mundanis præſidijs ſuum fulcire Principatum.

Non eſt ſolidum Regale ſolum, niſi firmetur ab eo, qui firmavit Firmamentum.

Cardinalis Guisius, cum olim Henrici II. Regis Galliarum in administratione Regni primarius esset Minister, eamque ob causam multorum procerum incurrisset invidiam; ut ostenderet, se nullius, præterquam Regis, favore & gratia niti, pyramidem erexit, cui tenaciter adhærescebat hedera, à basi usque ad Cuspidem circumflua reptatione confurgens, inscripto basi hoc declaratorio lemmate: *Te stante virebo.*

Hanc ego Pyramidem esse dixerim divinam Gratiam: cui si Princeps veluti hedera artissimo pietatis fiduciaque complexu adhæserit, semper in eo vera virebit, vigebitque felicitas; infestis inimicorum machinationibus elusis & elisis.

*Princeps nihil paveat, si Deus illi fa-
veat.*

Dov' è l'ajuto divino, la tela di ragno diventa muro: dov' è lontano, il muro diventa tela di ragno.

CAPUT IV.

*De Cultu Veræ Religionis à
Christianis Principibus pro-
movendo.*

Christianos Principes oportet pri-
mis curis studiisque cultum Re-
ligionis orthodoxæ amplecti.

Factura Religionis, factura Regionis:
Porro tria in Religione orthodoxa
spectanda sunt: *Veritas, Puritas, Uni-
tas.* Veritas est *Fundamentum*, Puri-
tas *Ornamentum*, Unitas *Firmamen-
tum*. Nam Religionis *Unitas* cense-
tur Regnorum *Unio*. Unde in Por-
tis Parisiensibus hæc legitur inscrip-
tio: *Une foy, Une Loy, Un Roy:* Hoc
est, *Una Fides, Una Lex, Unus Rex.*

Errant igitur, & luculenter errant,
quotquot pluralitatem Religionum
vel amplectuntur oblatam, vel offe-
runt amplectendam.

*Qui nullam Religionem excludit, nul-
lam includit.*

Talis

Talis fuit Cham Tartarorum Princeps, qui Stephano Rege Poloniae defuncto, Coronam Polonicam ambiens desiderium suum in Regni Conitijs per Legatum, tribus adductis Motivis aperuit. Primum potentiam, alterum frugalitatem, tertium Religionem concernebat. Potentiam probabat ex eo, quod aliquot Equitum Myriadas Poloniae vel augendae, vel tuendae causâ e terris suis educere posset. Frugalitatem declarabat ex ciborum parsimonia, quod in fame solâ carne equinâ contentus esset. Ad Religionem quod attinet, de qua disputari audierat : *Tuus*, inquit, *Pontifex meus Pontifex esto : Tuus Lutherus meus Lutherus esto.*



CAPIT V.

*Divinae gloriae amplificandae
studium Christiano Principi
commendatissimum esse
debere.*

L Ex Christiana praecipit, ut glori-
am propriam gloriae Christi Re-
demptoris nostri postponant Principes
Christiani, totumque illud mun-
dani Honoris ac splendoris chora-
gium, quod venerationi ipsorum
impendunt populi, in immensum
gloriae divinae polagus refundant.

Hanc piam animi Christiani di-
spositionem cognovit olim Venetia
in suo Duce Celso, qui teste Petro
Justiniano in *Hist. Veneta*, cum in-
augurationem Principatus Veneti
suscepisset, Numisma cudit pileo Du-
cali insignitum, cui insutus erat Cru-
cifixus, hac addita inscriptione : *Non
mihi, sed Christo.*

Contrarijs studijs aguntur nonnul-
li Reges & Principes Pseudopolitici,
qui

qui in omnibus suis designationibus
non Christo sed sibi gloriā aucupantur.

Non Christo, sed sibi gloriam quæ-
sivit Carolus Audax Dux Burgun-
diæ, qui stimulis inanis gloriæ, ad i-
mitandum Alexandrum M. cæte-
rōsque antiquos Heroes, adactus, vi-
cinos omnes temerè & sine causâ bel-
lo laceſſivit: ita ut Philippus Co-
minæus inter causas, quæ Ducem i-
ſtum in ruinam atque exitium præ-
cipitem egerunt, præcipuam ſtatuat
ambitionem, & gloriæ militaris, quâ
Veteres inclaruere, inconfultam æ-
mulationem.

Non Christo, sed sibi & sanguini ſuo
gloriam nundinatus eſt Carolus IV.
Imperator, qui Wenceslaum filium
ſibi adhuc viventi ſucceſſorem de-
ſtinavit: cūque Rom. Imperij Ele-
ctores in conſenſum, approbatio-
nēque conſilij ſui facile pertrahere
non poſſet, quod virtute non potuit,
pretio comparavit, promiſſis cuique
Electori centum millibus aureorum;
quos

quos cū ipsis repræsentare non posset, publica Romanæ Reipublicæ vectigalia, Imperatoribus ad subsidia relicta, cū maximo Imperij detrimento, ijs non tam oppignoravit, quàm perpetuò alienavit. Atque hinc perpetuum Imperij malum. Nam ab eo tempore Romana potentia ad nihilum redacta (inquit *Aeneas Sylvius* c. 32. *histor. Bohem.*) nec post-hac attollere caput Imperium potuit; cū Principes Electores omnia sibi retinerent, & Imperatorem jurejurando adigerent, ne pignora revocaret.

Non Christo, sed sibi gloriam grandi piaculo comparavit Ludovicus V. Sfortia Mediolanensis Princeps, dum Joan. Galeacium Fratris filium, cui Principatus debebatur, veneno sustulit, eoq; sublato, aureâ veste indutus, Regem se salutari passus est. Bembo. lib. 2. Histor. Venet.

Non Christo, sed sibi gloriam dominationis ambivit Cæsar Borgia, quando ad obtinendum, quod affectabat, Regnum

Regnum Italiæ, ante omnia Proceres Romanos, Columnios & Ursinos tollere constituit: postquam inter eos bellum aliquamdiu frustra aluisset, & utraque pars multis vulneribus si non concisa, certè magnopere accisa esset. Ipsi verò post illud civile bellum, Borgiæ actibus intellectis pacem & concordiam redintegrarunt. Et Columnij quidem nihil sibi fugâ, exiliòque utilius rati, paterna oppida Borgiæ reliquerunt. Ursini verò stipendijs allecti, & in fide Tyranni hæsitantes, ferè omnes teterrimo supplicio necati sunt. Cajetanæ familiæ Proceres, qui Sermonetam oppidum in Latio obtinebant, Jacobus, Nicolaus, & Bernardinus, alio atque alio modo interfecti, arces & opes suas Borgiæ concessere. Camertes quoq; reguli antiquæ nobilitatis, Julius Cæsar, Venantius, Annibal & Pyrrhus, Principatu exuti strangulatique sunt. Astorem, Manfredum Faventia Principem sub fide deditum, necatūq; immaniter

Tyberis

Tyberis excepit. Catharina Sfortia,
 quæ Forolivij & Forocornelij Urbibus imperabat, expugnata tormentis & capta, Romam tanquam ad triumphum perducta est. Pandulfus Malatesta, Joannes Sfortia, & Guido Ubaldus Feltius, ipsorum ditionis Urbes Ariminum, Pisaurum & Urbinum invadenti Borgiæ, relinquere, quàm interfici, arreptâ fugâ maluerunt. Cessit & Jacobus Appianus oppidum Populonium in Hetruria. Et dum hac cruentâ viâ in alienos Principatus grassaretur impius Lætro, etiam Arragonium Adolescentem, Beselij Principem, ac Alphonsi Regis filium (& quod referre pudeat) Lucretiæ sororis suæ Maritum, in atrio Vaticani templi vulneratum: & quoniam spes esset curari posse, in ipso cubiculo lectoque nuptiali sororis mactari iussit. Borgiam item Juniorem Cardinalem Veneno sustulit. Joannem quoque Cerbellianem, Virum domi militiæ-

que

que nobilem noctu à Cœnâ redeun-
tem crudeliter interfecit. Ab eo pa-
riter Capitali supplicio affectus est
Jacobus Sanctacrucius, præclaræ no-
bilitatis Romanus Civis (quo nemo
ipsi Cæsari familiarior, amiciorque
fuit) nec aliam ob causam, quàm
quòd validam promptissimorum ho-
minum manum ex factione Urfinâ
subitò cogere, & ad omne auden-
dum facinus impellere posset. Tan-
dem cum veneno Cardinales locu-
ples tollere decrevisset, pincernæ
imperitiâ permutatis lagenis, Cæ-
sar ipse Paterque ejus Alexander, qui
convivio intererat, venenum bibe-
runt. Et Pater quidem vim veneni
non ferens interiit: Borgia verò æta-
tis robore evadens in vincula conje-
ctus est, è quibus elapsus ad Regem
Navarræ confugit, ac demum in præ-
lio quodam ignobilis cecidit. *Jovius*
lib. 8. histor.

Ita pseudopoliticus & Antichri-
stianus iste fortunarum vitarumque
ali-

alienarum prædo sine gloria decessit
 è vita; quia cum detrimento gloriæ
 divinæ, gloriam propriam tantâ ani-
 mi elati impotentia quæsit, ut etiã
 hæc verba: *Aut Caesar, aut nihil*, vexillis
 suis militaribus inscribenda curave-
 rit. Gloria vana florere aliquamdiu
 potest: Fructum, quia Dei gratia de-
 stituitur, ferre non potest. *La gloria
 vana fiorisce, e non grana.*

Discant igitur Christiani Principes,
 illam esse brevissimam ad culmen ve-
 ræ gloriæ semitam, in rebus omnibus
 non suam, sed Dei gloriam quærere.

Joannes Ferrus *part. 2. Theatri Sym-*
bolicum proponit symbolum ab om-
 nibus Christianis Principibus usur-
 pandum; videlicet acum magneti-
 cam, cum hac inscriptione, *Respicit
 unam*. Sicut enim acus magnetica,
 cui magnes affricus est, inter omnes
 stellas *respicit unam*, videlicet polarem;
 Ita Princeps verè Christianus, magne-
 tismo divini amoris imbutus, *respicit
 unam*. supremi Principis gloriam :
 hanc

hanc unicè optat, hâc sollicitè quærit, ad hanc in suis omnibus functionibus tanquam ad scopum collimat, huic, posthabitis proprijs commodis, privatoq; Interesse, se totum impendit.

Sed (quæ temporum nostrorum est calamitas) cupiditas gloriæ (non divinæ, sed propriæ) acerrima est in quibusdam Principibus : quos illa (quia virtus impetum non reprimat) acutissimis stimulis ad quidlibet audendum commovet. Unde turbationes maximæ oriuntur in Republica Christiana. Quod Scipio Bargaglius tract. de Symbol. accommodatè exponit symbolicâ repræsentatione venti mare turbantis, & fluctus attollentis, apposito hoc Lemmate: *Turbat & extollit*. Sicut enim marinæ aquæ ventorum impetu turbantur, & in fluctus ingentes concitantur; ita ventus superbiæ, quo nonnullorum pectora Principum intumescunt, sicut in ipsis immanes planèq; decumanos elatæ mentis fluctus extollit, ita pariter *turbat*

cunda debilius nitet, tertia vix apparet; ita raro pares. Avis nascuntur nepotes.

Non ineptè hoc hominum genus comparaverim cum ave cui nomen Collurio: Quæ teste Jonstone in Thanmatographia, pullos habet tam dissimiles parentibus, ut eos vix unicâ notâ referant.

Nobiles fiunt, nobilitandi nascuntur.

Ita sensit Urbanus VI. Pontifex Max. humili prosapiâ ortus, Patre scilicet Sutore Veteramentario in Urbe Trecensi. Is, cum aliquando ipsi objiceretur, quod ignobili loco natus esset, respondit, Virum Nobilem non nasci, sed fieri.

Nobilità non s' acquista nascendo, mà virtuosamente vivendo.

Ille est verè Nobilis, qui ad vitia non est Mobilis.

Hoc probè intelligentes viri Nobilissimi, quorum sanguini Virtus Majorum præclaros veræ gloriæ igniculos, tamquam spiritus quosdam vitales.

vitales indidit, ducti ab Illustrissimis Progenitoribus longo traduco stemmatis, & avitæ Majorum gloriæ nequaquam inmemores, Gentilitiam suam arborem insitiva Novi Herois Gemmulâ inoculare, hoc est, Avorum Virtuti Virtutem, Meritis merita, fortunæ fortunam, gloriæ gloriam adjicere conantur.



CAPUT VII.

Quòd Principes suis Subditis bono exemplo, sed sine hypocrisi, prælucere debeant.

BOni Principes boni Exempli Facem suis Subditis præferre solent, ad Viam Virtutis alacriter decurrendam. Malè imperat, qui tantùm imperat. Exemplo Imperia & formanda, & firmanda sunt. *Chi vuol commandar, cominci prima à far.* Exemplum in Magnis Magnas habet vires in utramque partem, si-
ve ad

ve ad bonum, si bonum : sive ad malum, si malum. Sæpè Principes bene agunt soli, sed rarò malè agunt soli ; quia subditos in bono exemplo rariùs, in malo sæpiùs habent sequaces.

Caveant igitur Principes, ne quantum suis subditis per salutare leges emolumenti, tantum iisdem per prava exempla nocumenti afferant. *Qui lege docet, & exemplo nocet, plus nocet, quàm docet.* Et quid hoc est aliud, quàm unâ manu ædificare & alterâ destruere ? Audiatur S. Chrysostomus : *Bene docendo & male vivendo instruis Deum, quomodo te debeat condemnare.*

Quapropter illud acri studio à Viris Principibus providendum est, ut cum eorum legibus exemplum vitæ, & cum exemplo vitæ genuina veritas, detractis omnibus hypocriticis larvis, accuratè conveniat.

Qui sub larva hypocritica, h.e. sub inani Virtutis specie Veram virtutis inopiam occultat, is ad Virtutem ma-

gis *fictus*, quàm *factus* est; eo quòd probus videri, quàm esse malit.

Talis fuit Judas proditor, sub ovina pelle lupus rapax, sub agni lana Leo rugiens, sub toga Apostoli perfidus Deicida, sub larva discipuli facerilegij Magister, sub figura hominis diabolus incarnatus.

Talis fuit & Tiberius Cæsar, qui virtutum simulacris ingentia prætexuit vitia, *Con l'ombra delle Virtu si dipinge il vitio*. Verùm ille sui tegendi peritissimus artifex totus tandem posteritatis oculis patuit: Deo hypocrisis in detractiōe larvæ plectente. Meta ad quam colimat hypocrita, est gloria: Sed ad hanc metam nunquam perveniet; quia nunquam non graditur via duplici: Viâ inquam virtutis apparentis, & viâ nequitiae latentis. *Illā est rectissima ad gloriam via, si talis sis, qualis haberi cupis.*

Audiant hypocritæ, sed audiant ad correctionem malitiæ suæ, hoc planè aureum Oratoris aurei, Chrysostomi

soltomi inquam, pronuntiatum: O
hypocrita, si bonum est bonum esse, ut
quid vis apparere, quod non vis esse? Si
malum est, malum esse, ut quid vis esse,
quod non vis apparere? Aut igitur ap-
pare quod es, aut esto quod appares.

Symbolum Carini Cæsaris fuit,
Esto quod audis.



CAPUT VIII.

*De Moderata agendi ratio-
ne à Principibus usur-
panda.*

PER moderatam agendi rationem
intelligo virtutem aureæ medio-
citatæ, quâ omnis in actionibus Prin-
cipis vitetur excessus.

Porro *Excessus* nihil est aliud, quàm
Recessus, & *Accessus*: hoc est, *Recessus*
à Medio virtutis, & *Accessus* ad extre-
ma vitiosa. Accommodatum est ad rem
presentem Justiniani I. Imperato-
ris

ris symbolum : *Quod satis est, multum est, quod nimium, non sufficit.*

Spesso chi troppo fa, troppo poco fa.

Cæterum tres *Excessus*, sive tria *Nimia* nimium nocere solent Principibus : *Nimia suspicio, Nimia credulitas, Nimia timiditas.*

Cominæus *S. Commentar.* postquam Ludovicum XI. Regem Galliae ante diem fatumque suum, ut ipse opinatur, mortuum; Carolum VII. Veneni metu, quasi inedia extinctum; Carolum VI. diversis suspicionibus agitaturn, mente excidisse narrasset : Causam in universum, cur à Caroli Magni ævo usque ad sua tempora, nullus Franciæ Regum sexagesimum vitæ annum exceßerit, isti suspicandi, credendi, metnendi morbo attribuit.



CAPUT IX.

De Refrænatione nimia libertatis in Principibus.

Libertas Principis refrænata, est Reipublicæ sanitas : effrænata, ægritudo. Sæpè enim quod non potest, vult posse, qui nimium potest. *Cui plus licet, quàm par est, plus libet, quàm licet*, infeliciter imperant, qui imperium licentiâ metiuntur, & potestatem arbitrio. Felicissima ex adverso eorum est gubernatio Principum, qui non minùs imperant affectibus animi sui, quàm subditis suis. Verè magnus est Princeps, qui magnitudinem suam non tam Imperio, quàm Imperij moderatione : non tam hostium, quàm hostilium suarum cupiditatum victorijs metitur.

Itaque Principes meminerint, magnum inter *licita* & *libita* statuendum esse discrimen, semperque præ oculis habeant tum illud Augustinianum:

*Hoc possumus, quod jure possumus :
tum sapiens illud, planèque Regium
Regis Theodahati apud Cassiodorum
lib. 1. pronunciatum : Cum omnia
possimus, sola credimus licere nobis lau-
danda.*



CAPUT X.

*Studium litteraturæ, præ-
sentim Politicæ, Viris Principibus
æquum esse negligen-
dum.*

Princeps infra hominem sapit, qui
doctrinam non capit. Natura
enim Noverca, eruditio Mater est.
(Inquit Maximilianus Elector Bava-
riæ in monitis ad filium) Illa nos a-
nimalia, ista homines facit. Mag-
num lanè Viris Illustribus ab erudi-
tione accedit ornamentum. Nam
sicut poma aurea in lance argentea
sunt conspectiora; Ita Nobilitas lit-
terata

terata est multò illustrior. *Doctrina in Homine plebejo est argentum, in nobilibus aurum, in Principibus Gemma pretiosa.*

Quod cum probè intelligerent Viri in Germania nostra nobilitate generis conspicui & dignitate Principes, eà animi contentione in studia literarum incubuerunt, ut inde gloriam nominis consecuti fuerint immortalem.

Sigismundus Baro Herbersteinus, cujus historiam Moschoviticam lectu dignissimam censent eruditi, inter omnes dignitates & honores, tum varijs legationibus, tum alijs expeditionibus, muneribus, & laboribus partos, primas semper detulit titulo Baccalaurei; quòd illum non indulgentiâ Principum, nec generis claritudine, sed solis ingenij viribus in Academia Viennensi sibi comparasset.

Everhardus Baro Starenbergius
B 4 Theo-

Theologiæ Doctor, ingenio & doctrinâ sacras infulas meruere: Ille Salisburgensem Archiepiscopalem, Hic Frisingensem Episcopalem.

Hermannus Hassiæ Princeps, in Academia Pragensi, summâ Cæsaris Caroli IV. & Bohemiæ Procerum congratulatione Magister Artium factus est.

Joannes Dux Megapolitanus ipsos viginti annos Lutetiæ studiorum causâ commoratus, non ante ad suarum ditionum gubernacula reverti voluit, quàm publicè sacrosanctæ Theologiæ Doctor renunciaretur.

Arnoldus & Wilhelmus Geldriæ Ducēs fratres erant; quorum ille literatus, iste illiteratus: Ille in gratia Regum, & Pauli Pontificis, Ille ob ruditatem neglectus fuit. Quam ignominiam ne hereditariam cum patrimonio in liberos transmitteret Wilhelmus, filios suos ad Academiam Parisiensem missos inde redire noluit.

noluit, priusquam publicis Academiae testimonijs Magistri Artium liberalium creati essent.

Albertus IV. Dux Bavariae Academiae Ingolstadiensis auctor, artium studia eo dignatus est honore, ut non tantum Ipse adolescens primi gradus laurum Lutetiae sumpserit, verum etiam insignia, quae Baccalaureos ab alijs Ordinibus distinguunt, publicè per plateas gestaverit.

Est sanè hoc ornamentum doctrinae Viris Principibus apprimè necessarium; ne semper Cæci ipsi, oculis alienis videre cogantur.

Quemadmodum corpus animam destitutum non movet, sed movetur; ita Princeps amusus regitur, & non regit.

Mutilus est ille Princeps, qui præcipit, & non percipit.

Beata quella città, che hà Prencipe ch'isà.

Quòd si quærat, quibus potissimum disciplinis instructum esse o-

porteat Principem. ajo Scientiam Politicam, præsertim eam, quæ tradit præcepta Artis imperandi, uti Principe dignissimam, ita Principatui utilissimam, & utrique maxime necessariam esse.

Sed mirum est (inquit Sigismundus Imperator) quòd cum omnes recusent exercere Artem, quam non didicerant; nemo tamen recuset imperare, tametsi Artem imperandi, quæ est omnium difficillima, nunquam didicerit.

Sed & ego vehementer admiror, nonnullos, qui se moderatores juniorum Principum profitentur, multum temporis impendere tradendis Discipulo præceptis Artis poëticæ, Dialecticæ, Astrologiæ, Musicæ, aliisque sterilibus, & ad bonum publicum parum profuturis scientiis: de Arte verò Imperandi, à qua pendet Salus Reipublicæ, non admodum esse sollicitos.

Quid

Quid obsecro juvat nosse Principem concordiam harmonicam Vercum musicalium, si nesciat, quibus modis sit procuranda concordia politica animorum inter Principem & subditos? Quid prodest intelligere, quid sit cantus mollis & durus, & non intelligere, qui subditi durâ, qui molli manu tractandi sint? didicisse suspiria Musicalia, & interim suspirare sub gravi onere principatus, cui ferendo sint impares humeri imperiti Principis? perspectum habere discrimen inter Modos Musicos: Doricum, Hypodoricum, Phrygium, Hypophrygium, Lydium, Hypolydium, Mixolydium, Hypomixolydium, Æolium, Hypoæolium, Jonicum, Hypojonicum, Hyperæolium & Hyperphrygium; ignorare autem discrimen inter adulatorem & amicum, inter Ministros fideles & perversos, inter leges salutare & noxias, inter fœdera profutura & obfutura?

Quantò utilius est Principi intel-
ligere Aulicorum astutias, quàm Dia-
lecticorum argutias? scire leges bonæ
gubernationis, quàm Regulas bonæ
definitionis? novisse modum *feriendi*
hostes, quàm facere centum sylogis-
mos in *ferio*? callere libros Lipsij Po-
liticos, quàm libros Aristotelis analy-
ticos? loqui de objecto contributio-
nis, quàm differere de objecto attri-
butionis?

Enimverò Scientia Politica ad
Rempublicam bene gubernandam
Viro Principi apprimè est necessaria.
Cum enim Princeps non modò Poli-
ticus, sed etiam Politicorum Ante-
signanus sit (certè esse debeat) non
oportet eum Scientiæ Politicæ igna-
rum esse, i. e. Pseudopoliticorum
fraudibus circumventus, serò cum
Phrygibus sapere incipiat.

Est verò triplex Politica: *Bona*,
Mala & *Mixta*, quæ est Moderna.

Politica bona Theopoliticis po-
tius, quàm Cosmopoliticis nititur
pria-

principijs; cū nihil aliud ipsi propositum sit quā juxta Regulas à Virtute Prudentiæ dictatas Rempubli-
cam ordinare, honestatem utilitati,
divina humanis, cælestia terrenis, bo-
num publicum privato anteponere.

Politica mala ex dolis, technis,
& fraudulentis subdolisque machi-
nationibus composita est, mediis que
utitur nullo discrimine *libiti & liciti*
delectis; dummodo deserviant ad
finem intentum, qui est status huma-
næ & mundanæ felicitatis.

Unde mali Politici sunt paralytici;
quia nec habent pedes ad ambulan-
dum in Via Veritatis, nec manus ad
operandum in Via charitatis. Mali
politici omni vento obvertunt vela
desideriorum suorum, & ut dici so-
let, duabus sellis sedent. Quod re-
prehendit olim in Cicerone Labe-
rius Mimus, qui in Senatum lectus à
Cæsare, cū ad confessum nō admit-
teretur à Cicerone, dicente: *Recipe-
rem te, nisi angustè sederemus*, morda-
citer

citer respondit, *Atqui solebas duabus
illis sedere.* Quo dictorio lubrica &
desultoria Ciceronis fides perstricta
fuit.

Politicam modernam non igno-
rent Christiani Principes, sed tamen
ita in praxim usumque deducant, ut
scopulos omnes Fseudopoliticos præ-
sertim Macchiavellicos, cautè devi-
tent.

Est autem Politica moderna tota
mirabilis & mysteriosa. Eam Primi
subsellij Ingenia intuentur, sed non
agnoscunt: contemplantur, sed non
penetrant: admirantur, sed non
comprehendunt. Patet illa omnibus,
& tamen omnes latet. Sentitur, & ne-
scitur: occulta est & Publica. Otiari
videtur ubi est, negotiari ubi non est.
Movet orbem terrarum, & quiescit.
Exercet omnia Ingenia & penè om-
nibus Ingenijs est inaccessa. Liber
publicus est, quem dum Politicæ Ve-
teris Sectatores evolvunt, semetipsos
involvunt. Anteverit illa suorum
hostium

hostium machinamenta, quia Ingenia eorum novit: metitur ingenia, quia excedit illa: eludit insidias, quia detegit illas: evitat pericula, quia prospicit illa: impedit facienda, quia prior opposita facit.

Verfatur Politica Moderna potissimum circa *Interesse* (ut vocant) quo nihil est inter homines mundanos appetibilius.

Interesse videtur in hoc mundo Primum mobile esse. Appositè Itali *Ognun tira l'acqua al suo molino. Ogni galeotto voga à se.*

Porro *Interesse* aliud est Politicum, aliud Pseudopoliticum.

Interesse Politicum est laudabile, quia refertur ad incolumitatem Reipublicæ, neque divinis humanisque legibus adversatur.

Pseudopoliticum *Interesse* nihil est aliud quàm à DEO *Abesse*, Diabolo *Adesse*, Nemini *Prodesse*, Plurimis *Obesse*, Officio suo *Deesse*, Subditis malè *Præesse*, Legibus nolle *Subesse*.

Inni-

Innititur Pseudopoliticum *Inter-*
esse principiis Antichristianis, & Dia-
bolo inventore dignissimis. Quo-
rum aliqua (ut ex ijs noscantur cæte-
ra, & hi tot animarum naufragijs
infames scopuli tantò meliùs evitari
possint) hic libet commemorare.

1. Reges non curent, quàm bonis
sed quàm subditis imperent.

2. Principes non jubeant dura,
non prohibeant impura; si ad incre-
mentum potentiae & Imperij expe-
diat.

3. Ille optimè scit regere, qui
mala scit optimè tegere.

4. Fidem nulli omnem tribue,
nulli non videaris tribuere.

5. Amico utere tanquam hoste fu-
turo: hoste tanquam amico.

6. Ille politicè agit cum amicis, qui
putatur se totum in sinum illorum
effundere, & tamen totus latet.

7. Illorum officiorum sis ubique
largissimus, quæ verbis absolvuntur.
Blandè saluta, copiosè lauda, pollice-

re liberaliter nunquam largienda. Nonnunquam etiam munusculis alterius benevolentiam tibi necessariam compara; modò hamo non pisceris aureo.

8. Neminem inimicum quàm amicū malis; nulliquē sis apertē injurius, sed iram potiùs comprime, donec vel tectē vel securē nocenti nocere possis.

9. Religionem ad Regionem non Regionem ad Religionem accommodare oportet.

10. Non multum interest ad Reipublicæ quietem, cujus Religionis censeantur incolæ; dummodo non discrepent hac in re sententijs in apertum prolatis: ex hac enim diffensione seditiones oriri proclive est.

11. Ratio Statūs est unicum Idolum quod Princeps adorare debet.

12. Prima Principi ærarij locupletandi cura sit. Artes non deerunt favorēsque Procerum; modò ipsi in partem commodorum veniant. Ne-

mo tutius regnat, aut militat certius, quàm qui pecuniæ habet plurimum: undecunque demum ea conquisita fuerit.

13. Nulla pacta, nulla fœdera, etiam jurejurando firmata, obstringunt Principem, nisi inde sperata proveniat utilitas.

14. Fraudibus (sed Magnis) rem suam augere, Regium reputatur. Unde falsè & argutè Boccalinus ait, summum, vendere privatis interdictum, solum Regum Mercaturam esse.

15. Omnes linearum actionum Regiarum concurrent in unum centrum, quod est evacuare socij loculos, & inde replere suos. *Dittum Boccalini cent. 1. cap. 3.*

16. Principes, qui occultas similitates inter se gerunt; ad eas contendas, debent sibi mutuis donis & legationibus nova Regna, conjugia, Victorias, natum Regni heredem, reciprocè gratulari; & omnia benevoli animi signa utilissimâ simulatione præferre.

17. Pri-

17. Privatorum est eligere Matrimonia ex amicitiae affectu, vel morum concordia. Regibus ista suavitas exuenda est. His affinitates pulcherrimae censentur, quaecunque Regnum stabiliunt.

Carolo VIII. Galliae Regi Margaritha Maximiliani Imperatoris filia desponsata erat: quam Ille, cum jam aliquot annis in Gallia commorata esset, non aliam ob causam repudiavit, quam ut Annam, cum amplissima dote Britanniae Armoricae, quae morte Patris sine Mascula prole defuncti, ad eam devolebatur, uxorem ducere posset. *Guicciard. 1. histor.* Quam denique Viduam factam Ludovicus XII. repudiata priore Uxore, quae Caroli VIII. soror fuerat, eandem ob causam sibi Matrimonio copulavit: quaesito colore, quasi prior illa ingratis sibi à fratre desponsata fuisset, *Boccalin. centur. 2. cap. 87.*

18. Reges, ut decipiant specie amicitiae, matrimonia concilient, vel
con-

contrahant affinitates (si id comōditatis utilitatisq; ratio exposcat) cum ijs, quos everfos cupiunt.

19. Jurisconsulti & Theologi (*Concilium Conscientia vocant*) venalem stylum & linguam habeant, suorumque Principum propensioni utrumque accommodent.

20. Principes, si possint, eos sibi successores designent, qui vitæ morumque perversitate majora prædecessorum vitia quodammodo obnubilent.

Ita Augustus Cæsar imperium tradidit Tiberio, homini sanguinario & perversissimè subdolo, ut ipse desiderabilior fieret. *Sueton. in Tiberio c. 21.* Ipse quoque Tiberius gavisus dicitur, succedere sibi Caligulam; à quo flagitiorum suorum memoriā scelerum magnitudine delendam sperabat. *Dio Cassius lib. 58.*

21. Ut procères in officio continentur, caveaturq; ne caput altius attollant, à Principe humiliandi ac depri-

primendi sunt; idque fiet, si tituli Baronum, Comitum, Ducum, &c. quibus ipsi gloriantur, novis & vili- bus hominibus, sub prætextu meritorum, conferantur. Evilescent enim illa grandia nomina multitudine & ignobilitate candidatorum.

22. Illi, qui sunt seditionis auctores; ut spes omnis reconciliationis procul amandetur; & ut Tacitus loquitur, 4. *histor. quò minore spe venia crescat vinculum sceleris*; debent aliquo insigni facinore multitudinem malefanciam obstringere; ut ne quidem si affulgeat aliqua spes redeundi in gratiam cum Principe, aut offensâ patriâ acceptare eam liceat; obversante oculis horribili sceleris conscientia.

23. Laudandi sunt apud Principem, quos ab Aula remotos, aut plane perditos cupimus. Nam laudibus præmissis præparatur auris Principis ad audienda, & animus ad credenda maligna, quæ ille ex laudatore factus

factus vituperator & accusator, de homine prius laudato narraturus est.

Ita Apelles, omnium secretorum: Philippi Macedoniae Regis arbiter, praeipuae auctoritatis viros laudando; quod dignissimos esse diceret, qui in castris versarentur; periculis & casibus dolose objectavit. *Polybii lib. IV.*

24. Rapacissimum quemque ad amplissimas praefecturas promoveat Princeps: eo fine, ut eos rapinis fatiatis, opibusque ditatos, velut spongas aqua plenas comprimere, & succum exprimere valeat. Id saepius factum a Vespasiano Caesare, testatur Suetonius.

Atque hoc artificium aliam insuper habet annexam utilitatem. Cum enim frequentissima sint populorum, ob tributorum acerbitem, avaritiamque Principum rebelliones; non est accommodatior ratio sedandi illas, quam si saevienti populo, isti
exa-

Exactionum tributorumque novorum inventores objiciantur.

25. Primum & Principale Instrumentum, quo Principis animus ad audiendi patientiam disponitur & præparatur, est adulatio (sapidissima humani Ingenij esca) quâ persuadeatur Principibus, eos solos sapientes, solos rerum & consilij potentes esse.

Hæc dictamina *Interesse* pseudopolitici regulativa redolent officinam Tartaream, in qua cusa sunt: & ideo non politica, sed Antipolitica, & Christianæ legi è diametro opposita sunt, meritòque Antichristiana, & ipsi Interessentes Pseudopolitici (liceat mihi hoc barbaro vocabulo barbarum genus hominum appellare) Antichristiani, hoc est, Antichristi aeternæ & sectatores appellari possunt.

CAPUT XI.

Quod Princeps amicos sagaciter eligere, electos prudenter conservare debeat.

IN omni Vita tam utiles, quàm necessarij sunt boni amici.

Amicus sincerus thesaurus verus. Chi fa un buon amico, acquista un buon capitale. Melius est habere amicum sine pecunia, quàm pecuniam sine amico.

Quot habes amicos, tot habes oculos, quibus quæ velis videas: tot aures, quibus quæ velis, audias: tot Consiliarios, quibus quæ velis consultes.

Porro conservaturus amicum, quem habet, & comparaturus quem non habet, sequentes regulas præ oculis habeat.

Prima. Tu omnia cum amico delibera, sed de ipso priùs.

Secun-

Secunda. Neque nulli sis amicus, neque multis. Cato in annuli sui gemma insculptam habuit hanc gnomen: *Amicus unus, inimicus nullus*.

Tertia. Per humanitatis officia, & liberalitatis beneficia, comparatur amicitia.

Un bonnet (ajunt Galli) par un plus ou moins de Papier blanc une ou deux mains, & par fois un ver de vin, font acquérir des amis maints.

Volunt dicere Galli, tribus rebus comparari amicitiam: *pileo, vitro, folio chartæ.* Pileo, per humaniter amicum salutando: Vitro, haustum bonum ei propinando: Folio chartæ, literas illi missitando.

Quarta. Amicus fraudulentus præ omnibus cavendus.

Da chi mi fido, guarda mi dio: da chi non mi fido, mi guardarò io.

Quinta. Amicus verus cernitur Amore, more, ore, re.

Sol di parole amico non val un fico.

Sexta Amicitiae simulatae indubitata nota est dissensio cordis & oris.

Amicitia simulata in ore mel, in corde fel.

Baccio di bocca spesso cuor non tocca.

L' huomo baccia alle volte le mani, che vorrebbe veder tagliate.

Septima. Amicitia inter pocula contracta, plerumque solet esse Vitrea.

Ostava. Illa amicitia est fucata, quae incipit expirare, quando Fortunae Favonius desinit spirare.

Tales amici sunt similes argento vivo, quod amicitiam quandam contrahit cum auro, eique tenaciter adheret: sed cum Aurifaber probaturus aurum, illud in fornaculam conjicit, argentum vivum vertitur in fumum, & aurum deserit. Ita comparatus est *amicus*, solo nomine *amicus*. Ecclesiastici c. 6. *Est enim amicus secundum tempus suum, & non permanebit in die tribulationis.* Ibidem cap. 37.

Nona. Amicitia, si vera est, parit duos gemellos, *Amorem & Dolorem*: hunc in rebus adversis amici, illum in prosperis pariter & adversis.

Decima. Rebus secundis amici parantur, adversis probantur.

Amici multi habui: mentre ricco farai.

Undecima. Amicum honora, in præsentia, lauda in absentia, juva in indigentia, sic permanebit in benevolentia.

Duodecima. Amici non debent esse supputatorii Calculi, qui interdum valent multa millia, interdum nihil.

Decima tertia. Amicitiae nutrimenta sunt munera.

Si mihi das, tibi do: si nil das, nil tibi reddo. Sic Verbum DO. DAS nutrit amicitias.

Decima quarta. Ille amicus parum diligit me, qui multum diligit meum.

Non è vero amico di te, chi si mostra troppo amico del tuo:

CAPUT XII.

*Quòd Principes magnam æ-
rarij locupletandi curam ha-
bere debeant.*

NObilitati universim ingens æsti-
mationis pondus adjicit opulen-
tia, adimit indigentia. *Nobilitas ege-
na est pulchra, sed vacua crumena. No-
biltà poco si prezza, se vi manca la ric-
chezza: Colore ch' hanno ducati, si-
gnori son chiamati. Chi hà fiorini, tro-
verà cugini.*

Præcipuè tamen necessariæ sunt
opes Viro Principi, qui ad conserva-
tionem statûs sui multis indiget ad-
miniculis, absque auro argentoque
nequaquam comparandis.

*Opes ideo appellantur opes, quia opi-
tulantur in multis, & ad multa.*

Non sunt igitur opes negligendæ
Principi, ne suam ipse dignitatem
neglexisse videatur.

Sine

*Sine arario Princeps vivit precario:
imò est pila omnium vicinorum.*

Defectus ærarij causat *Indigentiam*, & *Dependentiam*: quæ sunt duæ crassæ nubes, quibus spendor Majestatis plurimum obscuratur.

Ad quæ incommoda evitanda, Magni Duces Hetruriæ magno semper studio locupletare ærarium consueverunt. Afferunt aliqui pro comperto, ex relatione cujusdam Legati Veneti, prædictis Principibus tantum pecuniæ numeratæ congestum & in omnes occasiones conditum asservari, quantum vix apud alium Europæ Principem reperiatur. Certè mortuo Francisco Cosmi I. Ducis filio, centies centena aureorum millia in ærario fuere reperta: & pretiosæ suppellectilis tantum, ut vicescentenis aureorum millibus sit æstimatum. Ferdinandus deinde Francisci frater, quique Ferdinandum secuti sunt Duces, in immen-

sum relictas à Decefforibus opes accumulârunt.

Illi sunt Magni Magnates, qui habent Magnos auri Magnates.

Hujusmodi inter alios est Rex Gallix : in quo Regno res quatuor supra opinionem hominum mirificè abundant : *frumentum, vinum, limum, sal* : quæ à Botero non ineleganter *Gallia Magnetes* appellantur. Ut enim magnes (non tamen omnis, sed cæruleus, & præsertim Æthiopicus, cui laus summa tribuitur, pondusque argento rependitur) domitricem illam rerum omnium materiam ferrum attrahit, sistit & complexu tenet; sic isti Gallici Magnetes, qui Æthiopicis tantò sunt meliores, quantò Gallia est nobilior & cultior Æthiopiâ, omnem extraneorum pecuniam, omne aurum & argentum ad se trahunt, & Galliam constituunt, quasi Thesaurariam Orbis universi.

Quòd si reliqui *Magnates* hujusmodi

modi auri *Magnetes* in Regno vel Territorio suo non habeant, suppleant defectum industriâ; præcipueque caveant ab ijs, quæ non nisi ad minuendam exhaustiendûmque ærarium deserviunt.

Sunt autem sex ærario pernicio-
sa: *Consilia bellicosa, edificia sumptuo-
sa, donativa pretiosa, Natura litigiosa,
vita luxuriosa, mensa gulosa.*

Hoc postremum experti sunt Co-
mes quidam Werdenbergensis, &
Domina Pfullendorffensis: quorum
ille libis dulciarijs (libetas vocat Fe-
lix Fabri *Histor. Suevic. lib. 3. c. 4.*)
quæ accipiebat ab Ulmensibus, Al-
beccensem Comitatum insumpsisse:
Hæc verò Arcem & oppidum abli-
gurivisse fertur meris trutarum jeci-
noribus. *Crus. Annal. p. 2. l. 9.*

Constitueram præsentis materię
telam inciso dissertationis filo ab-
rumpere, sed quoniam res est ad in-
crementum boni privati publicique
non minùs necessaria, quàm lucrosa,

ideo pleniorẽ hujus argumenti
pertractationem annecto, ex qua
perspicuè intelligere licebit, quibus
modis varij Principes ararium su-
um locupletaverint, opesque ingen-
tes conquiſiverint.

Ac primũ quidem per multi
Principes & auxerunt olim, & augent
etiamnum suas opes per moderatam
honestamque parsimoniam.

*Magna opes non tam accipiendo colli-
guntur, quam non prodigendo.*

*Detractio superfluarum expensarum
est innocentissimum ararij incremen-
tum.*

Hoc parsimoniæ præsidio adju-
tus Henricus III. Rex Hispaniæ bre-
vi opes comparavit amplissimas, te-
ste Roderico Sanctio, cujus verba
subjicio. *Quod non parum, inquit,
admirationi fuit, parvo tempore amplis-
simum aggregavit thesaurum non sibi,
sed bello contra Arabes diffundendum :
quanquam ad fisci sui commoda non ef-
fecit ad-*

set, admodum affectus, dicens illud Constantij Imperatoris, longè melius publicas opes à privadis possideri, quàm intra Unum claustrum reservari: addens, ditissimi Regni Regem, inopem esse non posse.

Alij Principes, per magnam artium mechanicarum in sua ditione curam, magnum thesauro suo auctarium adjiciunt. Habuit, teste Lampridio hanc curam Alexander Severus, qui *mechanica opera plurima Romæ instituit: negotiatoribûsque, ut Romam volentes concurrerent, maximam immunitatem dedit.* Imitentur Principes hunc Alexandrum, felicibûsque mechanicarum Artium successibus studeant, peritos in eo genere foveant, præmijs etiam illos invitent. Nec evocare è vicinis remotisque regnis, immunitatibus quibusdam concessis, pigeat. In his fortunæ Regnorum magnâ sui parte consistunt; neque alia res certiùs Principis ærarium locupletat, neque

C 5

majore

maiores negotiationum, merciumque orbe toto invehendarum, evendarumque materiam præbet, neque quidquam, ab extremis etiam terrarum, pecuniâs, merciumque genus omne, potentiùs evocat: ita ut quod genitum est usquam, id omne in uno regno natum videatur. Crescit deinde Provincia crescentibus artibus, non ærario tantum & opibus, sed hominum etiam multitudine: è quibus & robur additur regno, & regia Vectigalia insigni passim incremento crescunt; è populi enim multitudine, ferme publici ærarii magnitudo pendet. Advocet igitur Princeps in ditionem suam quarumcunque artium peritos, animet indultis, muneribus etiam alioiat, certisque prærogativis exornet, ut venire velint & audeant, cumque meliorem patriam in fortunatiore ac opulentiore invenerint, patriæ obliciscantur. Nec grave hoc erit, cum Patriæ ob-

livio.

livionem opes inducant, & illa patria habeatur, in qua cum opibus com-
moda & honores creverunt.

Nonnulli principum rem suam egregiè augent, dum nec extra di-
tionem suam patiuntur fieri, quod in Ea fieri potest, nec efferri in-
dustriæ materiam, nec inferri ea, quæ ex mutuatitiâ à se materiâ con-
fecta sunt. Hanc industriam non ignorat, sed mirum est, quòd non amplectatur, Hispania. Illa serico & lanâ dives est, & à remotis Regnis laneas sibi sericâsque mutua-
tur Vestes, Regnorum aliorum emolumento magno, damno suo non minimo. Permittit domi suæ nata efferri, ut majore inde præ-
tio revehat. Posset Rex Hispanus Hispaniæ suæ de panni serici laneique textoribus prospicere: è quibus regia crescerent vectigalia, nec tanta populorum solitudo regnum teneret; posset quoque domus suæ parata, ad Regna alia trans-

mittere, & vario Regnum suum lu-
cro beare. Nunc autem fœcundi-
tatem felicitatēque suam ultrò ab-
jicit, & pretiosam byssum nobilem-
que lanam alienis elaborandam tex-
trinis emittit, atque ita seipsam pro-
prijs commodis opibûsque, quas
benigna profundit tellus, denudat,
ut alios, etiam hostes, locupletet.
Sed desunt, inquiunt Hispani, qui-
bus textile illud opus credatur. Non
desint Artifici sua præmia, & quæ-
dam, etiam non noxiæ Regno im-
munitates, & non deerunt ultro
operam suam spondentes. Quod
dixi de Hispania, de aliis etiam
Regnis intelligendum est: nisi tan-
ta rerum quarundam copia sit, ut
omnem Operarum manum vin-
cant; Quod ubi fit, pars aliò
mandari poterit, sed ita, ut sua
Regi & Regno emolumenta consent,
ne, dum alij beantur, frustrentur
ipsi. Miserum sanè, & fatuitatis quod-
dam genus, te nudare, ut alium ve-
stias.

Itas. Sed nimirum Magna fere Regna (inquit Scribanus in politico Christiano) vel ipsâ magnitudine suâ, ad nescio quæ improvida labuntur; quasi sub ingenti mole fatiscant genua. Ita cum orbem propè universum auro, argento, gemmis lassent Hispani, Regnum ipsi suum ære fatigant ignobili? & pro auro argentoque, æs illis ab hoste cusum est; cumque divitiarum suarum reconditoria ære onerent, cacabeis gloriari opibus possunt: fors nec multò post plumbeis, exinde etiam ligneis, aut boum tergoribus. Remedia huic malo suggesta non semel, ut nesciam, quorum hîc ludat Magnorum manus: Inter tot magna ingenia, tot selecta Regia Concilia, æri pellendo, vel non repertum, vel non admissum consilium est. Aurum video totâ propè Hispaniâ exulare, æs imperare, quis credat? Hæc Scribanus.

Quidam Principe innoxie discunt per auri argentique fodinas, quas per idoneos homines, reique metallicæ benè peritos, in territorio suo indagant. Hi imprimis metallorum Venas aperire ac detegere solent, indicio à torrentibus desumpto. Observant illi Venarum fragmenta, quæ torrens è terrâ eruit. Si enim ea supra terram jacuerint, aut sint levia, signum est, Venas ab ipsis plerumque longius abesse, propterea quòd torrens ea extracta, procul à Venis abripuerit, & dum ea propelleret, levia fecerit; si verò terræ infixæ, vel asperæ fuerint, haud procul aberit vena. Deinde considerant & observant pruinas, quibus herbæ omnes candicare solent, his exceptis, quæ crescunt supra Venas; Hæ enim emittunt exhalationem calidam & siccam, quæ exhalationis humidæ concretionem, & consequenter pruina impedit; quocirca tales herbæ magis made-

malescunt aquis , quàm pruinis
candicant ; quo igitur loco herbae
humidae non congelant , signum est
subesse Venam ; quæ si spiraverit
valdè calidum , ea terra fert herbas
humiles , & coloris non Vivi. Ob-
servant quoque arbores , quarum
folia tempore Veris sub cærulea vel
livida sunt , imprimisque superiores
rami infecti nigrore , aut aliquo
alio colore non naturali , stipites
bifidi , & similiter ut rami , nigri
vel discolores. Hi enim sunt effe-
ctus halituum metallicorum valdè
calidorum & siccorum , qui ne radi-
cibus quidem arborum parcunt ,
sed eas adurant , penitusque infirmas
reddunt ; quâ de causâ vis vento-
rum sæpe extirpat tales arbores ;
Venæ autem sub arboribus laten-
tes , uti calidorum siccorumque ha-
lituum , sic provenientis inde rui-
næ , & eradicationis arborum causa
sunt. Quo igitur loco (inquit A-
gricola *lib. 2. de re metallica*) multæ
arbores

arbores longo quodam ordine dispositæ, alienissimo tempore ammittunt viriditatem, & nigrescunt, aut decolorantur, crebròque ventorum impetu quatiuntur & impelluntur ad casum, ibi subesse venam existimandum est. His alijsque industrijs detectæ venæ metallicæ, si uberes & opulentæ sint, paucorum annorum spatio ærarium Principis considerabili accessione thesauri locupletabunt.

At sunt nonnulli, qui sibi persuadent, rei metallicæ tractationem minùs decere Principis dignitatem, propterea, quòd Ars metallica videatur esse sordida, vel saltem minùs honesta. Ex multis enim privilegijs, quibus meritò fruuntur milites, illud non est postremum, quòd in metallum damnari non possint, nec in opus metalli, *l. moris est, §. sed enim, ff. de pœnis, & l. desertorẽ ff. de re militari*; quasi verò ea pœna usque adeò probrosa sit,

fit, ut in hunc præclarissimum Rei-
publicæ gradum, militiam inquam,
cadere nequeat; quis ergò Artem
metallicam referat in chorum hone-
starum Artium? Adhæc Campso-
res, quos vulgò appellamus, id est,
Trapezitas, Collybistas, Nummula-
rios, Mensarios, aut ut alij vocant,
Argentarios, inter viles personas re-
ponit Jus Civile, *l. si cohortalis, C. de
Cohortalibus. lib. 12.* Idem statuit de
Monetarijs, qui cudunt nummos;
ita ut etiam mulieres nobiles his nu-
bentes, sibi, Liberisque suis decus
nobilitatis amittant, *l. 1. & l. edici-
mus, C. de murilegulis & Monetarijs, lib.
11.* Si ergò viles, qui tractant metal-
la pura, & defœcata, quomodo non
viliores, qui fodiunt illa impura, fœ-
da & fœculenta?

His respondendum est, Arti me-
tallicæ competere plures functiones:
alias quidem primarias, ut contem-
plari naturam & affectiones metal-
lorum,

forum, marmorum, gemmarum,
 lapillorum &c. illisque uti velut
 mysticis signis, ad symbolicam sa-
 pientiam capeffendam, & intelligen-
 da veterum Heroum symbola., per
 certa metalla & gemmas designata,
 iisque incisa; alias secundariæ æsti-
 mationis, ut sumptus facere in me-
 tallicas fossiones, præesse per ratio-
 nes architectonicas fodiendis venis,
 denique succidere nemora., agere
 cuniculos, ducere foveas., colles,
 montesque effodere ad scrutanda,
 erudendaque metalla. His perspe-
 ctis, omnia adversariorum tela pos-
 sunt unico infringi ictu, & qui-
 dem facillimè, si nimirum dicatur,
 Artem metallicam spectatam se-
 cundùm quatuor priores, quas re-
 tuli; functiones, nihil continere
 absurditatis, vel indecentiæ. Si ve-
 rò consideretur juxta postremam
 functionem, posse eam hic quoque,
 adhibitâ distinctione idoneâ, igno-
 minia eximi, nempe sordes agno-
 scendo

Scendo in sedientibus per se ipsos affectu servili, ob quantum mercenarium, negando autem eas in illis, qui per alios id præstant, vel etiam per se ipsos, sed mente herili, ad modicum tempus, & quidem non quæstus, sed animi gratiâ, præsertim ubi id ingenuis permittit consuetudo.

Porro ejus sententiæ, quæ Artis metallicæ honestatem propugnat, acerrimum habeo patronum Agricolam, qui *Lib. 1. de re Metallica* sic ratiocinatur: Cujus Artis quæstus non est injustus, nec sordidus, illam possumus reputare honestam: et metallica non minus quam agricultura (quam honestam esse fatentur sapientes) excluso quæstu sordido & injusto, auget rem honestis rationibus: jure igitur inter honestas reputatur artes. Deinde qui dant operam rei metallicæ, triplicis sunt generis; vel enim sumptus faciunt in metalla; & inter hos numerari possunt Reges, Principes, Res-

Respublicæ, & honestissimi quique
cives; vel sunt Artis metallicæ peri-
ti, seu metallorum Præfecti; atque
hos ingenuos esse, liberos & honestos,
testantur tum Thucydides, nobilis il-
le historiarum scriptor, quem Athe-
nienſes præpoſuerunt Thafiorum
metallis; tum alijs cives, quos hac ar-
te locupletatos in album Nobilium
retulerunt Maximilianus Cæſar,
& Uladislauſ Rex; vel ſunt ipſi
Operarij fodiendo dicati; & ne hi
quidem viles & abjecti ſunt exiſti-
mandi; quippe qui nocturnis æquæ
ac diurnis vigilijs & operibus exerci-
ti, aſuetique tractare ferramenta,
foſſas ducere, agere cuniculos, ma-
chinas fabricare, onera ferre, &c. la-
bores & munera militiæ ſtrenuè
ſuſtinent; Ideoque à rei militaris
peritis non modò Urbanæ, ſed e-
tiam Ruſticæ Plebi præferuntur.
Hactenus Agricola.

Ab alijs principibus ac Rebus-
publicis nonnullis uſurpatur piſca-
tio,

tiō, tanquam honesta & idonea ratio, ingentes divitias comparandi. Testes hujus pronuntiati, præter alios habeo, potissimum Anglos & Hollandos, quibus sola piscatio halecum tam est lucrosa, ut ærario implendo sufficiat. Porro haleces nusquam inventæ sunt, nisi in mari septentrionali. Earum piscatio quondam fiebat in mari Balthico ad Rigam Livoniæ; hinc, sive ob accolarum scelera, sive ob quam aliam causam, certè DEI nutu, in Pomeraniam pisces illi commigrarunt, inde in Gothiam circa vicum Falsterbij; ubi, teste Saxone Grammatico, tanta eorum erat copia, ut manu caperentur; imò sic ijs opplebatur sinus ille, ut ægrè à nautis sulcaretur, ex eo loco in Norwegiam transmigrarunt, ad insulam Malstrand, demùm in Oceanum influxerunt ad Scotiæ partes Boreales, quò jam à sæculis aliquot, Galli, Angli, Belgæ, Dani ad 400. plerùmque naviga-

gia,

gia, piscationis gratia adducunt. Imò
Theodorus Graswinckel in Vindicijs
maris liberi adversus Burgum, bis mil-
 le naves ad piscationem à Belgis
 expediri scribit. Prima instituitur
 ad Orcades Insulas à festo S. Joan-
 nis Baptistæ usque ad mensem Au-
 gustum; Altera circa Gernu à
 medio Septembri. Tertia demùm à
 Festo S. Lucae usque ad Christi nata-
 lem : Caletum inter, & portum,
 quem Gratiae dicunt. Turmatim
 haleces affluunt; eâ serie, ut decem,
 vel duodecim in longitudine, duas
 trêsvè in latitudine leucas occupent:
 tametsi 30. aut 40. orgyas longæ
 sint. Sola halecum piscatio in an-
 nos singulos supra sesqui millio-
 nem auri : cabillavorum haud
 multò secus ; Salmonum binos
 millones ærario Holandico infert:
 Nam è loco, in quo peragitur pi-
 scatio, non modò per Europam
 Universam, verùm etiam in
 remotissimas Orientis & Occi-
 dentis

dentis regiones, imò & in Indias
 ipsas disperguntur; quà militibus
 in castris: quà navigantibus in mari:
 quà civibus in oppidis annonam
 præbentes salitæ: delicias recentes.

Est autem tanti lucri, quòd ex
 captura halecum percipitur, causa
 duplex: copia & bonitas. De co-
 pia Paulus Nencrantzius Rostochi-
 ensis Medicus in *Exercit. medicâ de
 harengo* c. 3. sic scribit: fidem te-
 stor nostrorum piscatorum, hale-
 ces interdum tantâ copiâ subire o-
 stium nostri fluminis, orasque ma-
 ris, ut extra retia (quæ alia post alia
 extenduntur, quò totum agmen pis-
 cium; quòd plus quàm 40. Lastas
 aliquando implet, concludant) ma-
 nu atque urceis à pauperibus extra-
 hi possint. Ne dicam quod omnem fi-
 dem superat, & tamè verum est, Ber-
 gis Norwegieis, greges halecum cu-
 mulatissimos se aliquando in portum
 & vicina littora ac scopulos recipere,
 ut remus immissus stet, maneatq; im-
 mobilis:

mobilis : quòd tum præcipue circa Norwegiam evenire memorant, si gravi tempestate se subducant, aut Balæna eas persequatur, quæ ingentem acervum piscium hiatu absorbet. Et paulò superiùs in principio capitis, halex, inquit, est piscis gregalis, sequiturque maximo numero Ducem suum, præ cæteris corpore decorum. Neque enim ullus grex caret duce, teste Aristotele *lib. 8. histor. animal. cap. 13.* Ducem verò illum si bonâ fortunâ intercepterint piscatores, plerumque tantam retibus concludunt halecum multitudinem, ut retia ingentia non sint illis capiendis, & funes eorum aliquando incidi oportuerit, cum ob inclusam multitudinem extrahi non possent. Ita Neucranzius, qui etiam ex Schöckio *lib. 8. Belg. fœderat. cap. 2.* asserit, plus quàm viginti millia hominum in sola Hollandia ac Selandia harum pecudum arinarum capturâ cæterarumque

rarumque rerum ad piscationem & falsuram pertinentium, ministerio occupari, qui eo labore solo, se suasque familias sustentant.

Atque ut copia halecum est permagna, ita bonitas earundem est admodum exquisita. Illud ausim affirmare (inquit *Neucranti* *citatus cap. 6.*) halecem recens captam, succulentam ac lætam (qualis apud nos Decembri ac Januario observatur) ad generosum truttarum saporem, quæ in gelidissimis alpium torrentibus degunt, & cæteris omnibus piscibus ab Athenæo præferuntur, proximè accedere. Concoctu quoque facilis est, ob carnem tenerrimam, quæ vel à modico calore digeratur. Idem Auctor *cap. 7.* ait halecem electissimæ bonitatis omnes & singulas notas, à medicis, aliisque rerum naturalium peritis (ne dicam deliciarum culinarium arbitris) requisitas, exactè referre; tum quòd carnem habeat extra controversiam teneram, mollem & friabilem; tum

D

quòd

quòd sit sapore ad gustum suavissimo;
 tum quòd pinnis squamisque prædita
 sit, quas medici in laudatissimis pisci-
 bus requirunt; tum quòd ventricu-
 lum non oneret, facileque digeratur,
 & brevi tempore per alvum descen-
 dat: ut proinde etiam otiosis, seni-
 bus, imbecilibus, ægrotis, & con-
 valescentibus in cibum tuò offerri
 possit, tum denique, quòd alij pisces
 butyrum, oleum, aromata pretiosa
 aliæque condimenta, quibus gustui
 se commendent, requirant: halex
 verò solâ ingentâ bonitate placeat, si-
 ve elixa, sive assa, sive salita: sive pas-
 sa, sine aliorum saporum condimen-
 to, quod nolentes ad edendum invi-
 tare possit, dummodo recens sit, ne-
 que fœturâ, & præviâ in venerem so-
 lutione contabuerit. Venus enim, ut
 in aliis animalibus, ita & in piscibus
 luxuriantem illum per totum corpus
 suavissimum succum absomit, car-
 nẽmque flaccidam & exsuccam red-
 dit. Concludit demum Neucranti-
 us
 suam

suam de halece opinionem his verbis encomiasticis: Contulisse in haren-
gum, siue halecem, cunctas dotes na-
tura videri potest, quas alijs piscibus
figillatim concessit: ut tot rationum
solidis fundamentis gloriâ generosissi-
mi piscis assertâ & vindicatâ, princi-
pem inter pisces locum is merito sum-
môque jure teneat, ac dudum coro-
nari meruerit.

Alios Principes locupletat Provin-
ciarum & urbium, quibus imperant,
populositas; ab hac enim numerus
Capitum contribuentium, ab isto
ærarium augetur. Ex hoc fonte tot
rivi aurei thesaurorum Gallicorum
promanant. Gallia populentissima,
eadem & opulentissima est. Lu-
dovicus XI. Rex Galliæ, teste
Budæo *de Asse lib. 4.* dicere sole-
bant, pratum se & graminolum, &
latè patens habere, quôdque toti-
es fieret restibile, quoties fœnise-
cæ videretur opus esse. Franciscus
I. dictitabat se chrysomallas oves,

aureo vellere opimas, latifundiis suis
 pascere, toties attonfiles, quoties Pa-
 stori videretur, lanâ interim succres-
 cente perenniter, ac mirâ fœcundita-
 te tonsuræ damnum reparante. His
 loquendi modis Reges illi declara-
 bant opulentiam regni sui: quæ tamen
 pro diversitate temporum diversa &
 inæqualis, imò aliquando nulla fuit,
 teste Polydoro Virgilio *histor. Anglic.*
lib. 26. Quando videlicet Aurelianen-
 sium & Burgundinum factiones,
 Anglos in Galliam attraxêre, qui sæ-
 pius prælio victores, Francorum Re-
 giam, júsque Regni ad se transtulêre:
 & Rex Joannes ab illis captus, liber-
 tatem suam tribus librarum Turonen-
 sium millionibus redimere, & quid-
 quid in Aquitania possidebat, aliás-
 que multas civitates & arces tradere
 coactus fuit: ad eam egestatem reda-
 cto Regno, ut monetâ coriaceâ, ar-
 genteo clavo infixio, per aliquot an-
 nos uteretur. Magis prosperæ res
 Gallorum erant tempore Caroli VII.
 qui,

qui, ut testatur Cominæus, duos Francorum miliones annuos è Regni sui vestigalibus colligebat. Ludovicus XI. ad quinque miliones proximè accessit. Henricus IV. Avus Moderni Regis, triennio antequam interficeretur, unum & triginta miliones exegit. Ludovicus XIII. Henrici filius, ut à Jo. Francisco Biondo scriptum invenio in *proœmio Historia Anglica*, quinque & quadraginta millionum receptione quotannis ditescibat. Et ante annos non multos fama percrebuit, ad bella diversis mundi partibus inferenda, octoginta librarum Turonensium miliones ærario Regis fuisse illatos. Tanta vis opum populositati, seu frequentie populi Gallicani (licet non soli) à Gallis tribuitur. Sunt, qui sibi persuadeant, tres hominum miliones solam Lutetiam incolere; cujus urbis magnitudinem cognoscere licet ex hodiernis suburbiorum Parisiensium ruinis, quæ, teste Cornelio à Lapide in *Jonam Prophetam*

phetam cap. 3. octo leucarum ambitum superant. Neque minor est civium opulentia, quàm populi frequentia: & utraque certat cum urbis magnitudine. Nemini ignotum est (inquit Gramondus in *hist. Gall. lib. 2.*) Europæarum Urbium Lutetiam esse facile Principem: non alia nomine major, non ambitu; seu populus, seu urbē componunt immensa spatia, Regijs ædificijs distincta, crescit, & augetur in dies plus æquo urbs impatiens sui, adeo ut periculum sit, ne mole ruat suâ, aut in ruinam agat aliquando, quam spoliat, Galliam. Non alibi urbs opulentior; seu opulentiam incrustatum parietibus aurum, & marmora omnis generis, seu faciunt cives in regiam amplitudinem aucti. Illic præcipuo in cultu supellex curiosa; illic auri copia ingens facti, infecti: memorant, qui apprimè norunt urbem, auri in Hispaniâ cusi plus haberi Lutetiæ, quàm in tota Hispania. Quid gazam, quid gem-

gemmas, quid pretiosa peristroniata memorem, auro distincta & serico? optimè quis dixerit, Lutetiam magis orbem esse, quàm urbem, adeo effundit se Orbis Universus illustrandæ, ornandæ. Hæc Gramondus.

Quid dicam de Belgio Orbis gemmâ, Europæ ornameto? Carolus Scribanus in Politico Christiano illud alloquens, eximiam ejus opulentiam his verbis describit: Urbium elegantia, nitore, divite & concinnâ suppellectile, roboréque & numero, quidquid ubique Regnorum est, vincis. Plures sanè ambitu non magno tuo urbes complecteris magnas, locuplete undique populo infestas, quàm quâ latissimè patent Italia & Gallia simul, Anglia, Scotia, Hispania, &c. Quid, quòd Principi tuo annuè eas pendere opes possis, quibus nullum Europæorum Regnorum majores; ut è te solo annis singulis, octo facilè auri milliones sperare Princeps possit,

& Classẽ etiam quingentarum bellicarum navium, non magno molimine suppeditabis; nec destitues interim ratibus maria, non flumina &c. Jam quanta sit populi Belgici numerositas & frequentia, ex multitudine urbium rectè colligit post Guicciardinum Majolus in *Canicul. Coll.* 17. qui miratur, in Hannoniâ 20. milliaribus longâ, sexdecim latâ, numerari oppida 24. villulas autem, seu pagos, turri campanariâ, sive templo munitos, bis mille ducentos. At verò mirabilius est, quod Montanus refert in descriptione Belgij: Groningam eo loco positam esse, unde unius diei itinere pedibus pervenire queas ad quodcunque libuerit ex quinquaginta, ut minimum, oppidis, Trajectum undique circumstantibus. Trajecto verò manè egressus ad quodvis è prædictis oppidis, etiam lentè inambulans, potes pervenire, ibi genio indulgere, & vespere domi ad cœnam adesse.

Non

Non defunt Principes, qui per mercaturam sibi viam sternant ad ingentes divitias. Vespasianus & Pertinax Imperatores negotiationem palam exercuerunt, testibus Suetonio & Julio Capitolino. Alphonsus Atestinus Dux Ferrariensis, falsamentorum & pomorum omnis generis, atque olerum monopolia per Institores suos instituebat. Nam fructus (inquit Jovius in vita hujus Principis) ex amplissimis ipsius hortis collecti, expositique venales, non toti modo aulae, verum etiam urbanae multitudini expetitam moderati pretij copiam suppeditabant. Aggeres namque universos intra pomeria per declivia planaue, uti locus posceret, frugiferis arboribus & inflexis vinetis digestisq; areolis perpetua viriditate vestiverat: quae omnia diligenti cultura, & perenni irrigatione ad id lata, & navigabili fossa ex Pado perducta, admiram ubertatem omnium terrarum nascentium, & peramoenae deambu-

lationis voluptatem instituta, clari
hospites mirarentur. Laurentius Me-
dices Reipub. Florentinæ Princeps,
mercaturam, quamdiu per publica
negotia licuit (quod ex eo tanquam
caput & robur, & nervi omnes in
Rempublicam deducerentur, & ma-
gno præterea præsidio esset ad dome-
sticam potentiam tuendam) diligen-
ter exercuit. *Brutus lib. 8. histor. Flor.*
Henricus Dux Brunsvicensis Anno
1473. nullo masculino herede relicto o-
bit, cum opes comparasset maximas
ex ovibus, Patribus veteris testamen-
ti, ut pietatis, sic pastoritæ vitæ stu-
dio similis. *Crantz. lib. 12. Saxonia. c. 11.*

Unde sentio cum Tiraquello, *de*
Nobilit. c. 33. & Casparo Klock *tract.*
de arario lib. 2. cap. 25. mercaturam,
sive maritimam, sive terrestrem, nihil
derogare nobilitati, ubi usus obtinuit,
præsertim si negotiatio instituaturs per
aliam; præstat enim Nobilitatem ne-
gotiari, quàm prædari. Temporibus
Henricorum Imperatorum (inquit
cita-

citatus *Klockius num. 28.*) magna pars Nobilitatis Germanicæ ad latrocinia & rapinas versa erat, ut historia, & adhuc diruta Castella edocent. Causa tanti mali erat, nobilibus vel interdicta, vel probro data negotiatio; sicut & nunc multi ex nobilitate malunt egere, quàm negotiationi operam dare. Cùm tamen Hispaniæ Italiæque magnates, quemadmodum & Belgici, commercia magno studio exerceant: idque æmulatione Emporiorum, in quibus habitant; nam se contentos esse vident, si penès se tantum genus, penès alios verò res sit. Est itaque & necessaria, & utilis, quia magnorum opum procreatrix, mercatura. Quod exemplo suo nos docent opulentissima Emporia, Venetiæ, Amsterodamum, atque etiam (præsertim antequam Batavi inclarescerent) Antuerpia, de cujus urbis celeberrima negotiatione scribit *Carolus Scribanus in sua Antuerpia*, Patrum memoriâ solitū fuisse videri in ejus portu

bis mille & 500. naves ex omnibus orbis Regionibus consistere: quarum pleræque duas, tresve hebdomadas in anchoris, antequam ad urbem appellerent merces exoneratæ, hæ-
rere cogebantur: neque ullus effluebat dies, quo non quingentæ minimum quâ appellerent, quâ solverent mercibus onustæ. Jam verò si de curribus agatur, quotidie plus quàm ducenti hominibus duntaxat vehendis, itineri se committebant; præter currus mercibus plenos, & carrucas rusticorum, annonam urbi advehentes, qui numerum propè omnem excedebant; adde quingentas rhedas, luxui ac voluptati civium subservientes.

Tandem etiam nonnulli Principes per prudentem pecuniæ, in territorio proprio conservationem, ærario suo consulunt. Quod argumentum bene pertractans Theodorus Sprengerus in libello, cui titulus, *Bonus Princeps*, suadet Principi,

ut

ut Exteros magis, quàm subditos portorio oneret : illudquè maximè provideat, ut plura exportentur, quàm invehantur ; per invectionem enim exterorum pecunia exportatur è regno, per exportationem verò subditi ditescunt. Quòd si invec̃tis carere nequeant, laborandum est, ut subditi necessaria ab Exteris apportent, solvantque permutatione aliarum mercium. Novissimè Angli sanxerunt, ne quid invehatur, aut exportetur nisi per Anglos. In Moscoviâ Princeps severè prohibet, ne aliquid pecuniâ ab Extero comparetur, sed solummodò permutteretur, ne pecunia ex regno evadat, inquit Sprengerus ex Mercurio Gallico. Simili ratione statuto speciali in Anglia cuivis peregrinanti præcipitur, ne plus pecuniæ, quàm ad itineris necessitatem requiratur, è regno exportet.

Nec ferendum est, materiam rudem è regno exportari ; quapropter opifices alliciendi sunt, qui eam com-

modè tractare possint. *Bodin. de Rep.*
c. 2. Hoc probè intellexerunt Poloni,
 qui cùm Henricum III. ex Francia e-
 vocatum in Regem eligerent, ab illo,
 ut quosdam Artifices ex Gallia in Po-
 loniam secum adduceret, postula-
 runt. Unde etiam Henricus IV.
 Rex Franciæ, cùm maximam pecu-
 niæ summam ex Regno, pro compa-
 randis alibi sericis exportari videret,
 multos, qui rem sericeam intellige-
 rent, ex Italia in quasdam regni sui
 provincias evocari jussit, quo modo
 non solùm pecuniæ, ut in regno ma-
 neret, compedes iniecit, verùm e-
 tiam innumerabili lucro Reipubli-
 cam auxit, testante Klockio *l. 2. Aph.*
Pol. c. 10. Hinc etiam suadent Po-
 litici, ut Princeps ab informi, rudi-
 que materiâ, quæ à peregrinis adve-
 hitur, amoveat, aut, quantum fieri
 potest, minuat portorium. Cives
 enim ex rudi materia in opificio con-
 formata, sæpe majorem capiunt uti-
 litatem, quàm qui materiam vendi-
 derunt.

derunt. E contrario augeatur vetigal omne opificiorum, quæ aliunde advehuntur, ut ipsi cives ea facere addiscant. *Bodin. Cit.* Quapropter Henricus II. publico edicto vetuit rudem materiam ex Regno Galliæ exportari: quem paulò post Angli Hollandique fuerunt imitati. Nam rudi materiâ emigrante, ipsi etiam Artifices emigrant. *Boterus de Illust. stat. lib. 8. c. 8.* Quid aliud Venetias, Florentiam, Genuam, præcipuèque Mediolanum auxit, quam opificiorum utilitas? *Hippol. à Coll. de incr. Urb. c. 15.* Quibus urbibus non immeritò addiderim, tum Coloniam Agrippinam, quam omnis generis artifices, & quidem magno numero incolunt; sic, ut vicini Principes ab iis arma bellica, reliquaque ad Exercitum necessaria abunde sibi comparare possint; tum præcipuè Norimbergam, quæ reliquas omnes Christiani orbis civitates varietate operum, Artificumque superat.

Ur

Ut penè dixerim, Artem ipsam omnes
Industriæ suæ venas in eam infudisse;
quamvis ei in plerisque non cedat Au-
gusta Vindelicorum.

Exposui hæcenus varios modos,
quibus Principes laudabiliter, & citra
noxam ingentes opes accumulare pos-
sint. Sed contra postremum de Mer-
catura, insurgunt nonnulli allegatione
Jurium, negotiationem Nobilitatis
improbantium. Nam *L. Nobiliores*,
C. de commerciis & Mercatoribus, pro-
hibentur ii, qui natalibus nobiles &
honorum luce conspicui sunt, merci-
monia exercere. Unde *L. humilem*,
C. de incestis, & inutilibus nuptiis, inter
humiles & abjectas personas ea nume-
ratur, quæ mercimoniis publicis præ-
fuit. Et *L. ne quis, C. de dignitatibus*,
l. 12. Negotiatores dignitatem asse-
qui prohibentur, & à jam obtentâ re-
pelluntur: neque sanè immeritò, quòd
res sordidissimas tractent, idque mo-
dis sordidissimis, mentiendo videlicet,
& pejerando, furando & decipiendo.

Con-

Consentit Aristoteles, qui cùm *lib. 3. Polit. c. 3. & lib. 6. c. 7.* scribat fuisse legem apud Thebanos, ut nemo esset idoneus ad suscipiendos Reipublicæ honores, qui per 10. Annos à Mercatura non destitisset, *lib. 7. c. 9.* manifestum est, inquit, in civitate, quæ optimè gubernetur, neque artifices, neque mercatores cives esse oportere; vilis est enim hujusmodi vita, & virtuti adversa.

Sed hæc omnia nequaquam obstare censenda sunt, si Principum, Nobiliumque negotiationes aut necessitas cogens, aut utilitas boni publici alliciens cohonestet: præsertim si accedat consuetudo, & absint, quæ frequenter à plebeis & vilibus personis mercaturam minutim tractantibus, abesse non solent, indignitates ac sordes: quibus nonnunquam viri etiam illustres foedissimè commaculantur.

Ego sanè in ea versor opinione, ut existinem, multò laudabiliùs acturos Principes, si rem suam augeant aliquo hono-

honesto genere mercaturæ, per inter-
 medias personas exercitæ, quàm do-
 lis, fraudibus, rapinis, injustis confi-
 scationibus, aliisque similibus praxi-
 bus Macchavellicis, ab integritate
 conscientiæ, & genuinæ politicæ di-
 ctaminibus omnino alienis, aut eti-
 am honestati atque decoro (quod
 Principes dextro oculo nunquam non
 intueri decet) repugnantibus. Quo
 in genere non leviter aliquando pec-
 catur à viris magnâ dignitate fulgen-
 tibus. Inter quos Ludovicus Sfor-
 tia Dux Mediolanensis, dum latifun-
 dium ad eximiam fertilitatem magno
 studio conderet, quod de nomine
 suæ gentis, Sfortiadam appellavit, vi-
 cina prædia impotenter ab invitis do-
 minis coëmendo, ipsis Sfortiadæ fi-
 nibus inclusit, corrivatisque priva-
 torum civium aquis, ut sua plenius
 irrigaret, alienos agros solito humore
 destitutos, penitus infæcundos reddi-
 dit. *Jovius lib. 2. histor.*

Antonius Leva Ducatûs Medio-
 lanen-

lanensis pro Carolo V. Gubernator ,
 à Gallis , Venetis , & Sfortianis in
 magnas rei nummariaè difficultates
 redactus , ut militi necessaria , perso-
 luto stipendio , præstaret , vectigal
 excogitavit Mediolani , quo omnium
 pecunias abraderet , & singularum
 familiarum fortunas everteret. Se-
 vero namque edicto vir imperiosus
 & sævus , à quoquam cive panes pin-
 si vetuerat , cùm venalis tantùm e-
 deretur , constitutis ejus monopolii
 tabernis , unde esurientes magno præ-
 tio panem coëmerunt , tantâ edicti
 atrocitate , ut plerique inopes laquei
 metu , fame passim interirent. Mo-
 lendi utique tritici , percoquendi-
 que panis vetantes leges , pavidum
 vulgus perhorrebat ; ita ut Antonius
 clarissimam paulò antè , atque opu-
 lentissimam Italiae Civitatem , im-
 portato ingenti luctu , longè om-
 nium miserrimam redderet. Tantâ
 scilicet acerbitate atque sævitiâ crude-
 lissimæ legis auctoritatem tuebatur ,
 ut

ut vel ab egentibus mulierculis, quæ desiderio panis subcinericias confecissent offulas, & in sartagine placentas oleo suffrixissent, contusq; in pila tritico farinam expressissent, prægraves pœnas exigeret: sic, ut non infacetè, quanquam amarissimè, M. Antonius Canicula, quæstorii ordinis civis, in corona diceret, peramplam, uti reor, Antonius Leva à Cæsare gratiam referet, quando ei supra tot clara cognomina summæ Majestatis, novæ nobilitatis gratiâ, Furnarii titulum adjece-
rit. Nam & tabernæ furnariæ, & venales panes, Cæsareæ Aquilæ notâ signati, vulgò Imperiales vocabantur.
Jovius lib. 26. histor.

His addo, quod Guagninus in *descriptione Moscoviæ cap. 4.* recenset, de Joanne Basiliade Magno Duce Moscoviæ. In Principis thelauro, inquit, vestes plurimæ elegantes ad id erant repositæ, ut cùm triumphus celebrandus, aut legatus alicujus Principis excipiendus esset, singulis Aulicis ad

tempus accommodarentur. Cateri quoque Nobiles ad convivium amicorum, vel ad nuptias profecturi, aut Divorum festa celebraturi, de Magni Ducis vestiario, certo pretio, secundum temporis spatium, vestes accipiebant, easdemque cum usura thesaurario restituebant. Quod si aliquantulum vestis commaculata fuisset, pecuniam pro ea numerare cogebantur, verberibusque insuper multabantur. Quin etiam ad Regem Poloniae, vel ad alios externos Principes missurus Oratores Magnus Dux, Ipsi, & omnibus Nobilibus eos comitantibus, vestes & arma, atque id genus ornamenta ex thesauro suo, sed non sine lucto & usura, commodare solebat.

Sed relictis hisce minus decoris, minusque dignitatem Principis decentibus divitias comparandi modis; ad alios laudabiliores, eosque multiplices, me converto: quos in prudentia Oeconomica laudatissimi, æternæque

Neque memoriâ dignissimi Episcopi ac
Principis Paderbornensis Theodori à
Fürstenberg adumbravit P. Jacob. Ma-
senius in *Auro Sapientum ante quæst.* 1.

Ad sat tenuem, longisque calami-
tatibus exhaustum Episcopatum pro-
motus Theodorus, anno superioris
ætatis 1585. brevi illum non tan-
tùm ære liberavit alieno, sed etiam
ditavit proprio, tantâ felicitate ac
solertiâ, tanto rerum temporumque
compendio, ut admirationi exteris,
subditis & venerationi & amorì ef-
fet. Neque enim usitatis quorun-
dam institit artibus, per quas ipsi
obluctante solo poloque ad opum
incrementa connituntur; sed iis, quas
non improbarec cælum, approbarec
mundus, ad summam contendit o-
pulentiam. Quâ deinde pauperes,
religionem, Ecclesiam, universam-
que patriam recreavit, hostes ter-
ruit, suisque dimovit à finibus, fide-
les amicos solatus est, artium scientia-
rumq; proculcatum honorem excita-
vit,

vit, jacentem pietatis erexit auxitque cultum, pacem & quietem subditis, decus sibi suisq; æterni nominis comparavit.

Prima ratio (inquit Masenius) ac fundamentum affluentis opulentiæ Celsissimi viri fuit, singularis in DEUM fontem autoremque omnium fiducia; qui æternis providentiæ suæ legibus statuit, nunquam sibi fidentem destituere. Legerit utique illam in Regio Psalte promissionem: *Spera in Domino, & fac bonitatem: & inhabita terram, & pascēris in divitiis ejus.* Sed nec Christum hujus promissi fidejussorem fallere posse existimavit, dum inquit: *Quærite primum regnum Dei, & cætera omnia adjicientur vobis.* Quocirca adeo felicem diœcesis Paderbornensis, multis difficultatibus pressæ, & alieno ære gravatæ, curam suscepit; ut postquam disciplinæ Ecclesiasticæ pro viribus consulisset, onus ingens debitorum brevi tempore,

re, idque ex redditibus Episcopalibus
 levari. Quod etiamnum repertæ ra-
 tiones testantur, quibus 79893. &
 3 $\frac{2}{1}$. imperialium dalerorum expunxit,
 subditosque ære suo in libertatem
 vendicavit.

Neque satis sibi hac patriæ oppres-
 sæ redemptione fecisse est visus; sed
 insuper ad hoc omni solertiâ incubuit,
 ut eandem, quantum posset, in sacris
 juxta profanisque locupletaret. Quo-
 circa de Universitate studiorum illic
 ad totius patriæ ac religionis emolu-
 mentum excitandâ sollicitus, egregio
 illud, quâ opere, quâ liberalitate, ad
 immortalis famæ memoriam, & Für-
 stenbergicæ Familiæ gloriam est asse-
 cutus: quando erectis apertisq; Scho-
 lis publicis, in quibus præter scientias
 humaniores, Philosophicæ quoque ac
 Theologicæ prælegerentur, æterno
 Diœcesin in suam vicinâsque regio-
 nes beneficio sibi devinxit.

Ad devotionem erga venerabile Sa-
 cramen-

eramentum, divinique hujus cultus honorem amplificandum, tria & viginti imperialium dalerorum impendit millia: quorum proventus annuos in præsentium per octavam illius solennitatis Canonorum usus convertit. Nec Deiparæ Virginis impensius colendæ immemor, ad illius venerationem promovendam, supra duodecim imperialium millia insumpsit.

Porro memor Theodorus, se cum pede Episcopali sociasse virgam populi moderatricem; seque non modò Antistitem in sacris, sed etiam Præsidem in Politicis esse; magnis auri argentique impensis huic quoque Reipublicæ parti prospexit. Inter alia, duas viro Principe dignas, & secuturis post se eadem in dignitate Principibus servituras arces construxit, *Neuhausium & Wevelsburgum*. Plura alia per diœcesin ædificia, vel ex ruderibus ad egregiam novitatem excitavit, vel ex funda-

E men-

mentis in visendas fabricas eduxit.

Altera ratio, quâ hic illustrissimi nominis Princeps ad ingentes opes ab inopia emerfit, domestica sobrietas fuit & parsimonia. Nihil ille, quod talem deceret Episcopum Principemque, sibi deesse sordidè passus est: at idem delicias apparatusque nimium semper est averfatus; ne qui aliis temperantiæ moderationisque leges daturus esset, ipse eas aut ignorasse, aut neglexisse videretur. Illa Aulicæ superbix & profusionis alimenta, quæ profanorum magis, quàm Ecclesiasticorum Principum referrent indolem, magnisque solum impensis, nullo Principum emolumento sustinentur, procul submovebat. Frugalis illi vita, & ad modestiam, disciplinamque eac gravitatem Episcopo dignam comparata erat, quæ cum effusis prodigè divitiis, nullum vitiis nutrimentum supeditaret. Unde luxum inuilemque ad superflua profusionem
ferre

ferre non poterat, ex qua præsentem opum virtutisque jacturam emanare cerneret. Magnum ille Principem insigni nobilitate stipatum, domi hospitem aliquando exceperat. Cumque illi, qui ex comitatu aderant, post mensam ambulatorijs sese vitris ad potum largiùs invitarent, non nemo bibendi impar, ut respondere ex æquo videretur, reliquias libati ex poculo vini per fenestram, cui innitebatur, effundebat. Quod cum Princeps Theodorus animadvertisset, misit ex ministris, qui significaret, sibi quidem tantum domi vini esse, quantum ad Convivarum ventres exsaturandos, non verò quantum ad arcis fossas replendas sufficiat: huic proinde labori parceret. Noluit igitur in helluonum tabernam Episcopalem aulam commutari.

Tertia ratio erat Ministrorum probitas, & fidelitas Consiliariorum. Primum quidem in felici Aula est Princeps sapiens: sed proximum est, virorum sapientum niti consiliis & auxiliis.

*Omnia regna, civitates, nationes, usque
 eò prosperum imperium habuerunt, dum
 apud eos prospera consilia valuere. Salu-
 stius de Republ. ordinanda. Optima
 autem consilia apud probos, integræ-
 que vitæ homines reposita sunt. Si-
 quidem ceteri plerique consilia Prin-
 cipum ex privata utilitatis momentis
 ponderant, atque ad illa persuadenda
 ingeniosi sunt, quibus res suas potiùs,
 quàm Principis auctum iri prospici-
 unt. Unde Jethro focer Moyſis, Ge-
 nero suo, Israëlítico jam populo cum
 summa authoritate præposito, hoc de-
 dit consilium: *Provide tibi de omni plebe
 viros sapientes & timentes Deum, in qui-
 bus si veritas, & qui oderint avaritiam,
 & constitue ex ijs qui judicent populum.*
 Exodi 18. In horum delectu perspi-
 cacissimus erat Theodoricus Princeps.
 Noverat, quibus suam ipse consci-
 tiam & occulta crederet; quos in
 consilium viros jam ætate, experien-
 tiâ, doctrinâ ac virtute probatos adhi-
 beret; qui ærarij rationes, censusque
 tribu-*

tributarios & exciperent & dispensarent. His alterum ita commodabat oculum; ut neque illorum libertati totum indulgere, neque prudentiæ, integritati que prorsus videretur diffidere. Quâ ratione factum est, ut neque per injuriam facilè pecunia à subditis extorta sit, neque per incuriam neglecta.

Et verò non tam multis, quàm fidelibus sibi ministris utendum censuit. Comitatus ejus non ad longam magnificamque instructus erat pompam; cum innocentiam amorémque subditorum firmissimam esse corporis custodiam sentiret: censeretque id omne quod in Aula luxum superfluum impenditur, gravioribus patriæ Ecclesiæque commodis subtrahi. Quæ res quantum opibus viribusque in omnem necessitatem promptis, adjecerit, illi Principes docere nos possunt, qui, cum ista Aula nimium splenderent, in ærario sunt extenuati: majori non rarò apud sapientes in

despectu, quàm apud desipientes in honore.

Quarta ratio erat profligatotum hominum castigatio, eorùmque qui Rempublicam hæresi factiosorum hominum turbant, tempestiva submotio. Pacis quidem ille erat amantissimus, pacisq̃ue artibus opes potissimùm cumulari, bello exhauriri non ignorabat. Verùm cum sensim per irrepentem hæresin subditos ad rebellionem armari comperisset, belli æqui rationes præ iniqua pace amplecti maluit. Unde hoc illi familiare distichon :

*Arma procul jaceant, tamen est fas
sumere bellum.*

*Quando aliter pacis non licet arte
frui.*

Brevi igitur opum dispendio, magnam rursus ad res augendas fecit compendium: armis repentè adversus turbulentos patriæ cives, & infidiosas Vicinorum machinationes correptis. Neque difficile erat Principi habere militem, cui locuples erat

ara-


ararium. Unde bello celeriter confecto, rebelles in obsequio subditos, vicinos insidiatores in timore continuit, suamque, compositâ rursus diœcesi, ex solito reddituum proventu messera collegit.

Quinta ratio erat amor insignis in Principe erga subditos, quorum se totum commodis usibusque impendebat; nec tam sibi thesaurizabat, quàm suis: ut pulcherrimo amoris lusu, non alio colligere opes fine videretur, quàm ut ipse domi abstinens, in patriæ denuo emolumentum collecta profunderet; quæque exigua, minutimque divisa ex Angulis collegisset beneficia, hæc ingenti aliquo præclaroque opere, in Reipublicæ Ecclesiæque commodum rependeret. Quâ animi benevolentia id assecutus est, ut non minori subditorum amore coleretur. Hinc magna ex utraque parte in alteram ad augendas fortunas omnes profluxit utilitas.

Sexta ratio est liberalitas in pauperes & singularis eleemosynarum cura. Nullâ enim aliâ profusione, quàm istâ, cumulatiùs, majorique cum fenore quod erogatum est, rependitur. Ipse Princeps luculentissimum hujus rei experimentum se habuisse, hisce verbis frequenter testatus, est: *Nulla mihi pecunia uberiores in censu proveniunt attulit, quàm quæ in manibus pauperum fuit collocata.* Quocirca ejus rei singularem gessit curam; ita ut lux mensæ cibos inferri vetuerit, priusquam denis hominibus, secretiorem domi lux penuriam sustinentibus, diurna ex alimento sustentatio delata esset. Duodecim quoque alijs simili penuriâ pressis annuâ fundatione provisum erat; quos sacro missæ officio quotidie interesse voluit, Deûmque pro totius patriæ bono obtestari. Præter hos, ingens quotidie pauperum turba aulam Principis obsidebat, quæ honestam ex ea stipem semper referebat. Intererea illud Sedulij in

oper. 4. *Pasch.* verum esse Princeps didicit: *Pecunia*, quæ sub vilissima etiam pauperis forma, Christo probatur impensa, detrimentis augetur, spargendo servatur, perit, ut maneat.

Hiscæ mediis industrius Princeps eas opes consecutus est; ut cujus divitias nemo ante noverat, cujus vires ad pacem bellumque despiceret, is subito formidandus hostibus, amicis esset exoptandus.



CAPIT XIII.

Quod annonæ provvisio ad officium Principis pertineat.

PARS magni boni regiminis est annonæ provvisio.


Italorum adagium est: *Panis in foro, iustitia in tribunali, securitas ubique, sunt signa boni Imperij.*

Cosmus Medices Pater patriæ dictus, cum quendam ad capeffendum Bononiensem Principatum dimitte-

E s ret,

ret, inter alia Reipublicæ administranda præcepta, tria hæc præcipuè dedisse dicitur: *Annona curam sedulò ageret, omnibus nullo discrimine ius diceret, ab alienis Uxoribus abstineret.*

Christiernus Rex Daniæ dicere, solebat: *Regnum est navis, cujus remus est panis.* Idem Rex in suis gentiliis insignibus habuit cymbam cum remo, in cujus manubrio erat depictus panis, cum inscriptione: *Et pangit, & frangit*: pangit nimirum amicitias, frangit hostes.



CAPIT. XIV.

Quod Princeps debeat favorem Commertiis impendere.

Qui Reipublicæ præest, mercaturam promoveri & favore prosequi debet (inquit Perezus in *Jure Publico*) quia ex vectigalibus mercium evectarum & invectarum augetur ærarium, populus ditescit, ac sine tædio

dio tributa imposita solvit. Optimè
 id norunt Batavi, qui intra breves sua-
 rû provinciarû terminos solis merci-
 bus & maritimis opibus validissimos
 alere possunt exercitus. Galli quoque
 nec auri nec argenti fodinas habent,
 mercimoniis tamen, aliisque reculis
 affabrè & ingeniosè confectis divitias
 congerunt. Hispani verò, qui in-
 genti cum labore & periculo ex remo-
 tissimis orbis partibus adamantes, u-
 niones, aromata, multosque alios
 thesauros advehunt, eos nugis abje-
 ctisque mercibus commutant, & se
 depauperant. Aurum & argentum
 Genuensibus mittunt, & insuper
 plurima eis solvunt cambia. In alias
 Provincias lanam, sericum, ferrum
 mittunt, & opera inde ab exteris
 confecta in Hispaniam remissa caris-
 simè emunt, ob vecturæ sumptus
 & artificium. Alendi potius arti-
 fices sunt & præmio invitandi, qui ex
 mercibus ibi natis necessaria confi-
 ciant: sic pecuniæ è Regnis non effe-

rentur, sed aliunde inferentur, aut alijs mercibus necessarijs commutabuntur, non ijs quæ ad luxum & pompam sint: de quibus queritur Tiberius apud Tacitum lib. 3. annal. *Lapidum causâ pecunia nostrâ ad externas aut hostiles gentes transferuntur.*



CAPUT XV.

Æs alienum vel non contrahendum à Principe, vel mature dissolvendum.


ÆS alienum sit à Principe alienum; est enim phthisis Reipublicæ.

Sapienter Bodinus lib. 6. *de Republica* c. 6. Nihil, inquit, in Republica perniciosius, quàm Principem multa conflare debita; quoniam alterutrum necesse est: aut ærarium diruere, ac publicas opes evertere, si usuræ dissolvantur: aut turpiter fidem fallere, ac privatorum bona diripere.

Unde

Unde illud prudentissimum Serenissimi Maximiliani gl. mem. Electoris Bavariæ monitum ad filium : A faciendis , inquit , æris alieni nominibus , quoad ejus fieri potest , diligenter abstine : & si rebus necessariis facta fuerint , primo quoque tempore cura , ut epungantur , aut saltem id age , ne in iis dissolvendis remissus , nedum infidus videaris. Hoc tibi sit pro comperto , scænus sensim sine sensu debitoris facultates excedere : & nisi , cùm dies venerit , repræsentetur , continuò vorare instar terebinis : & , quod turpius est , moras & impotentiam , vel saltem negligentem iniquitatem exprobrare , non sine tacito convitio. Frustra solutionem in successiorem reicis , si ipse , quod contraxisti , debitum , solvere neglexeris ; proclive enim est , ut ille te in non solvendo imitetur.

Hactenus Elector Maximil.



CAPUT XVI.

Quòd Tributorum moderatio deceat Principem.

TRibuta sunt omnino Reipublicæ necessaria. Nam neque quies sine armis, neque arma sine stipendiis, neque stipendia sine tributis haberi possunt.

Ad tributa duo requiruntur: necessitas Principis, & fidelitas subditorum. Illa *præcurrere*, hæc *concurrere* debet.

Principem in exigendis tributis non oportet ita esse rigidum, ut non submittat se necessitati temporum, & afflictæ subditorum fortunæ.

Væ Principibus illis, qui miserriam plebem faciunt tributariam suæ libidinis, quæ debuerat esse necessitatis.

Malè inter suos audivit Darius, propter nimiam exactionem tributorum.

rum. Unde Persæ dicere solebant, Darium fuisse *Mercatorem*, Camby- sen *Dominum*, Cyrum *Patrem*. Quia Darius ubique lucrum spectabat, Camby- ses asper erat & morosus, Cy- rus verò mitis & subditorum amans.

Ut liquor ille, qui ex arbuscula myrrhæ radio solis exprimitur, nobi- lior est eo, qui ferro extorquetur; sic ea populorum tributa sunt laudatissi- ma, quæ civium amor elicit, non quæ vis terrôrque cogit.

Illa tributa sine dolore penduntur à subditis, quæ non sine dolore im- ponuntur à Principe.

Joannes Primus Castellæ Rex ve- ste lugubri toties induebatur, quoti- es tributum à subditis exigendum erat.

Rosinus.

Nunc alius rerum est status. Hodie non tam Principes, quàm subditi lu- gent, dum tributa sine moderamine imponuntur, & non sine acerbâ Ex- actorum violentia extorquentur. Un- de molestiùs dominantis avaritiam ferunt,

ferunt subditi, quàm ipsam servitutum : prout accidit superiori sæculo in Provinciis Belgicis ; quando Dux Albanus decimam rerum omnium tributi nomine exegit : secutâ inde turbatione ingenti, quam gravia excipere incommoda. Tributum, quod subditis grave est, exigentibus subinde multò gravius est.

Ante annos non multos, cùm Magistratus Argentinae, suadente quodam, vectigal pontis augere constituisset ; idque populo significatum esset, is qui consilii hujus auctor fuerat, ut vitam servaret, officio, quoungebatur, sese abdicans, urbem deserere coactus est.

In Gallia Carolo VI. Rege, rerum venalium vicesima tributi loco indicta erat. Id onus urbes detrectabant, ministris regiis contrâ nitentibus. Cùm igitur Parisiis in foro olitorio femina quædam nasturcium venum exposuisset, coactor Regius obulum postulat. Muliercula astantium vi-

rorum

rorum auxilium provocat. Concur-
su facto exactor à turba oppressus,
obtritùsque est. Inermis plebs ad
ædes publicas impetu delata; dejectis
foribus arma corripit. Tumultua-
tum exinde ab armatis totâ urbe; &
quotquot reperiri poterant exactores
Regii, plumbeis malleis interfecti
sunt.

~~~~~

## CAPUT XVII.

*Quod Alchimia, sive Chry-  
sopœia non profit Principi-  
bus.*

**N**ON expedit Principes ( præser-  
tim eos, qui minùs pecuniosi  
sunt ) Chrysopœiæ, sive Alchimie,  
studio ditescendi, magnopere addi-  
ctos esse. Nam Alchimia non ad o-  
pes, sed ad egestatem est via.

Initium Alchimie est mentiri, me-  
dium fallere, finis mendicare.

Alchi-



Alchimista dum aurum quærit ,  
etiam argentum ar.ittit.

Alchimista sæpiùs ex auro non au-  
rum , quàm ex non auro aurum con-  
ficit.

Unde quidam ajunt , Alchimiam  
esse Artem Creationi extremè oppo-  
sitam. Sicut enim DEUS ex nihilo  
fecit omnia ; ita hæc Ars carbonaria  
ex omnibus facit nihil.

Quid ergo lucratur Alchimistæ ?  
certè non aurum , nec argentum : *Al-  
chimista parum habet in cista.* Quid  
igitur ? Quidam non infacerè respon-  
det : Alchimistas lucrari quinque F.  
*Fumum , Fæctorem , Fatigationem , Fa-  
stidium , Famem.*

Optima & probatissima Alchimia  
est , habere tabulas accepti magnas ,  
expensi parvas.

*Alchimia provata è , haver entrata ,  
& poco spendere.*



\*\*\*\*\*

## CAPUT XVIII.

### *De Recreationibus Principum.*

**R**ecreationes Principi tot curis gravioribus fatigato non minùs necessariae sunt, quàm arcui remissio. At nimia bono publico detrimentum afferunt. Ut verò moderatae, & tam Reipublicae, quàm Principi salutares sint, quatuor videntur esse necessaria. Primò, ut recreationes conjungantur cum exercitiis pietatis, & negotiis Rempublicam concernentibus: sic ut alteræ alteris quodammodo interpolentur. Secundò, ut in hujusmodi relaxationibus quædam servetur moderatio, ac veluti temperamentum; ita ut nec jucunditate authoritas, nec authoritate gravitatèque jucunditas impediatur. Tertiò, ut recreationi non indulgeatur cum dispendio ac detrimento boni publici. Quarto, ut re-  
crea-

creatio sit secura, neque Principem in discrimen aliquod adducat.

Primum egregiè præstitit Ferdinandus III. Cæsar glor: mem: qui aliquando interrogavit Carassam Nuncium Apostolicum, ecquid ipsi de suis Cantoribus Musicisque videretur? cui cùm Carassa, summam omnium esse excellentiam respondisset; sed si sui res arbitrii foret, jussurum, ne nimiam prolixitate in templo tædium Auditoribus afferrent: Cæsar subridens, tribus insatiabiliter se interesse dixit: sacrorum celebrationi, consultationibus de Republica, & venerationum sudoribus.

In secundo excelluit Fridericus Rex Daniæ: qui animum curis fessum recreaturus, sæpius amicos, quasi sepositam Regis Personam, ad sales & jocos, cæterasque remissioris animi hilaritates provocabat: monens, ut lascivirent secum nonnihil, & jucundè ineptirent, dum Rex abesset. Postquam satis lusum fuisset, resum-

ptâ Regiâ gravitate: heus amici, inquit, mittamus nugas; Rex enim rediit.

Circa tertium deliquit Carolus Emmanuel Dux Sabaudiaë, qui accepto nuncio de adventu hostilis exercitus, & occupato jam Camerino, illo ipso tempore festivis choreis (quibus vel ut spectator, vel etiam ut actor intereat) nisi ad finem perductis, abscedere noluerit. *Matthieu in hist. Gall.*

Ad quartum pertinet consideratio ingentis periculi vitæ, quod Maximilianus II. Archidux Austriaë, postea Cæsar, in Hispania occasione venationis adiit.

Cùm Carolus V. Imperator, idemque Rex Hispaniaë, in Germania res nondum pacatas componeret, Archidux Austriaë Maximilianus II. ingenio, prudentia aliisque virtutibus ornatissimus Princeps, ad Hispaniaë vicinorumque regnorum gubernationem accitus est. Ibi dum vel  
animi

animi causâ , vel exercendi corporis gratiâ , venationi ad Granatam vacaret , & oblatam feram insequendi cupiditate accensus , longiùs à comitatu suo discederet , à suis relictus , diu in densissimis nemoribus vagatus est. Cùmque nocte jam accedente sibi à feris immanibus magnopere timens , locum aliquem tutum , quo se reciperet , circumspiceret , conspectâ eminùs pastoritiâ casâ , citato equo ad eam contendit , ubi à Pastore in speciem humaniter exceptus , de equo descendit , & tugurium ingreditur. Degebant in eâ casulâ , præter pastorem , filiusfamilias , juvenis robustus , & ad quodlibet facinus aggrediendum idoneus , Uxor Opilionis , ejusque parvula filia & nurus , quæ paulò antè nova nupta in familiam pastoris concesserat. Princeps , dum ei tenuis cœnula apparatur , foco assidet , nihil mali suspicans. Interea cùm Pastor aliique domestici Principem hunc minime

nimè noſſent, neque ipſe quiſnam eſſet, cuiquam apperuiſſet, ſuſpicarentur tamen, conſideratis ejus pretioſis veſtibus, ipſum omnino magnum aliquem & opulentum virum eſſe, optimæ inhiantes prædæ, teterrima de eo perdendo conſilia ineunt. Itaque cœnante in perangulo cubiculo, quod oſtiolo vetuſtate putri, & cardinibus diluxatis, malèque cōhærentibus, ægrè claudebatur, lectum ei conſternunt, aliàque ad ſomnum capiendum neceſſaria apparant. Quæ dum geruntur, nova nupta filii, conceptâ ex domesticorum nutibus & concurſationibus ſuſpicionem pravi conſilii: vel egregii Principis ſibi ignoti miſerata vicem, vel atrocitate rei commota, periculum, in quo verſabatur, Maximiliano detegit. Is licet facilè potuiſſet (apertè fatendo quiſnam eſſet,) diſcrimen imminens evitare, maluit tamen virtuti propriæ, quàm fidei eorum hominum, quos ſemel infidos atque impios expertus eſſet,

esset, sese committere. Quapropter in cubiculum sibi ad insidias paratum, ab hospite sanguinario introductus, occluso accuratè ostio, & objectu gravioris arcæ bene adversus irruptionem communito, sumptâque in manus bombardâ, cœpit intrepidus eventum rei expectare.

Pastor, cum illum de via & venatione fessum vidisset, ubi somno oppressum credidit, suspensio gradu ad ostium accedit, ac manu prætentat, clausumque reperit. Quod cum præter spem illi accidisset, petit à Principe, ut ostium aperiat, cupere se nescio quod stragulum ex arca promere. Cui Princeps, apage, inquit, cum tua ista importuna diligentia: mihi jam ad quietem somnûmque composito non libet ostium recludere. Tum ille primùm indignari, clamare, quiritari: deinde ad arma curerre, viam apertam parare, postre-

postremo etiam cædem minari, nisi domus sua tota sibi pateret. Et jam pastores ceperant ostium amoliri, eoque obnixius rem ceptam perficere, quod jam sua consilia detecta esse non obscure intelligerent. At verò Princeps magnanimus, cum rem iniquissimo loco sitam videret, fortiter pugnandum ratus, intentatam ad fores bombardam displodit, ostium glande traiecit, pastoremque prostermit, ac subito dimotâ arcâ, patefactoque ostio foras erumpit, pastoris filium obruncat, opilionem famulum ense stricto persequitur, & fugere cogit. Neque tamen protinus omni periculo defungitur. Nam vociferationibus uxoris, & insueto tumultu acciti, qui circum aderant alij pastores, raptis undique telis concurrunt, domum ipsam armati circumstant, juvenem Principem ad supplicium deposcunt. Ille verò insanum rusticorum furorem meritò re-

formidans, se Hispaniarum præsidem ac moderatorem esse palàm asseverat, extremum ei comminatus exitium, qui violentas ipsi manus inferre præsumeret; Si sibi parum fidei habendum putarent à præsentis cæde abstinere, ultione Magistratui reservatâ. Illi heroicâ præstantissimi Principis indole, & constanti oratione permoti, facillè quidem sibi persuadebant, illum ipsum esse, quem se esse dicebat, ne tamen ab ingenio suo rusticano discederent, Juvenem Principem comprehensum manibus vinciunt, itaque constrictum summo mane ad vicini oppidi Præfectum perducunt. Jam eodem pervenerant nonnulli ex Principis satellitibus, eum sollicitè quæritantes: quem cùm ita vinctum, modisque indignissimis acceptum viderent, parum absuit, quin in turbam illam pastorum inconditam ac tumultuantem irruerent. Tum verò adventu horum res omnis, ut erat, dete-



detecta fuit, & quantanti sceleris fuere  
conscijs, scelestissimi facti meritas poe-  
nas dederunt. Nova nupta è con-  
trario ob sceleris apparatus Prin-  
cipi detectum, multis magnisque  
muneribus affecta est. *Ex Historio-  
graphia Apodemica Davidis Frælichij.*  
*Caveant sibi Principes, ne, dum ve-  
nando feras bestias capiunt, à feris ho-  
minibus capiantur.*



## CAPUT XIX.

*De nimio & inordinato erga  
res ludicras affectu à Princi-  
pibus refranando.*

**S**ultissimus omnium affectuum  
est Amor inordinatus, à quo ne  
maximi quidè Principes semper im-  
munes existunt. Palam id fiet ex-  
emplo quorundam Regum Indico-  
rum, Elephantem album copiosâ  
non modò auri, sed etiam sanguinis  
profusione honorantium.

Memorant rarum esse animal, atque ex eo capite pretiosum, candidum elephantem. Hunc qui natus est apud Indos, dominum scripsit albi elephantis, titulo perquam honorifico & invidendo, cujus gratiâ multum est humani sanguinis non semel effusum: certantibus æmulis Regibus pro candida bestia, donec in cruore suo purpurati aut flarent, aut caderent. Et auctor est Ferdinandus Mendozius, Regni Sornao Regem superbivisse in elephante albo. Quem ut obtineret Rex Brama, trecenta millia armatorum in aciem eduxit: ratus tunc impensas belli optimè collocatas fore, si dignitatis gloriæque suæ luculentum auctarium adjecisset niveam belluam. Nihil tamen promovit; sed re infectâ, & imminutâ tertiâ parte exercitûs sui, unde venerat, redire coactus est.

Fecit ea res, ut elephas, tot sumptuum materia, & tam cruentæ cladis

dis occasio, altero tanto Regi suo fieret charior. Itaque bestia nunquam in publicum producebatur sine insigni pompa & amplissimo comitatu; qualem supradictus Mendozius scribit se aliquando conspexisse, quando regium animal, ad fluvium & balneasibat. Præcedebant Magnâ Coronâ procures, partim equis 160. vecti, partim elephantis 83. Hos sequebatur candidus elephas, auro argentoque gravis: objectis supra ipsum 24. ex filo serico umbellis adversus solis radios. Ipse in proboscide auratam sphaeram, Orbis globum, gestabat: atque ut ab omni vi injuriaque tutus esset, latera utrimque cinxere tria millia fatellitum, armis probè instructorum. Neque defuit Musicorum instrumentorum apparatus. Singulæ urbis plateæ festivo vocum fidiumque applausu resonabant. Denique agmen clauserunt 40. viri Principes, totidem elephantis gestati.

Quacunque transitura erat pompa, muri & parietes pretiosis aulæis superbiebant. Quoties bestia consistebat, nemini licebat pedem movere. Cum verò etiam (honus sit oculis auribusque) urinam redderet, ea aurea pelvi excepta, ad Magnates totius regni mittebatur, solitos se illo fonte abluere. Postremò, ut nulla mortalium felicitas est perpetua, etiam Regi suo amatus pretiosusque elephas occubuit, cum totius populi luctu; quem frequentes per mensem integrum lacrymæ, toto regno fusæ, satis superque comprobârunt. Rex bestię magnificè parentavit, in exequias ejus 24. coronatorum millibus impensis.



## CAPUT XX.

*Quòd Immodicus luxus*

*Principi Vitandus sit.*

**G**Rave est, Principis immodico  
gluxu egentium sudorem cum  
dolore expressum absumi. Ita lo-  
quitur Maximilianus Elector Bava-  
riæ in monitis ad filium suum Fer-  
dinandum. Cui dicto non est absi-  
mile illud effatum sapientissimi Al-  
phonfi Regis Aragoniæ: *Bonus est*  
*Princeps, qui subditos suos habet in Ca-*  
*pite; melior, qui in corde; pessimus, qui in*  
*ventre.*

Hi ventricosi Principes insatiabi-  
les sunt; quò plus devoraverint,  
tantò plus appetituri & devoraturi.

Salomoni, ubi ad luxum versus  
est, nullum suffecit aurum, licet uni-  
câ navigatione (quæ per triennia re-  
petebatur) ex Ophir quadringenta  
auri talenta colligeret. Cœpit ita-  
que populum tributis premere, mox  
sub filio defecturum.



*lib. 3. Annal.*) sed aliæ oblivione, alia ( quod flagitiosius ) contemptu abolitæ, securiorem luxum fecêre. Verùm, quia leges sunt pharmaca languentis, seu vitijs affectæ Reipublicæ, ad officium Principis, qui Reipublicæ Caput est, pertinet, aut novas condere leges sumptuarias, aut veteres reducere, quibus coërceatur conviviorum & vestium luxus, armorum usus, onerosa & damnosa pompa in nuptijs atque funeribus, aliique profusi sumptus, quos tenuioris conditionis homines faciunt in auratis frenis ( ut loquitur Perezius *in jure publico* ) rediis, vehiculis, baltheis, calcaribus, vestibus holosericeis, purpureis, auro & argento contextis, in segmentis auratis & suppellectile argentea ad cibos ministrandos, &c. quibus rebus absumitur cum dedecore, quod in monetam & publicas pecunias sufficeret, & materia nummis subtrahitur; ita ut periculum sit, ne deficientibus

tibus opibus, ad facinora populares incenduntur, quibus publica turbetur tranquillitas. *Fiunt* (inquit Aristoteles 8. *Politicorum*) *in Republica mutationes & seditiones, cum homines sua consumunt, prodigè viventes.* Quam ob causam Aristoteles arbitratur è Republica fore, si leges sumptuariæ in usum revocentur. Quod tentarunt in Gallia Philippus Pulcher, Carolus IX. Henricus II. & IV. in Germania & Belgio Carolus V. qui usum sericæ vestis certis tantum personis, habitâ censûs & honorum ratione, permisit, omnemque luxum interdixit. Digna sanè Principibus cura, providere, *ne dices familia aut claritudine insignes studio magnificentia prolabantur.* Tacitus lib. 3. *Annal.*





## CAPUT XXII.

*Quòd nimia parsimonia & tenacitas Principis per moderatam liberalitatem corrigenda sit.*

**Q**uemadmodum nimia liberalitas Principi, ita nimia tenacitas Ministris, imò toti Reipublicæ nocet, si fides habeatur huic dicto Aureliani Cæsaris: *Respublica optimè regitur auro & ferro: id est manu liberali & forti.* Livius existimat, nihil non aggressuros homines, si magnis conatibus magna præmia proponantur, eaque ab ipso Principe dentur. Munificentiam tanquam vinculo adamantino subditorum animos sibi devinciunt Principes.

*Ditescere invidiam, ditare benevolentiam Principi conciliat. Tu nihil es, nisi des; ergo des: respice cui des.*

Scio nonnullos Principes prætere inopiam. Sed nescio, an sit decorum Principi uti excusatione ab egestate petita.

*Nunquam liberalitati Principis deesse poterit quod det, si danti non ipsa desit.*

Meminerint Principes, liberalitatem esse hamum aureum, quo corda hominum piscari solemus.

*Donis capitur homo, ut piscis hamo.*

*Il dativo è per tutto optativo.*

Oportet autem liberalitatem Principis esse gratuitam, quæ nullis sperati antidori fulcris nitatur. Cujusmodi liberalitas hac ætate nostrâ candido corvo est rarior.

*Multi liberales apparent, sed liberalitate carent; quia dant parum, ut recipiant carum: dant ovem, ut acquirant bovem.*

De hoc hominum genere dici solet:

*Ovum dant nulli, nisi sit retributio pulli.*

Sed hæc lucrosa liberalitas, ut sordidorum hominum est propria, ita excelsos Principum animos haut parum dedecet.

Adhæc

Adhæc moderatam & ab omni prodigalitate sejunctam decet esse liberalitatem Principis. Nam prodigalitas est vicina inopiæ & egestati. Sicut enim opes comparat frugalitas, ita comparatas perdit prodigalitas.

*Sparagnar genera le ricchezze, mà la figlia ammazza la Madre.*

*Prodigalità è camino à gran povertà.*

Obtemperandum est itaque illi monito Itatorum : *Non mangiar quanto puoi, ne dire quanto sai, ne spender quanto hai.*

Adhæc bonis Principum Consilijs incredibiliter obsunt immoderatæ largitiones ; quia privant eos necessarijs medijs atque instrumentis Executionis : sine qua Consilia etiam optima sunt meræ speculationes, & steriles animæ non tam voluntates, quàm velleitates.

Sit igitur Princeps in donando moderatus, sibi que persuadeat,

quòd sicut ab exigua, sed constanti pluvia, terra magis, quàm à præcipiti nimbo irrigatur, ita liberalitas moderata. multò majores benevolentiae amorisq; stimulos in pectoribus hominum, quàm effusissima illa liberalitas & prodigalitas, relinquat.

Quatuor sunt, ad quæ donatorum Principem oportet respicere, juxta documentum Italicum : *Nell donar s' ha da mirar à quattro cose : à quello che dona, à chi si dona, alla cagione, perche dona, & al tempo, nell quale si dona.*

Hæc quatuor considerationes si nonnullis Principibus tam essent in usu, quàm sunt in oblivione; multæ donationes aut omitterentur, aut restringerentur. Et sanè multò esset consultius, restrictis donationibus comparcere, quàm expendere, quòd novâ injuriâ à subjectis populis repetatur. Nolim tamen Principes ( quibus tam gloriola est munificentia, quàm dedecorosa prodigalitas ) sordidè

didè parcos atq; tenaces esse. *Regium est accipere parva, & largiri magna.*

Neque existimandum est, omnem erogationem splendidam, & sumptuosam esse vitium prodigalitatis, cum non rarò pertineat ad magnificentiam: quæ virtus est propria magnorum virorum, qui nonnunquam cum dignitatis ostentatione non illaudabili, ad proximi utilitatem, aut Dei honorem, opes ingentes profundunt in res amplas & illustres, ut sunt ædificia, basilicæ, palatia, urbium instauratio, aquarum deductio, propugnacula, portus, ludi Theatrales &c.

Pro exemplo Magnificentiae statuere libet nuptias illas, quibus Carolus Audax Dux Burgundiæ Uxorem duxit Margaretam sororem Edwardi IV. Anglorum Regis. Cælebratæ sunt hæ nuptiæ Burgis oppido Flandriæ, apparatu perquam splendido & augusto. Domus nuptialis à fundamentis exstructa, incredibili sumptu

sumptu ac celeritate, ejusque con-  
clavia omnia tapetibus pretiosissi-  
mis exornata fuere. In triclinio  
erectus abacus, in quo ad delecta-  
mentum oculorum pulcherrima o-  
mnis generis vasa reposita. Ex  
auro purissimo erant facta emun-  
ctoria, candelabra, malluvia, pel-  
ves, vaseula potoria, disci, salina,  
cenophora, patinae, lances &c. O-  
mnes vici, omnesque domus, qua  
transitura erat sponsa, pulcherri-  
mis aulaeis resplendebant. Accer-  
siti undique nobilissimi artifices, ad  
excogitanda, construenda, & con-  
cinnanda ea, quae praetereuntium  
oculos oblectare possent. Praete-  
reo edita toto oppido spectacula o-  
mnis generis, exhibitique ludos re-  
gionatim, & quidem per celeberr-  
imos histriones. In triclinio, ubi  
cum Sponsa & illustribus Viris dis-  
cumbibat Princeps, quatuordecim  
partim argenteis, partim aureis na-  
vibus, quarum singulae quatuor sca-  
phulas

phulas habebant, fercula mensis illata sunt. Postquam exempta fames epulis, mensæque remotæ, sua etiam oculis exhibita sunt oblectamenta; ex quibus propè innumeris pauca referam. Illati sunt in triclinium pavones flammivomi, in quibus tantum artificij operæque insumptum est, ut à veris internosci vix potuerint. Introductus est leo, cui eximia pulchritudine Virgo insidebat, gestans manu insignia Principis Caroli. Ad ostentandam Magnificentiam, illatæ sunt turres argenteæ numero 30. quibus totidem Arces significabantur, quarum eâ tempestate dominus ac possessor erat Carolus. Postremò introductus est Dromedarius, cujus dorso impositæ erant sportulæ, è quibus omnis generis evolantes aviculæ, aures convivarum suavissimo cantu demulcebant.

Porro in hujusmodi profusionibus habenda est ratio facultatum, quibus comensuratas esse oportet impensas.

Non

Non est ille Magnificus, qui plura quam habet, profundit, aut se suosque gravat aere alieno, ut magnificentiae laudem consequatur.

Ad extremum, illud etiam considerari velim à Viris Principibus, omnem quidem prodigalitatem, sed eam tamen præcipuè illaudabilem ac reprehensione dignam esse, quæ se rebus inutilibus impendit. Hujusmodi profusiones amentiae potius, quam magnificentiae argumenta sunt.

*Qui magnis sumptibus res inutiles comparant, multum expendunt, sed parum perpendunt: suntque similes ijs, qui humo aureo vilissimos pisciculos piscentur.*

Hujus farinae fuerunt Galli illi: quorum alter Lutetiâ in Belgium misit lavanda indusia sua; alter singulis annis 500. coronatos in solas chirothecas expendit.



## CAPUT XXIII.

*Laboris tollerantia commendatur Principi.*

**P** Principem oportet esse non minus patientem laboris, quam capacem honoris. *Quo major, hoc laboriosior.* Fuit hoc symbolo usus Imperator Julius Maximus, imitatus Alexandrum M. qui dicere solebat, *nihil esse magis Regum, quam labores.*

Stultè igitur Dionysius Siculus otium reputavit Imperium, quo nihil est in mundo negotiosius.

Ille Princeps censetur optimus, (dictum Caroli Magni) cui nomen Adamus, cognomen Abrahamus: hoc est, qui ut Adam laboriosus, ut Abraham pius & devotus est.

\* \* \*

CA-

## CAPUT XXIV.

*Moderata Cura minimorum decet Principem.*

**N**onnulli Principes curam minimorum nimiam, alij nullam gerunt. Utrique agunt imprudenter, & vel damnum, vel periculum damni incurrant.

Res maximas exponit discrimini, qui res minimas nullâ suâ curâ dignatur. *Non sunt contemnenda quasi Minima, sine quibus Maxima constare non possunt.*

At non est Viri prudentis, immodico studio res minimas curare.

Princeps, qui curas opesque maximas rebus impendit minimis, est similis araneo, qui in texturam perflatilis tentorioli impendit propria viscera & se ipsum exenterat, ut suum illum in muscarum perniciem prædatorium orbem concinnet.

*Minima commoda magno sectantes*



Unde Campanella *DEum Prudentiam & Occasionem* omnium actionum politicarum principia constituit. *lib. de Monarchia Hispan. cap. 1.*

Omnes, non modò superiorum, sed etiam modernorum temporum annales referti sunt exemplis eorum, qui occasionibus oblatis prudenter usi res magnas, *Consilio & Industria* adjuvante gesserunt. Recens est, quod subjungo de Friderico Henrico Auriaco Principe; qui cùm filio secundogenitam Regis Angliæ filiam ambiens, repullam tulisset; paulo post, occasione rebellionis in Anglia concitatae, ubi opes suas contra rebelles Regi necessarias videbat, Primogenitam obtinuit.

Est autem præcipuus occasionis usus in re bellica: ubi quantas Illa arrepta victorias, tantas neglecta clades afferre solet. Cùm enim in bello nullâ minùs, quàm quâ putabatur, viâ progrediantur arma (*Thucydides lib. 1.*) & multa quæ nunc  
non

non apparent, ex intervallo bellum aperiat (*Idem lib. 28.*) evidens est, Neminem de emergentibus casibus commodius rectiusque statuere posse, quàm qui præsens negotijs interest: amittique rerum gerendarum occasiones si ultro citroque mittendo, Senatûs aut Principis exquiratur voluntas.

In Republica Veneta, qui ad bellum mittuntur, non suis relinquuntur consilijs; sed arbitrium de summa rei certis finibus circumscriptum, domo secum afferunt in castra: ut sæpe ne quidem tormenta bellica ad feriendos muros alio loco modovè alio collocare audeant, quàm quo ipsis mandatum est. Nec sine gravissimæ timore pœnæ jussa Senatûs transcendere licet. Qui sanè agendi modus non rarò egregias bene gerendæ rei occasiones corrumpit.

*Justinianus lib. 6. Hist.*

*Venet.*

# CAPUT XXVI.

*Curam Fama & boni Nominis habendam esse Principi.*

**N** Il est pauperius homine, qui caret bono nomine.

*Cetera si perdas, famam servare memento.*

Fama est anima Hominis, quatenus animal politicum est.

*Chi hà persa la fama, è morto al mondo.*

*Chi è diffamato, è mezzo impiccato.*

Verissimum est illud Sacri Codicis oraculum: *Melius est nomen bonum, quàm divitiæ multa.* Nam divitiæ famâ comparari possunt, divitijs fama emi non potest.


*Val più un' onica di reputatione, che mille libre d' oro.*

Non immeritò igitur Galli dicunt, tria esse, quæ tangi non debeant: *oculum, famam, religionem.* La foy, l' œil, & la

*Et la renommée ne veut gueres estre touchée.*

Præcipuè verò necessaria est fama viris Principibus, ut sapienter observavit Maximilianus Elector Bavariae in monitis ad filium, ubi ait: Princeps magnam habeat rationem famæ, sed veris virtutibus quæsitæ, ne famæ contemptu virtutem contemnere videatur. Cæteris Mortalium non perinde, atque Principi necessarium laudis ac posteritatis studium; illorum enim etsi parum honesta, obscura tamen & brevis est memoria: Principis verò excelso posita & longissima manet recordatio, & talis quidem, qualem suis moribus excitaverit. Omnia facta & dicta Principis rumor excipit, & plerumque in majus extollit: proinde quaecunque is nomen meruerit, sive clarum ac prosperum, sive foedum ac infustum, Magnum illud est habiturus. Huc usque Maximilianus Elector.

Itaque Principes sæpe illud Augustini in mente habeant : *Duo sunt tibi Necessaria, conscientia & fama : Conscientia propter te, Fama propter proximum.*



## CAPUT XXVII.

*Nec activam, nec passivam aliorum despicientiam Principi decoram, aut proficuum esse.*

**A**liorum despicientia non raro ingentium in Republica calamitatum origo fuit.

*Tria vocabula turbant totum modum: Despectus, Respectus, Suspensus.*

Postquam Hæraclius Imperator, cum Syro Rege Persarum pacem pepigisset, & milites à signis dimittendi, ac stipendia ipsis persolvenda essent: is, cui Cæsar negotium hoc demandaverat, poscentibus stipendium.



dium suum Saracenis seu Agarenis Arabibus. ( quorum multi in exercitu Cæsaris militaverant ) respondit, in ærario vix tantum esse pecunie, quantum sufficiat solutioni militum Romanorum & Græcorum: pro Caribus Arabicis nihil esse, quod erogetur. Quâ despicientiâ exacerbati Saraceni, in patriam rediêre, & ab Imperatoris obedientiâ ( cui antehac semper fuerant subjecti & tributarij ) defecere: quibus se ducem præbuit Mahomet Turcarum Pseudopropheta. Unde malorum Illas in Rempublicam Christianam profluxit.

Atque hoc despicientiæ spiculum tantò ferit acerbius, penetratque profundius, quantò Persona tam despiciens, quàm despecta est illa inferior. Exemplo respatefiet. Theodoricus Marchio Brandenburgicus, Princeps potentiâ & studio rei militaris nimis insolens factus, cum etiam Confiliarios arrogantia & elatione insignes

G 2

circa

circa se haberet, eorumque impulsu  
 nihil non temerè & injuriosè face-  
 ret, tandem sic depravatus est, ut ex-  
 istimaret sibi licere, quod vellet.  
 Accidit autem, ut erga Mistovium  
 Obotritorum Regulum, nuper ad  
 Christianismum conversum (cui  
 Dux Saxoniae Bernardus sororem su-  
 am desponderat) & reliquam gen-  
 tem Vandalicam valde iniquus &  
 saevus esset. Nam in contumeliam  
 ejus effecit, ut duo Lusatiorum  
 Principes jussu Henrici II. capti, la-  
 queo suspenderentur, suasorque  
 Duci Bernardo fuit, ut sororem su-  
 am alteri desponderet, nec veritus  
 est dicere: Vandalos esse indignos,  
 quibuscum sanguis Germanicus  
 misceatur. Quin etiam Ducem Sa-  
 xoniae admissurum dedecus, si cum  
 isto cane (sic Mistovium appellare  
 solebat) affinitate jungeretur. Hæ  
 verò contumeliosæ & insolentes vo-  
 ces non solum Theodorico, sed uni-  
 versæ ipsius ditioni, & Saxoniae, rei-  
 que

que Christianæ multum attulere calamitatis. Mistovius enim hac contumelia ita irritatus fuit, ut abnegatâ fide Christianâ, totam Vandalicam gentem ad arma concitarit, & misso feciali ad Theodoricum, illi nuntiari jufferit, Mistovium canem Vandalicum jam jam editurum latratus, effecturumque morsus, quos tota Marchia & Saxonia perhorrescat. Cùm autem Theodoricus non minùs ferociter respondisset, se curaturum canicidas, qui latratum & rabiem Vandalici canis compescant, & non expectato auxilio, cum Vandalis temere conflixisset, mox victus & profligatus, tota sua ditione exutus est, quoad vixit, nullis modis aut medijs ditionem suam à Vandalis recuperare potuit, neque amicorum quemquam habuit, cujus operâ restitueretur, omnibus adeò invisus, ut nemo ejus mentionem faceret, quin eum exacraretur. In perpetuo itaque exilio vitam traduxit



industriâ consequetur Princeps. Prohibuerat Vitellius, ne quis de rebus malè à se gestis per urbem loqueretur: sed inde plures, quia vetabantur, atrociora vulgabant. Prudentius Sixtus V. Pontifex, cùm malè de ipso nonnulli in Urbe Romana loquerentur, id referenti respondit: *Sine eos loqui, modo sinant me precipere.* Laurentius Medices dicere solebat: *Loquantur illi, nos verò faciamus.* Sapienter Augustus Cæsar ad Tiberium: *Ætati tuæ mi Tiberi, noli hac in re indulgere, Ego nimirum indignari quemquam esse, qui de me malè loquatur. Satis est, si hoc habemus, ne quis malè facere possit. Si Princeps omnes maledicos & obtrectatores supplicio afficeret, vix hominem haberet, cui imperaret.*

*Optimum consilium est, ut Princeps despectum despectu puniat.*

*Meretur respectum, qui contemnit despectum.*

*E degno d'esser honorato, chi disprezza d'esser disprezzato.* CA-

# CAPUT XXIX.

*Quod Elatio animi etiam in  
Viro Principe vituperanda  
sit.*

**Q**UO difficilius est in corona ac  
sceptro non superbire, eo di-  
ligentior debet dare operam  
Christianus Princeps, ut Christiana  
humilitate animum orbi imperan-  
tem contineat, ne eleuetur.

*Principem dedecet vilitas, sed non  
dedecet Humilitas.*

*Humilità non è Viltà.*

Magni sunt Principes, & majores  
esse cupiunt: audeant igitur Consi-  
lium D. Augustini homil. 10. de  
ve b. Domini: *Magnus esse vis? à mi-  
nimo incipe. Cogitas magnam fabri-  
cam construere Celsitudinis? de funda-  
mento prius cogita humilitatis.* Prin-  
cipes, quorum Celsitudo caret fund-  
amento humilitatis, citius à Deo (qui  
superbis resistit, humilibus autem dat  
gratiam) deprimantur in vallem hu-  
milia-

miliationis, quàm assurgent in montem majoris Dignitatis.

Lepidum est, quod Divus narrat Antoninus p. 2. tit. 3. c. 2. de quodam Tyranno, qui versus illos: *Dispersit superbos mente cordis sui: deposuit potentes de sede, & exaltavit humiles*, ex Mariæ Cantico eradi jussit; quod de sede sua se deponi posse negaret. Is cum aliquando lavandi corporis gratiâ balneum ingressus esset, Angelus interim formâ illius ac specie assumptâ, vestes quoque Ejusdem induit atque ad domum ipsius unâ cum aulicis se contulit. Tyrannus verò cum peractâ corporis lotionem, laceris ac vilibus indutus vestibus domum rediisset, atque in *Aulicos diras & minas jactaret* ( verba sunt D. Antonini ) pro stolito habitus, ad Angelum deductus est, qui verus Princeps habebatur; à quo, postquam eum *Aulici effusè derisissent*, in penetrale admissus, de quâ modestia monitus, proprias vestes recepit, ac deinceps in honore tan-

G 5

quam





bat, qui tam probatæ pudicitia U-  
xorem reperturum se putaret, quàm  
non ipse ad stuprum se pertracturum  
confideret. Cùmque Velsius postea  
Concubinam illam Matrimonio sibi  
copulasset, fuit ea, absente marito,  
à Principe prioris consuetudinis non  
dum oblito stuprata. Quæ injuria  
animum Velsij vehementissimè pu-  
pugit. Ergo conjuratione initâ cum  
propinquis Uxoris suæ, Florentium  
Ultrajecto in Hollandiam redeun-  
tem gladio transverberavit, celeri-  
que fugâ sese proripuit. *Ex Histor.  
Fris.*




## CAPUT XXXI.

*Quòd affectus Uxorius pa-  
rum deceat viros Prin-  
cipes.*

**M**Inimè decet Principem esse U-  
xorium, in ijs precipuè rebus,  
quæ ad gubernationem Reipublicæ  
pertinent.

*Populus male regitur à Principe , si Princeps regitur ab Uxore.*

De Themistocle Uxorio Principe talis facta est olim sorites. Tota Græcia paret Atheniensibus , Athenienses parent Themistocli, Themistocles paret filiolo ; ergo tota Græcia paret filiolo Themistoclis.



## CAPUT XXXII.

*Sedulam filiorum educationem incumbere Principi.*

**F**ilij Heroum non semper sunt Heroes. Sæpe aurei Patres filios genuerunt plumbeos : cùm etiam è spinis rosæ prodeant, & ex ovis albis nigri pulli generentur, & acetum & vini filius, ut loquitur Causabonus.

Tres filij Constantini Magni, Constantinus Constans & Constantius , tantùm à paterna indole in omni genere laudis recesserunt, quantum  
ille

ille superiores Principes omnes pietate animique magnitudine superavit. Neque enim Constantino filio quisquam ad vitam incautior : Constante ad indecoras voluptates proclivior : Constantio aut levior, aut ad arrogantiam intollerabilior fuit.  
*Sigonius.*

M. Tullius filium reliquit potatorem, ipse sobrietatis amantissimus.

Augustus Cæsar nec adoptivum bonum filium habuit.

Septimius Severus (de quo Senatus judicabat, illum aut nasci non debuisse, aut non mori) Bassianum genuit, qui fratrem interemit, & Novercam propriam uxorem duxit.

Pericles tres filios reliquit : duos stupidos, tertium furiosum.

Wenceslaus Caroli I V. Imperatoris strenui & sapientis Filius, Patre mortuo non tam gessit Imperium, quàm infecit. Vino lustrisque marcidus, paternam sapientiam turpissimis vitijs obli-

oblitteravit. Imò cæteris flagitijs crudelitatem adjungens, Carnificem habebat pro comite, qui ad nutum novi Neronis quemque, ut esset libitum, interficeret.

Quapropter si Princeps in liberis suis (cùm in se ipso non possit) etiam post funera vivere cupiat, totâ animi contentione in probam eorundem educationem incumbat necesse est.

*Homines geniturâ, boni homines cultura fiunt.*

Quòd si Princeps liberos proprios, sibi tam arcta sanguinis communione conjunctos, regere aut non velit, cùm possit; aut non possit, cùm velit: nescio fanè, an bona gubernatio Reipublicæ ab eo speranda sit.

\* \* \* \* \*

# CAPUT XXXIII.

*Sobrietatem Principi maxime necessariam esse.*

**P**rinceps à nimia vini potatione, tamquam à peste boni Regiminis abstineat.

*Sub ebrioso capite vacillat corpus Republicæ.*

Tale caput fuit Wenceslaus Imperator, qui sæpè inter purpuratos suos in hæc verba prorumpebat: Egoc si diripiendis Italiæ urbibus cum exercitu Italiam ingressus fuero, æterarumque rerum prædam militibus distribuam, vini spolijs mihi reservatis. Si quis autem cellam vinariam injussu meo fuerit ingressus, gladio ferietur. *Aneas Sylvius.*

Idem ille Imperatorum ignavissimus, de fastigio dignitatis Cæsareæ dejectus, deficientibus ab eo passim Imperij Ordinibus, cum

cùm Norimbergenses religionem  
datæ fidei vererentur, & ab eo solu-  
tionem juramenti peterent, adjectâ  
promissione viginti millium floreno-  
rum; homo ebriosus, auditis le-  
gatis, liberos Norimbergenses pro-  
nunciavit, si quatuor currus vino  
Rhenensi, Baccharacensis crescentiæ,  
onustos traderent.



## CAPUT XXXIV.

*Quòd Princeps auctoritatis  
sue custos & conservator  
esse debeat.*

**Q**Uamvis in Principibus com-  
mendari plurimùm soleat Hu-  
manitas & popularitas: quia hæc  
gemina virtus est efficacissima con-  
ciliatricula affectuum in subditis;  
cùm habeat nescio quid blandissimæ  
violentiæ, ad catenandos affectus  
subditorum, excelsa dignitas, quoties  
se ad inferiorem sortem studiorum  
cōmunionem demittit; providendum  
est

est tamen, ne nimio popularitatis, humanitatisque affectu minuatur autoritas: quæ vel est ipsa principis dignitas, vel ita cum dignitate conjuncta, ut altera ab altera nullo possit separari divortio. *Princeps sine auctoritate, est pavo sine cauda: Di-* Etum cujusdam Politici. *Autoritas Imperantis est vita & anima Imperij.*

Itaque Principes magno in eam rem studio incumbant, ne unquam decus inclytum auctoritatis suæ prostituant: sciântq; jacturam istam difficillimè reparari posse. *Duo sunt, quæ semel amissa agrè recuperantur: Verecundia & lesa auctoritas.*

Sit itaque Princeps humanus erga omnes, sed non nimium familiaris: quia familiaritatis incrementum est auctoritatis decrementum. *Quatuor bonæ Matres pariunt quatuor pessimas filias. Veritas parit odium, prosperitas superbiam, securitas periculum, familiaritas contemptum.*

## CAPUT XXXV.

*Quòd Princeps res arduas  
prudenter aggredi debeat.*

**P**rudenter aggreditur ardua, qui  
ante aggressionem ea metitur  
viribus suis. Negotia ardua viri-  
bus magnis aggredienda sunt: quæ  
si desint, præstat tutò humilia, quàm  
periculosè summa sectari. *Noli ten-  
tare, si non potes consummare.*

Prudens est monitio Italorum :  
*Guardisi di non tentare impresa, che sia  
sopra le sue forze, e di non entrar in ne-  
gotio, che sia sicuro d' haverne à rin-  
scir honoratamente.*

*Che non vede il fondo, non passi l'acqua.*

*Ut felicitatis est, quantum velis posse;  
ita magnitudinis est, velle quantum possis.*

*Chi non può come vuole, voglia come  
può. Fa il passo secondo la gamba.*

## CAPUT XXXVI.

*Quòd prudens Legislatorio incumbat  
Principi.*

Bonis



**B**onis legibus & Reges & Regna  
conservantur. *Custodia legum, Cu-  
stodia Regum.*

*Tria conservant Rempublicam: Bona  
lex, Bonus Rex, Bonus Grex.*

Sed cavendum est, ne legislatio sit  
imprudens. Foret autem imprudens,  
primò, si esset valdè mutabilis. Nullà  
*alià re magis labefactatur status civita-  
tis, quàm crebrà legum mutatione.*

Secundò, si potestatem legislativā,  
ipsūmq; legislatorem periculo con-  
temptūs exponeret. *Sapientis est ab-  
stinere à ferendis legibus, quarum in-  
juriam ulcisci non possit.*

Tertiò, si lex hominum naturæ atq;  
ingenio, præsentiq; sæculo, in quo vi-  
vitur, minime esset consentanea: vel  
ea juberet, quibus jam pares non su-  
mus, ut loquitur Tacitus l. hist.

Quartò, si lex subderetur arbitrio  
subditorum. *Leges hominum dominas  
esse, nō homines legū dominos esse oportet.*

Quintò, si lex non mandaretur exe-  
cutioni. *Lex sine executione, est veluti  
campana sine pistillo.*

C A-

## CAPUT XXXVII.

*Abstinentum esse Principi à  
novitatibus in forma Regiminis.*

**P**Rudentes Principes meritò abstinent ab introductione novitatum in forma Regiminis, quæ plerumque plus habent periculi, quam emolumenti.

*Qui deserit vias antiquas, invenit molestias novas.*

*Chi lascia la via vecchia per la nuova, spesso ingannato si ritrova.*

Certè Nobiles Castellæ arma sumptulerunt adversus Regem Henricum III. qui novitatis studio privilegia eorum evertere volebat.

Eandem ob causam Ramirus Rex Legionis Subditos suos Rebelles expertus est, teste Marianâ l. II. hist. c. 14.

Unica ( inquit Trajanus Boccalinus ) est ratio feliciter imperandi populis ( præsertim ijs, qui Optimatum & electione, & sub certis

certis conditionibus in alterius Principis ditionem venerunt) si nimirum à pactis illis Princeps, ne latum quidem unguem discedat: neque ex legibus, moribus, institutis, privilegijs, immunitatibus subjectorum quidquam immutet, aut immi-  
nuat, sed totam Rempublicam in  
priori statu relinquat.

Philippus II. Hispan. Rex lau-  
dem meruit amplissimam, quòd,  
cùm scripturam, quâ delictorum  
gratiam Lusitanis recenter subactis  
faciebat, publicaret, Lusitanicâ lin-  
guâ eam confici jusserit, & solos  
Lusitaniæ Regum titulos, cæteris  
omissis, usurpaverit. cùmq; soleret  
litteris publicis subscribere: *Ego  
Rex*; hic tantùm scripserit, *Rex cum  
quinque punctis* :: quæ Lusitani  
vulnera appellant: prorsus ad mo-  
rem Lusitaniæ Regibus usitatum.

Itaque contra leges prudentiæ de-  
linquit Princeps, qui permittit, ut  
novi Provinciarum, vel civitatum Re-  
tores

Atres, orebrum novis inventis gravidum afferentes, novos mores, novos homines, nova instituta Provincialibus obtrudant: quæ frequentissima turbarum & dissensionum materia est.

Quantò prudentiùs ageretur, si populis relinquerentur acceptæ à Majoribus consuetudines. Magni enim faciunt Provinciales, si sua sibi, quibus assueverunt, jura serventur illæsa.

Unde regendis populis aptiores judicantur, qui sunt ingenio tardiori & quieto; resque hominibus, & homines rebus, prout repererant, permittunt; quàm qui inordinatâ novandî omnia cupiditate ducti, res hominesque ingenio suo, plerumque heteroclitò, adaptant: eo sæpe successu, ut à iurgiis morem veterem impugnantium propugnantiumque, ad arma tandem & bellum provocetur: si præsertim privilegij retinendi causâ propugnatio suscepta fuerit.

Fuit

Fuit sanè hæc semper, estq; hodiè  
penè unica civilium dissidiorum ar-  
morumque causa, quòd Principibus,  
Principumque ministris persuasum  
sit, immunitates ac prærogativas  
populis non alio fine concedi, quàm  
pueris plorantibus cerasa & crepun-  
dia: auferenda rursus, cùm plora-  
re desierint.



## CAPIT XXXVIII.

*Quòd Principes abstinere de-  
ceat à vindicta, quæ cum pericu-  
lo vindicantis conjuncta  
est.*

**P**rudens est, securitati prius,  
quàm vindictæ consulere.

Hoc dictamen omnibus quidem,  
præcipuè tamen populorum Rectari-  
bus, inculcandum est. Quis enim  
prosperos gubernationis successus ab  
eo exspectet Principe, qui animo  
tam

tam est impotenti & imprudenti,  
ut se suūque sibi commissam Rem-  
publicam in discrimen adducere,  
quā ultionem in tempus oportu-  
num differre malit?

Catharina Medicæa Galliæ Regi-  
na illud Perpetuò in ore habebat:  
non fodiendos crabrones, nisi facie  
prius benevelatâ. *E necessario copri  
si bene il viso, inanzi che stuzzicare il vo-  
staro.*




## CAP. XXXVIII.

*Eos, qui sua Principi obse-  
quia offerunt, non contem-  
nendos, sed benevolè exci-  
piendos esse.*

**P**erverſio consilio contemni eos,  
qui suam Principi offerunt ope-  
ram, patet exemplo Friderici Jam-  
belli, machinarum bellicarum sum-  
mi ac sine pari artificis: qui ex  
Italia

Italia in Hispaniam profectus , diu  
tentaverat aditum ad Regem , ope-  
ram suam eidem oblaturus. Sed ad-  
missione dilatâ , & ad dilationem ac-  
cedente contemptu , abcessit inde fe-  
rox , interminatus , effecturum se , ut  
spereti hominis nomen aliquando cum  
lacrymis Hispanus audiret. Inde  
profectus est Antuerpiam ad Hollan-  
dos Hispanorum hostes : ubi in ho-  
rum , paulò post Urbem obsidentium ,  
perniciem , eas fabricavit machinas ,  
quibus ab omni sæculorum memoriâ  
nihil unquam portentosius auditum  
fuit : adeo ut multorum opinio fuerit ,  
ex ipsis Inferorum fornacibus ascen-  
disse ferales ignes , tonitrua & fulgu-  
ra de cælo magicis carminibus evoca-  
ta , pestilentem halitum ex Avernali  
lacu attractum , aquam ipsam præter  
naturam perurentem , ex ipsa Stygia  
palude derivatum esse. *Strada de  
bell. Belg. dec. 2.*



# CAPUT XL.

*De nimia credulitate & confidentia à Principibus vitanda.*

**N**imia credulitas & confidentia est occasio multarum deceptionum.

*Qui leviter credit, deceptus saepe recedit. Nullus vir gravis est in credendo Levis.*

Quapropter fiduciam Principis oportet esse oculatam & circumspiciendam.

*Fidendum est, sed videndum, cui fidendum.*

*Fide* igitur: sed *Vide*, cui fidas. *Vide*, quas notas probitatis improbitatisque gerat is, cui fidere cogitas. *Vide*, quid tibi de illius fidelitate meritò polliceri queas. *Vide*, an famæ vita, verbis facta, indici linguae horologium cordis corresponderent. Denique *Fide*



\* (171) \*

*Fide parum, multumque vide; nam fi-  
dere multum,*

*Et vidisse parum, Maxima damna  
parit.*

Optimum adversus hominum perversorum fraudes remedium est, *Fidere paucis, & parum.*

Prudenter Itali: *Chi non si fida, non vien ingannato.*

Prudens diffidentia principium est timoris, timor principium cautelæ, cautela principium securitatis, securitas principium salutis.

Noli itaque nimium fidere hominibus; quia homines facile & fallunt, & falluntur. - Fallunt ex nequitia, falluntur ex inscitia. Eorum incientia est docta ignorantia, opulentiæ speciosa mendicitas, munificentia palliatum mutuum, amicitia recta philautia, spes amabile somnium.

\*

\*

\*




## CAPUT XLI.

*Periculosam esse Principi nimiam audaciam.*

**M**elius est nimium cavere, quam nimium audere. Quia minus nocet in rebus securis metus, quam in metuendis securitas. Prudentia dicat, nihil per pericula faciendum esse iis, qui non sunt in periculo. Quanquam in periculis adeundis quædam est viro forti servanda mediocritas. *Qui omnia pericula timet, nihil aggreditur; qui nulla, facillime perditur.*

Itaque locus inter pericula medius est optimus: nonnulla subeunda fortiter, alia declinanda prudenter; præsertim si vires deficient. Sicuti enim vana est ira sine viribus (*l'ira senza forza non vale una scorza*) ita periculosa est audacia, si vires non suppetant Spiritibus.



## CAPUT XLII.

*Abstinentum esse Principi ab  
injusta rerum alienarum  
contrectatione.*

**I**N hoc mundo sunt quatuor con-  
ditiones & proprietates homi-  
num.

Prima eorum est, qui dicunt: *Quod  
meum est, tuum est; & quod tuum est,  
meum est.* Hi sunt idiotæ.

Secunda est eorum, qui dicunt:  
*Quod meum est, meum est, & quod  
tuum est, tuum est.* Hæc est conditio  
mediocris.

Tertia eorum, qui dicunt: *Quod  
meum est, tuum est; & quod tuum est,  
tuum sit.* Hi boni & pii sunt.

Quarta eorum, qui dicunt: *Quod  
tuum est, meum est; & quod meum est,  
meum sit.* Tales sunt nequam & im-  
pii, sed non impune.

Nam qui manum prædatricem

immi ttunt in bona aliena , plerumque  
pœnam talionis luunt. *Qui locupleta-  
tur rapiendo aliena, depauperatur amit-  
tendo propria. Chi d' altri si veste , pre-  
sto si spoglia. Poco saggio è colui , che  
perde il suo per acquistar l' altrui.*

In recenti Moscovitarum historia  
legimus, Tartarorum Principem po-  
culo ex capti Moscovitæ calcarea fa-  
cto , majusculis literis hæc verba in-  
scribi jussisse: *Hic homo aliena appeten-  
do propria amisit.*

E contrario felicem ducunt vitam,  
qui de felicitate rebûsque proximi  
nihil decerpentes , suâ sorte, suisque  
bonis ac donis contenti sunt , & for-  
tunam suis , non alienis facultatibus  
metiuntur.

Saluberrimum est monitum ,  
quod quidam his versibus comple-  
xus est.

*Esto quod es; quod sunt alij , sine quem-  
libet esse.*

*Quod non esse potes , non etiam esse  
velis.*

*Magna*

*Magna virtus est , magna non magnis conatibus sectari.*

*Non est modicum , modico contentum vivere.*

*Non è poco , il sapersi di contentar di poco.*


*Cuor contento , gran talento.*

*Contentezza passa ricchezza.*

Huic dictamini quia non obtemperarunt Græci , qui Anno mundi 3630. Siciliam instigante Alcibiade bello adorti sunt , ideo opes eorum hostili ferro concisæ fuerunt : amissis militum quadraginta millibus , captis navibus 130. captivis ducibus Nicia & Demosthene , reliquis in Latumias & servitutem abreptis.

*Discant , qui invadunt aliena , se casuros suis , nullamque gravioresse facturam , quam augmentum cupiditatis.*





## CAPUT. XLIII.

*De futurorum prævidentia  
& providentia ad officium*

*Principis requisita.*

**D**uo sunt Officij Principalis veluti cardines, *Prævidentia* & *Providentia*. Uttraque est malorum Medicina præservativa: Sed posterior paratu difficilior, quàm prior. *Facile est Videre, difficile prævidere, difficilimum providere.* Nemo tamen meliùs *providet* malis, quàm qui *prævidet* mala. *Cosa prævìsta, mezza provìsta.*

Omissio Providentiæ subsequam habet pœnitentiam. Sed optabilior est *Providentia*, quàm *Pœnitentia*. Sicut enim melius est non cadere, quam post lapsum resurgere; ita præstabilius est *providere*, ne pœniteas, quàm *pœnitere*, quia non providisti.

CAPUT XLIV.

*Principes debere esse patientes monitionum.*

**A**Pem propter aculeum non odisti, sed propter fructum mellis foves & nutris; cur igitur aculeatas Monitorum tuorum voces odisti? Dolendum est sanè, in Aulis Principum gratiores esse adultores, quàm monitores.

*In Aula pauci sunt Principis monitores, qui doceant, sed multi adultores, qui noceant.*


Nam pauci sunt, qui imitari audeant animosum illud facinus Meccenatis; qui, cùm aliquando Augustus Imperator multos esset morte damnaturus, nec Meccenas propter circumstantium coronam ad eum per-rumpere posset, inscripsit schedulæ hæc verba:

**SURGE TANDEM CARNIFEX,**  
tamq; in Augusti sinum projecit. Quâ

H 5 lectâ,

lectâ , Augustus statim surrexit , dimisitque quos erat interfectorurus. *Dio Cassius.*

Valde commendatur à scriptoribus historiæ Gallicanæ prudentissima pietas S. Ludovici , qui hoc monito filium successorem instruxit : *Ita te gerito , ut Confessarij & familiares tui possint te liberè admonere mali quod feceris ; Siquidem Natura humana in his rebus , quæ ad voluptatem pertinent , ad id sapius inclinatur , quod sibi detrimento esse solet , atque id unum profuturum putat , quod ipsa cupit perficere.*



## CAPUT XLV.

*Fraudulentam astutiam  
Principibus dedecorsam  
esse.*

**M**agnopere dedecet Principes animus fallax & dolosus , si præsertim vulpina astutia cum voluntate nocendi conjuncta sit. Principem oportet



oportet ita esse syncerum & fideliem, ut decipere non velit: ita prudentem & circumspectum, ut decipi non possit. *Decipere malignitatis, decipi simplicitatis est.*

Lex Christiana, uti candorem animi & columbinam simplicitatem suadet & approbat, ita duplicitem dolosamque astutiam, tanquam veræ prudentiæ inimicam, damnat & prohibet. Et sanè fraudulenta astutia non rarò infelices sortitur exitus. Quemadmodum enim ij omnes, qui animo sunt candido & sincero, versantur in amorib<sup>9</sup> omnium, & plenè rerum successibus lætantur; ita è contrario qui callidi sunt, & nectendis dolis student, incurrunt odia cæterorum hominum, multisq; sinistrae fortunæ jaculis confossi, malitirosæ calliditatis pœnas luunt.

Achitophel post tot fraudū laqueos aliis injectos, tandem & ipso collo proprio injecit laqueum, quo contaminatam animam infelici morte extrusit.

Jugurtha Romanorum triumphis  
Iudibrio fuit.

Tiberium proprius heres suffoca-  
vit.

Andronicus Imperator, qui pupil-  
lum vafre deceptum interemerat, effo-  
fis oculis, & dirum in modum lacera-  
tus à populo, vitam finit.

Ludovicus Sfortia, cùm tutelæ  
specie Mediolanensem Principatum  
ufurpaffet, spe potiundæ Apuliæ, Gal-  
los in Italiam accivit, ut Alphonsi fi-  
bi imminentis arma diverteret. Mox  
idem, quos evocarat socios, pessi-  
mis artibus prodidit, præcipuus do-  
lorum omnium eâ ætate in Europa  
faber. Sed tandem potestate exutus,  
spoliatus libertate, in arce Lochienfi  
conclusus, per decennium pœnas ve-  
ritati dedit, & extremum spiritum ex-  
hausit in carcere.

Complures alij amplexi sunt artes  
& strophas Tiberianas, Herodia-  
nas, Macchiavellicas: hoc est, sub-  
dolas, versipelles, pseudopoliticas;

qua-

*quarum pramium fuit vita anceps, spes  
lubrica, certus metus, incerta consilia,  
mors calamitosa, longum supplicium,  
posteritas aut nulla, aut brevis.*



## CAPUT XLVI.

*Prudentem simulationem  
non esse illaudabilem in viris  
Principibus.*

**N**on ego omnes Principum alio-  
rumque Politicorum simulatio-  
nes & dissimulationes damnaverim;  
cum non rarò tam prudenter usurpen-  
tur, quàm periculosè negliguntur.

*Aulice Prudentia centrum est simu-  
latio & dissimulatio.*

*Pleraque Politicorum stratagemata  
perficiuntur dissimulando quod est, &  
simulando quod non est.*

Simulatione profectò nonnun-  
quam est opus, ut nec videre, nec au-  
dire te sentiant alij, quæ tamen vides  
& audis.

*Magna prudentia est, simulare nonnunquam cecitatem in visis, & surditatem in auditis, juxta proverbium Arabibus usitatum: Esto inter homines surdus audiens, cecus videns, mutus loquens.*

In Historia Florentina refertur, quod, cum Joannis Viscontij Milites, qui Pisis in praesidio collocati erant, civium contumeliis irritatorum factione urbe pulsati essent; Galeatius increpando militum protervia, laudandoque cives, quod necessitate adacti militum injurias ulti essent, Pisas retinuerit. Quae urbs, nisi prudens simulatio intercessisset, confestim ad Hostes Florentinos defecisset.

Non est itaque probandus rigor ille Stoicorum, qui nusquam & nunquam simulandum viro cordato putant. Enimvero praecclarissimos viros simulatione nonnunquam usos esse, complures testantur historiae. Simulavit Abraham in Coniuge Sororem, & Jacob in seipso fratrem Esau. Simulavit

lavit David stultitiam, & Christus ipse  
*se finxit longius ire.* Lucæ 24. Notæ  
 sunt simulationes & dissimulationes  
 Magni Athanasij, quibus ille non se-  
 mel feliciter usus fuit. Laudabiliter u-  
 surparunt easdem Senatores Romani,  
 ne profundas Tiberij Cæsaris machina-  
 tiones, fraudes, insidias scire videren-  
 tur, damno suo, emolumento nullo  
 alieno, néve exasperarent commotum  
 Imperatoris animum, & occasionem  
 darent ad deteriora flectendi.

Et quis obsecro aut imperet hac  
 ætate prudenter, aut vivat hac tempe-  
 state feliciter, si, quidquid occurre-  
 rit, effundere cogatur, quacunque  
 fortunarum, gloriæ, aut sanguinis ja-  
 ctura? quis, cum de universa Repu-  
 blica agitur, aut de conjugum, libe-  
 rorum, opum incolumitate, non pu-  
 tet nocitura regi posse? Jam si quis  
 ferrum in alium parer, cogarne prode-  
 re rogatus latentem, ut extrahatur è  
 latebris jugulandus? nemo sanè, qui  
 fatuus non sit, consilio suo hæc appro-  
 baverit. Por-

Porro licet vir prudens simulare & dissimulare nonnunquam & possit, & debeat, cum aut privatum, aut publicum bonum id exigit; minime tamen laudandi sunt illi; qui simulationibus tam frequentibus utuntur, ut nihil certi promittere tibi ab eorum candore possis; adeoque nescias, sentiant quod dicunt; an secus. Ostentant illi se velle, quod nolunt; nolle, quod volunt, ambire, quod averfantur; averfari, quod ambiunt. damnant improbos, ipsi improbissimi: laudant probos, probitatis ignari: pietatem vultu præferunt, omnis impietatis mancipia: aliud ore promunt, aliud mente recondunt, sexcentis clavibus occlusâ, nulli unquam reeludendâ: quos cum tenere te arbitraberis, elabentur; quoque strinxeris magis, elabentur magis, lubricitate prorsus serpentinâ.

His omnibus tamen detestabiliore sunt illi Pseudopolitici, quorum est cum malevolentia conjuncta, studioque nocendi imbuta, simulationis & dissimulationis calliditas. Rera

Rem declarabit apologus, ex fac-  
tiis Poggianis desumptus.

Fortè gallo gallinaceo auctore, atq;  
duce, arborem excelsam gallinæ con-  
scenderant, cùm famelica vulpes ac-  
cedens, gallum placidè salutat: &  
quid tu, inquit, in sublimi agis? an  
tu nondum illa bona nova, nova toti  
animantium generi salutifera accepi-  
sti? Neutiquam, ait gallus: velim ea  
ex ore tuo, si citra molestiam tuam  
feri possit, percipere. Volo te par-  
ticipem facere magnæ lætitiæ, ait Vul-  
pes. Actus est conventus omnium,  
animantium, in eoque factum decre-  
tum de concordia & pace inter ea  
sempiternâ: ita ut deinceps nihil cui-  
quam ab alio infidiarum, injuriarum-  
que timendum sit. Quamobrem cum  
uxoribus & filiabus tuis descendas, ut  
hoc gaudium communiter agitemus.  
Sensit artem gallus, & artem arte alu-  
dens, lætum, ait, mihi que acceptum  
affers nuntium. Quibus dictis surri-  
gens collum, ac sese altius in pedes ex-  
collens

tollens, prospectumque longiorem cum admiratione simulans, quærente vulpe, quid videret, duos, inquit, canes bene magnos, patulo rictu adventantes conspicio. Hic vulpes, valere vos: mihi à fuga petenda est salus, antequam canes adsint. Ac mox se in pedes conjicit. Tum gallus, cur hinc fugis? quid pace inter animantes conclusâ metuis? Cui vulpes respectans, ait: ast mihi non constat, utrum isti duo canes conventui interfuerint, & senatusconsultum audiverint. Sic ars deluditur arte. *L'inganno trova l'inganno.*

In hac vulpecula Pogiana adumbratam cerno indolem Pseudopoliticorum, qui amant amicitias simulatas, sibi soli lucrosas, & cum aliorum interitu conjunctas.

Quòd si hæc hominum portenta è propinquo intueri cupias, ingredi quorundam Principum malè ordinatas pejùs moratas Aulas: ubi cernes fidem à perfidia exclusam, candorem animi



animi à duplicitate prostratum, simplicitatem columbinam ab astutiâ vulpinâ eliminatam. Datam fidem fallere, mille licet juramentis firmatam, inter eos quoddam elegantiae genus est. Si quis veritati studeat, censetur esse ingenij simplicioris, quàm aulam, aulicosque mores deceat. Fallere, socium circumvenire, pecuniam malis artibus parare, sua prodigere, aliena rapere, falsis sociorum delationibus, ad majora conscendere, aliorum everfionibus se suâque stabilire, sacra in profanorum subsidia evocare, ea demum consummata Aulicorû laus est. Ubi videris prolixè omnia obsequia deferentem, & verbis byssinis aureos montes pollicentem, alia omnia cogita, amicum ore refert, fors hostem animo circumfert. Erit, qui tibi semihoræ spatio millies dicant, *servitore, servitore*: & tantum *servit ore, servit ore*.

Jam quid ego memorem larvam hypocriticam, sub qua hi Personati impro-

probitatis Architecti non levia tegere nituntur facinora. Prætexunt illi justitiam, & est tyrannis. Præendant necessitatem, & est libido. Ajunt sibi propositum esse bonum publicum, & quærunt privatam. Jactant æconomicam prudentiam, & est avara tenacitas. Exhibent speciem auctoritatis conservandæ, & est Sathanica superbia. Configunt sexcentos titulos virtutum, & latent mille portenta vitiorum.



## CAP. XLVII.

*Quòd Fidelitas in Promissis  
deceat Principem.*

**U**Sitatum inter Hispanos fertur proverbium, ut si quis contra animi sententiam aliquid promittat, dicant esse *palabras de cumplimiento*: id est, *verba honoraria*, præsertim si à

Viro

Viro Principe proferantur ; cum ejus honori parum sint consentanea.

*Qui non præstat quod promissit, reprehensionem meretur, si est oblitus: magis etiam, si non oblitus. Oblitum fuisse, vix amici est: non præstare, cum recorderis, prorsus inimici est.*

*Chi promette, in debito si mette.*

*Il promettere è la vigilia del dare.*

At dicunt, qui infideles sunt in promissis: *Dominorum est promittere, rusticorum servare.*

Ego autem dixerim: *Si dominorum est promittere, rusticorum erit non servare.*



## CAP. XLVIII.

### *Quòd Perfidia dedeceat*


#### *Principem.*

**P**erfidia Principum uti Deo hominibusque exosa est, ita per læpe divinam humanamque experitur ultionem. Re-

Refert Antonius Bonfinius. *lib. 26. de rebus Hungar. decat. 3.* compositis inter Vladislauum Regem Hungariæ, & Amurathem Turcarum Imperatorem rebus omnibus, Hungarum violato fœdere bellum intulisse Turcis; eorûmque Imperatorem, cum suos in prælio non sine magna clade fugari conspiceretur, ad ulciscendam Christianorum perfidiam, vindicandûmque jus malè rescissæ pacis, deprompsisse è sinu codicem, quo formula fœderis cum Hungaro initi continebatur, sublati-  
que in cælum oculis, his ipsis, quæ subjicio, verbis Christum compellasse:  
*Hæc sunt Jesu Christe fœdera, quæ Christiani tui mecum pepigerunt, per numen tuum sanctè iurarunt, datamque sub nomine tuo fidem violarunt, perfidè Deum suum abnegarunt. nunc Christe, si Deus es ( ut ajunt ) & nos halucinamur, tuas measq; injurias ulciscere.* Vix hæc protulerat, cum repentè mutatâ belli alciâ, Turcæ animos relumpserunt, prælium redintegrarunt, & conjectis in  
fugam

fugam Hungaris, trucidatôque Rege  
Uladislaô, memorabilem victoriam  
reportarunt.

Carolus Audax Dux Burgundiæ  
cûm Lotharingiam occupasset, 250.  
Helvetios fide circumventos suspen-  
dio necavit, ac deinde arcem Gran-  
seium obsidione cinxit, quam præsi-  
dio tenebant 300. Helvetij : qui cûm  
fame & nitrati pulveris inopiâ com-  
pulsî deditionem fecissent, eâ condi-  
tione, ut cum suis reculis incolumes  
abire sinerentur, hostis perfidus eo-  
rum alios ex arboribus suspendendos,  
alios funi annexos, seriatim crudelissi-  
mè in vicino lacu submergendos cura-  
vit: non tamen impunè, quando tertio  
pòst die Helvetij cum valido exercitu  
aggressi, eum in fugam verterunt, &  
captis castris Burgundicis, prædâ in-  
genti, decies centenîs aureo-  
rum millibus æstimatâ,  
potiti sunt.



## CAP. XLIX.

*Quòd clementia Principis  
severitate miscenda sit.*

**N**on est alia virtus, quæ magis deceat Principem, quàm Clementia. Hæc est munimentum inexpugnabile, quæ tutum reddit Imperium. Malus Princeps invisus est, quia timeatur: & timeri vult, quia invisus est. Quem verò metuunt subditi, odierunt, & quem quisque odit, perire cupit.

Interdum supplicibus supplicium à Principe, Christianâ mansuetudine imbuto, condonandum est: neque semper delinquentium *pœnâ*, sed *pœnitentiâ* sæpius contentum esse oportet; cùm gloriosius Principi sit, *reatum*, quàm *rem* de medio sustulisse.

*Turpia sunt Principi multa supplicia, sicut Medico multa funera.*

Et nonne melius est, populo per clemen-

men-

mentiam dare causam *respirandi*, quàm per tyrannidem præbere occasionem *conspirandi*?

Omne imperium meliùs collatis beneficiis, quàm illatis suppliciis stabilitur. Beneficium enim nihil est aliud, quàm quoddam ab amore impressum vestigium, quod dum cernit subditus, illico amanti Domino colum submittit.

*Sopra l' amore de' popoli si stabilisce l' imperio. Chi seppe con arte pigliar il dominio de' gli animi, non havrà fatica nel maneggio del resto.*

*Tutto, puo, chi è Padrone de' cuori.*

*In regno felicitis regiminis clementia est moneta, quâ emuntur omnia à Principibus.*

Oportet tamen clementiam Principis esse moderatam, & velut oxymel ex dulci melle lenitatis, atque acri aceto severitatis temperatam.

*Nimia clementia non est Regis Virtus, sed Regni Virus.*

*Bonitas nimis magna, est bonitas minùs magna.*

*Non est ille bonus, qui ne malis quidem malus est.*

Indurata perversorum hominum malitia non ferenda, sed ferienda est; non tamen sine congruo temperamento: ut nec nimia asperitate exulcerentur, nec nimia benignitate solvantur subditorum animi.

In Insulis fortunatis, quas Canarias appellant, reperiuntur poma citrea, quorum alterum altero includitur: & alterum acrem, alterum dulcem habet medullam; teste Bedraddino in eo libello, quem de animi relaxatione, per sensus corporis percipienda, conscripsit.

Hujusmodi duplicem fructum, alterum acrem severitatis, non modò in Principibus, sed etiam in substitutis eorum Officialibus requisivit Imperator Trajanus: qui proinde his pro symbolo dare solebat *Fulmen super pul-*




*pulvillum*, cum lemmate, *lenis severitas*.

Hæc *lenis severitas* Principi, corruptos Reipublicæ mores emendaturo, prorsus necessaria est: ne, dum corruptum membrum altius secatur, detruncetur corpus, quod curandum, non perdendum erat.

Anno 1638. supplicium uni Cosacorum crudâ severitate illatum, totam gentem efferavit. Instaurata rebellio, inflatumque classicum tanto furore, quantus in plures annos etiam nū lævit.

Si Dux Albanus Gubernator Belgij severitatem clementiâ temperâisset, non fuisset subsequuta illa secessio, quæ fœderatos Hollandorum Ordines peperit, & nobilissimas Belgij Provincias à Monarchia Hispanica abstraxit. Itaque Rectores populorum sæpe revocent in memoriam illud symbolum, quo delectabatur Henricus Auceps Imperator: *Sit Princeps piger ad pœnas, ad præmia, velox.* Princeps denique sit instar apis, quæ ubique mella

fundit, aculeum verò non nisi necessitate coacta stringit.



## CAPUT L.

*Invigilandum esse Principi,  
ut Civitates, praesertim majores,  
prudenter gubernen-  
tur.*

**A** Ntisthenes existimavit eam Civitatem esse malè ordinatam & interitui proximam, in qua boni à malis discerni non possunt.

Carolus V. Imperator conjecturam malæ civitatis desumpsisse fertur à mala dispositione & ordinatione horologiorum, templorum & platearum.

Aliorum fuit opinio, luxum vestitum & conviviorum esse ægræ Civitatis indicia.

Nonnulli censent eas civitates vituperio dignas esse; in quibus sunt multi Me-

ti Medici & Jurisperiti: adduntque id profligatae in Republica disciplinae indubitatum esse argumentum. Atque hanc suam opinionem confirmant constitutione Antonini Pij Imperatoris, jubentis, ut minores civitates tantum quinque Medicos, Majores septem, Maximae autem, hoc est, Metropolitanæ urbes, decem habere possint. In Eadem opinione versatur Guazzus, qui *lib. de Civil. Conversat.* sic scribit: *Malum est indicium & presagium civitatis, quæ multis Medicis & Judicibus abundat. Alterum enim ex defectu propriae Virtutis, alterum ex crapula & otio originem trahit.*

Ego verò eam civitatem dixerim esse illaudabilem, quæ bono regimine destituitur. *Magna civitas Magnum malum, si Regimen malum.* Quapropter Principes dent operam, ut civitates, tanquam primaria Reipublicæ membra, singulari prudentiâ gubernentur: gubernabuntur autem, si ijs de idoneis moderatoribus prospec-

Etum fuerit. *Illa civitas est laudabilis, in qua sunt tria bona P. Nimirum bonus Pastor, bonus Prætor, bonus Præceptor. Dictum Caroli V. Imperat.*



## CAP. LI.

*Quod Regimen Principis  
Amoris potius, quam Timoris  
esse debeat.*

**M**etus est infidus benevolentia  
Magister, & invitus obedientia  
Minister.

Malè itaque Timore, vel solo, vel  
prædominante, gubernantur subditi.

Necesse est, ut multos timeat,  
quem multi timent.

*Chi in presenza ti teme, in assenza  
noce.*

Regentibus major ab amore, quam  
à timore securitas.

Hujus rei exemplum insigne cerni-  
tur

tur in Eberhardo Duce Wirtenber-  
genſi, qui, teſte Nauclero, ſuis ſub-  
ditis, quòd amore potiùs, quàm ti-  
more eos regeret, gratiſſimus fuit, &  
in hac parte laudis ſibi maxime pla-  
cuit. Cùm enim aliquando intereſſet  
ſolemni conventui Principum Ger-  
manix; aliis ſuarum regionum dotes  
efferentibus, hoc uno ſe alijs antecel-  
lere jactabat, quòd in cujuſvis ſubdi-  
torum ſuorum gremio vel in vaſtiſſi-  
ma ſolitudine ſomnum tutò capere  
poſſet.

Jam ſicut bono Principi non ſunt  
timendi ſubditi, ita è contrario nec  
bonus Princeps timendus eſt ſubditis.

Cùm Alexander M. interrogave-  
rit Diogenem Cynicum, an ipſum me-  
tueret? reſpondit Diogenes: *Quid*  
*es; bonum an malum?* reſpondente  
Alexandro, *Bonum*; dixit Diogenes:  
*Quis timet bonum*: Atque ita docuit,

Regem non eſſe metuendum,  
niſi ſe malum eſſe profite-  
retur.



## CAPIT LII.

*Quòd metus Principi è sub-  
ditis incussus prudenter dissi-  
mulandus sit.*

**S**I Princeps habeat subditos arro-  
gantes, temerarios ac refractarios,  
caveat ne animi pavescenris signa edat,  
& ex timore, nimiam erga pertinaces  
indulgentiam utatur. Valido hic freno  
opus est. Induenda pellis leonina; exu-  
enda ovina; ne dilaceretur à canibus  
ut ovis, qui canes coercere potuisset  
ut leo.

Inspiciant Principes exemplum Ca-  
roli Regis Angliæ, qui ob nimiam  
flaccescentis animi molliem, timidi-  
tatem & conniventiam, ab insolescen-  
te & arrogante Parlamento contem-  
ptus, bello impetitus, captus, & An-  
no 1649. 30. Januarij, subjecta secu-  
ri Cervice Regiâ, trucidatus fuit. Cùm  
è con-

è contrario, qui ei in regimine succedit, Tyrannus Cromwellius, armis & severitate metuendus, per gubernationij rigidioris nervum, dignitatem suam usque ad finem vitæ illæsam conservaverit: ac reipsa docuerit, rebelles subditorum animos non enervi & emasculatâ, sed acri severitate in officio continendos esse. Nam si Princeps ( verba sunt Taciti Politicorum Principis ) aut nimîa lenitate dulcis, se & læsam Majestatem negligit, aut salutarem severitatem inani clementiæ specie remittit ac humilem se exhibet, meritò contemnitur, cùm seipsum priùs contemserit. Verissimum est illud Senecæ: *Authoritatem tolle, & omnis Imperij contextus in partes multas dissiliet.*

Non est itaque prudentis Principis, edere signa timoris, à Proceribus aliisque subditis incussi.

*Prudentes Principes dum maximè timent, timorem maximè dissimulant.*

Quin potiùs illis debet esse timendus

aus Princeps, qui à Principe timeri cupiunt. Nohunt enim generosi Principes terrore ac minis vinci, inquit Tacitus, *Annal.* 29. Plerumque sibi ipsis exitium machinantur, quicumque suis Heris terrori esse cupiunt; præsertim si res ita comparata sit, ut minæ, quæ intentantur, & terrores, qui incutiuntur, destruere fortunam Principis, & convellere securitatem publicam videantur.

Talis fuit illa Comitissæ S. Pauli Connestabilis Galliæ velsania, quâ ipse Regis odium, & postremò sibi exitium accersivit. Describit eam Cominaeus 3, *Comment.* II. § 12.

Idem Henrico Guisio accidit; quem non antè Henricus III. Rex Galliæ metuere desiit, quàm jussu suo casum in Comitissæ Blesensibus viderit. *Thuanus.*

Nicolaus Piccinius, cùm meritorum suorum confidentiâ, à Philippo Vicecomite Placentiam laborum præmum peteret: additis minis, abiturum.




rum se à servitio , nisi votis annueret; maluit Vice-Comes cum Francisco Sfortia genero suo ( tum hoste ) in gratiam redire , quàm amico tam arroganti morem gerere.

Gaspar Colignius , factionis suæ nomine Francisco II. Regi Galliaë libellum supplicem obtulit , à nemine subscriptum ; publicè protestatus , à centum quinquaginta millibus hominum , ubi opus fuerit subscriptione manus propriæ signatum iri. Quæ jactabunda insolentia non modò Regi , ac Regni Moderatoribus Guisiis metum nullum incutere visa est ; sed indignationem potiùs auxit : quæ deinde Carolo Fratre Gallis imperante , in exitium Cædemq; Colignij erupit.

Plura ejusmodi tragica exempla suppeditat Gallia , quæ Thuanus , Gramondus aliique Gallicanaë Historiæ scriptores commemorant.

Inter recentiora est illud Bironij , qui , quia Henrico IV. Regi Galliarum clam metum injicere conatus fuit,

temeritatem hanc supplicio capitali  
expiavit.



## CAP. LIII.

*Princeps sit exmius cultor  
Justitia.*

**F**elicitatem esse genuinam Justitiæ  
sobolem, hoc ingenioso dictami-  
ne declaravit Numenius Stoicus:  
*Rex est opus Dei, lex est opus Regis, Ju-  
stitia est opus legis, felicitas est opus Ju-  
stitiæ.*


E contrario propter injustitias (in-  
quit Gregor. Tholosanus lib. 10. de  
Repub. cap. 2.) transferuntur regna de  
gente in gentem, Regiæ Domus &  
clarissimæ Familiæ extinguuntur, &  
sepe populus unâ cum suo Principe  
corrui. Idipsum confirmans Sopho-  
cles ait: *Ubi injuria prevalet, & quis-  
que quod libet facit, eam urbem existi-  
ma mox prasipientem ruituram.*

Ita-

Itaque Reges & Principes ab omni specie injustitiæ, tanquam à certa dignitatis suæ perniciæ abstineant; sibi-que persuadeant, lancem Justitiæ nec amore, nec odio, sed solâ æquitatis trutinâ librandam esse.

Ad hanc trutinam respexerunt olim Judices Curia Pariensis: qui, cum Ludovicus XI. Francorum Rex iniqua nonnulla edicta promulgari jussisset, constanter voluntati Regiæ obstiterunt: spretis minis & periculo capitis, quod, nisi Regi parerent, imminebat: Etenim Lancastrius Curia Præses, purpuratorum Judicum coronâ stipatus, Regem adiit, non ut culpam deprecaretur, sed ut mortem pateretur; cum diceret, se suosque Collegas mortem malle, quàm legis promulgationem pati. Quâ insigni constantiâ ac fortitudine perterritus Rex, legem abrogari, ac rescriptum lacerari jussit: pollicitus, se nulla deinceps edicta latituum, quæ Curia improbaret. *Ex Bodino.*

Major justitiæ cura eluxit in S. Ludovico Rege Gallia: qui, ut ab omni non modo injustitia, sed etiam periculo injustitiæ quàm longissimè recederet, inter alia multa sanctissima præcepta, etiam hoc filio suo dedit, ut in causis dubiis, ipsum & subditos concernentibus, semper contra se pronuntiaret.



## CAPUT LIV.

*Princeps sit Vindex scelerum.*

**V**Æ Reipublicæ, in cujus viscera scelerum impunitas, per damnablem Principis conniventiam, irrepsit.

*Malum est, habere Principem, sub quo nihil ulli liceat: pejus, habere eum, sub quo omnibus omnia liceant.*

Ruinam Regni mox interituri quatuor hæc signa prognostica, politico-  
rum judicio, præcedere solent: Immanis luxus & luxuria, Religionis mutatio,

no, factiones & dissidia inter optima-  
tes, scelerum licentia atque impunitas.

*Non censeo felicem Rempublicam  
stantibus mœnibus, ruentibus moribus.*  
Dictum Scipionis.

~~~~~

CAPUT LV.

*Accusatores ac delatores à
Principe coërcendos esse.*

SÆpe Principes, dum acculatores
nimium fovent, iniquitati nimium
favent.

Multi enim aut cupiditate Vindi-
ctæ, aut spe privati commodi ad accu-
sandum impelluntur.

In captura halecum, bellua quædam
marina, à nautis *Hille*, ab Olao Magno
Helius nuncupata, cum invictissima
conspiciat haleces retibus implicatas,
quasi malleo ferit navim piscatoriam,
monitura nautas, ut elevent retia jam
satis repleta, quò fiat ipsa illarum ha-
lecum particeps, quæ nautarum ma-
nus:

nus:

nus effugerint. *Nicolans Tulpinus in
quadam Epistola ad amicum.*

Ita quidam iniqui accusatores defe-
rant alios ad tribunalia Principum ,
monéntque ac suadent , ut eos in jus
vocent , carceri mancipent , sententiâ
judiciali plectant : non quidem amore
justitiæ , aut boni communis , *verùm
ut captorum spoliis ditentur opimis.*

Itaque Principes non præbeant fa-
ciles aures accusatoribus , nisi clavis
solidisque probationibus instructi
fuerint.

*Melior est excusatio , quàm accusatio ,
ubi deest probatio.*

Cephidus accusator acerrimus , apud
Julianum Imperatorem accusabat
Numerium furti. Cùm autem obje-
cta probatione destituta negarentur ,
accusator irâ percitus exclamavit : Ec-
quis nocens poterit esse unquam , si
negare sufficiat ? Cui Julianus , bellis-
simè dictum retorquens : Ecquis , in-
quit , innocens poterit esse unquam , si
accusare sufficiat ?

Mar-

Marcus Cato notissimæ vir integritatis, à Populo Romano *Prudens* appellatus, maximis Romanorum odiis exercitus est. Nam quadragies sexies accusatus, velut reus causam dixit, semperque absolutus est.

Aristophanes Atheniensis, teste Æschine, malevolorum odio quinquies & nonagies vocatus fuit in iudicium, sed semper abiit victor.



CAPUT LVI.

Adulatores ex Aulicis Principum proscribendos esse.

Adulatio est meretrix Aulica, cuius blanditiis sæpius, quàm hostium violentiâ opes Principum everse fuerunt.

Adulatores enim non utilitatem Principis, sed proprium commodum, cum incommodo Principis conjunctum, quærunt.

Adulationis principium est prava cupiditas.

piditas, medium inanis laudatio, finis proprium commodum.

Nam ad hunc scopum tot byssina adulatorum verba collimant.

Adulationis unctio est donorum emunctio.

Adulatoris laus est speciosa fraus. Laudat adulator, sed non est verus amator.

Quia non te, sed tua quaerit.

Move la coda il cane, non per te, ma per il pane.

Nocentissimam istam, & ex ipsis tartari faucibus in exitium Principum emissam pestem agnoscens Serenissimus Albertus Dux Bavariae, Serenissimi Electoris Ferdinandi hodie Boicam Regentis Abavus, inter alias praeceptiones & futurorum consiliorum actionumque Regulas, ab Ernesto filio, postea Electore Coloniensi, tunc verò studiorum causam Romae degente servandas, hanc etiam hisce verbis praescripsit: Mandamus, inquit, ut nullus ad colloquium filii nostri admittatur ex iis homini-

minibus, qui suis alloquiis, suggestione, aut alio quovis modo tenerum animum inficere atque corrumpere possent. Inter quos primo loco sunt perniciosissimi adulatores, qui tamquam præsens venenum fundentes, cane pejùs & angue sunt vitandi. *Hæc Serenissimas Alberius.*

Unde censent sanioris mentis Politici, hoc pessimum genus hominum in Republica nequaquam tolerari debere.

Tria hominum genera è Republica expelli debent (inquit Socrates) *Adulator in palatio, pulchra Meretrix in prostibulo, cupidus sacerdos in templo, falsus Iudex in tribunali, fraudulentus Mercator in foro.*



loquitur) *quies in seditionibus; in pace turbae sunt.* Siquidem isti, honores, quos quietâ Republicâ desperant, perturbatâ consequi se posse arbitrantur. Cicer. 2. in Catilin. Quintò homines pecuniarum cupidi. Unde Carolus V. Imperator (si fides habenda sit Thuano lib. 13. histor.) Ferdinandum Gonzagam, quòd in avaritiæ suspicionem venisset, Imperij Mediolanensis administratione submovit; & insuper auctor Philippo filio fuit, ut cōsultore in magnis negotiis uteretur: sibi enim ipsius prudentiam, & in consiliis dandis sagacitatem abundè perspectam esse; cæterùm ne ei provinciam ullam administrandam, aut munus aliquod committeret.

Itaque si hujus farinae homines, avaritiâ quandoque, vel ambitione, aut alio affectu pravo in transversum acti, conspirationem adversùs Principem inierint, aut seditionem concitaverint; ad officium Principis pertinebit, exclusâ omni morâ antequam
flam-

flamma sub doloſo cinere gliſcens, in
plenum erumpat incendium, conve-
nientibus remediis malo occurrere.
Neque ſpernenda principia, quòd vel
leviora, vel adhuc remota appareant.
*Primis eventibus aut metum, aut fidu-
ciam gignunt*, ut loquitur Tacitus;
at ſenſim ita creſcunt, ut eis poſtea
nulla vi reſiſti poſſit. Seriùs Ro-
mani opponere ſe Cæſari voluerunt,
cùm jam armis leges evertiſſet. *Fe-
ſtinandum itaque, antequam creſcat in-
valida adhuc conjuratio paucorum.* Ta-
citus lib. i. hiſt. Eſt quidem efficax
remedium, prima rebellantium Ca-
pita in diverſas factionum partes di-
ſtrahere; ſed majoris prudentiæ eſt
damna prævertere, quàm iis
poſtea afferre reme-
dium.

* * *

* *

CAPUT LVIII.

*Benigna meritorum remun-
ratio non negligenda Prin-
cipi.*

Rеспублика duobus pedibus con-
sistit, premio & pœna: alterutro
deficiente claudicat. Procliviorē
decet esse Principem ad meritorum
præmia, quàm ad demeritorum sup-
plicia. Obsequia præmio langue-
scunt negato, vigescunt collato. Nam
sub ingrato Principe nihil magnum
geritur, nec ulla heroica facinora pa-
trantur. Princeps ut plurimum non
colitur ac suspicitur, quia Princeps
est, sed quia præstita sibi obsequia
remuneratur, & præmia tribuit, ma-
gna magnis, minoribus minora: uti
Philippus III. Rex Hispaniæ, Duci de
Lerma redditus annuos 72. millium
aureorum, ob nuptias in Philippi IV.
sororem & Ludovicam XII. Gallia-
rum

rum Regem procuratas, donavit. Gu-
terius de Cardenas, quòd nuptias Ca-
tholici Regis Ferdinandi cum Isabella
conciliaſſet, urbes duas cum dominiis
vicinis præmii loco accepit.

Quòd ſi Princeps remunerationem
debitam negligat, negligentia hujus-
modi in ipſius Principis ac Reipubli-
cæ detrimentum redundat.

Cùm Martinus Schenckius, cele-
bris in Exercitu Hiſpanico contra Ba-
tavos militante Capitaneus, ſæpe rem
præclarè contra hoſtē geſſiſſet, præſer-
tim in prælio Herdenbergensi, in oc-
cupatione Bredæ, Noviomagi &c. &
nulla meritorum præmia reportaſſet;
ab Hiſpanis ſe contemptum ratus,
ad Hollandos defecit; quibus mi-
litans, ingentia Hiſpanis damna in-
tulit.

Solymanus Turcarum Impera-
tor dicere ſolebat, Principem uno Mi-
niſtro non niſi ſemel uti debere. Nam
fides Miniſtri (ajebat ipſe) eò uſque
ſyncera eſt, quò Domini gratiam
aſſe-

afsecutus fuerit: hac obtentâ non ampliùs bono Principis, sed Proprijs commodis studet.

Fatendum tamen est, hujus infidelitatis causam nonnunquam ab ipsis Principibus ortum ducere, quorum ingraticudo efficit, ut Ministri negotia eò flectant, unde sibi meritum præmiatrix utilitas promanare possit. Cùm enim Principes non nisi dum pluit, penulâ uti velint: & focum, quo se hybernis mensibus fovebant, æstate redeunte negligant; hoc est, cùm non ultra limites propriæ indigentiae & utilitatis Ministrorum operâ uti velint: Illi quoque demandata sibi negotia ita nonnunquam gerunt, ut Dominus eorum operâ nunquam carere possit: aut sicut piscator cùm se satis opulentum cernit, damnat ingratum laborem, retia rumpit, scapham compurit; ita qui in aulis rem fecerunt, malunt ad otium secedere, fruique partis, quàm sterilibus imposterum

K

offi-

officijs Principum suam operam impendere.

CAPUT LIX.

Moderatum Potentiæ desiderium permittitur Principi.

Mirandum est Principes quosdam, tametsi florentissimorum regnorum Domini sint, ijs tamen minimè contentos, semper nova belli agitare consilia, semper quietem suam & alienam turbare, semper de mittendis sub jugum nationibus exteris cogitare : cum non ignorent, Imperia in extraneos exercita, aut minimè diuturna aut certè ingentibus impensis periculisque obnoxia esse. *Alienigenam dominum nemo patitur lubens.*

Perfectò Hispaniarum Rex, Italicarum Provinciarum dominium, non nisi plurimâ arte Politica, immensâ pecuniæ vi, & perpetuis militum, castel-

castellorumque præfidiis conservat. Neque tamen efficere potest, quò minus jam à Gallis, indefessis Hispanicæ potentiae æmulis: jam ab ipsis Italiae Principibus, vel apertâ vi, vel arcanis artibus laceffatur.

Omniū tutissima sunt mediocria, omniumque decrescunt minime, quæ crescunt minime.

Exemplum cernis in Helvetiorum Republica: quæ tam expers ambitionis, quàm amans libertatis, tuendorum potiùs, quàm promovendorum finium cupida, non tam suis montibus, quàm Votorum modo circumsepta, alienâ hæctenus ambitionem fregit, dum suam compressit.

Potentia non semper intenditur, dum extenditur.

Legent hoc fortè, sed non credent, nonnulli Principes, quorum omnes curæ in eo versantur, ut villas villis, oppidis oppida, Urbes Urbibus, Provincijs Provincias, ad cumulum inanis, & brevi exspiraturæ felicitatis, adjiciant.

Perpendant hi ambitiosi Principes : Monarchiam, quam tot votis ardentibus expedunt, nihil esse aliud teste & iudice Sapientissimo Principe Maximiliano Electore Bavariae, quàm tria Suspiria : *Obtinendi, amittendi, retinendi*. Et, quid obsecro *Suspirijs* est levius ? imò quid gravius ? Sub gravissimo Monarchiae onere *suspirant* Reges & Principes, & nihilominus ad majora *aspirant*.

Suspirant Reges sub adepti pondere honoris, & tamen exoptant Majus honoris onus. Et quia semper ad majora *aspirant*, ideo semper *suspirant*, & nunquam *respirant*.

Porrò tria sunt, quæ hoc onus Monarchiae maximè aggravant, quia illud maximè exosum reddunt. 1. Ingenita omnibus cupido libertatis. 2. Ipsa Monarchiae potentia, cui facile invident alij. 3. Monarcharum partim experta, partim formidata insolentia in subditos, vicinos, &c.

*Ex lib. 3. Herodoti, in oratione Ottanis
contra Monarchiam.*

Circumscribant igitur Reges &
Principes ambitionem suam medi-
ocri potentiae cancellis, malintque
de Imperio Viribus *Artis* conser-
vando, quàm spiculis *Martis* ampli-
ficando, cogitationem suscipere.



CAPUT LX.

*Regimen Activum, non ex-
cluso Passivo, decet Prin-
cipem.*

TUtiſſimum eſt regimen acti-
vum, non excluſo paſſivo, opti-
mèque regit activè, qui ſimul etiam
regitur paſſivè. E contrario ut im-
prudenter, ſic infeliciter regunt illi
Principes, qui à ſuo regimine activo
ſecludunt paſſivum; eò quòd Mo-
narchico imbuti ſpiritu, ita ſoli re-
gnare cupiant ut nullis, præterquam
proprii conſilij ductu utantur.

Talis fuit Hieron Siciliae Rex ,
quem non aliam ob causam interfe-
sectum fuisse ajunt , nisi quòd rectè
monentiũ consilia contemneret , Se-
natus auctoritatem pessumdaret ,
leges , quas vellet , pro sua libidine
violaret.

Eodem errore peccavit Julius Cæ-
sar , qui non modò in Consulatu , sed
etiam in Dictatura nunquam Sena-
tũ consilio usus fuit . At meminisse
debuerat , Tarquinium Regem Ro-
manorum ejectum fuisse , quòd spre-
tã Senatũ auctoritate , suo arbitratu
omnia gesserit .

Impegit denique etiam in hunc
scopulum Ludovicus XI. Gallorum
Rex , qui nulla de re Senatum consu-
lebat . Sed tandem damno suo resi-
piscens Carolum filium ita institui
voluit , ut literas ipse non addisceret
præter hanc unicam sententiam :
Qui nescit dissimulare , nescit regnare ;
atque ita necessitate adactus , alie-
nis potiùs consilijs , quàm suis sa-
pere.

père, atque negotia gerere confue-
ſceret.

*Non multum ſapiunt, qui à ſe ipsis
Conſilium capiunt.*

Chi ſolo ſi conſiglia, ſolo ſi pente.

Rectè Siracides monet Eccleſiaſt.

32. *Fili ſine conſilio nihil facias, & poſt fa-
ctum non pœnitebis.* Et ſapientiffimus
Salomon Proverb. 3. *Ne ſis ſapiens apud
temetipſum.* Cæcutimus enim circa
propria placita, & (ut Curtius lib. 7.
ait) *in ſuo quiſque negotio habetior eſt
quàm in alieno: turbita enim ſunt con-
ſilia eorum, qui ſibi ſuadent.*

Appoſitiſſimè ad rem præſentem
loquens D. Chryſoſtom. homil. 9. de
laud. D. Pauli: *Licet, inquit, mirum in
modum ſapiens ſis, & proſpicias ea quæ
oportet, attamen homo es & Conſiliario
tibi opus eſt: & nonnunquam evenit,
ut ſapiens non videat quod oportet, &
minor, & hebetior clarè & cautè ea
proſpiciat.* Sapiens ille Moyſes, qui
tanta miracula operatus eſt, non ani-
madvertit rem, quam mortalium

plerique considerant: socer autem ejus, homo barbarus & obscurus statim animadvertit. Itaque Consiliariis omnes opus habent, etiamsi Moysi conferri possint. Multa enim sunt, quæ magni & admirabiles viri ignorant, quæ tamen parvi & abjecti scire solent.

Itaq; Consiliorum & Consiliariorum necessitas negari non potest.

Aberrat operatio, cui viam non monstrat ratio.

Un buon consiglio val più che cento mani.

Sed ne in discernendis bonis consilijs & Consiliarijs ab ineptis halucinemur, regulæ aliquot sunt necessariae.

Prima. Consilium non debet esse generis feminini.

Quid turpius quàm sedisse olim feminam in Senatu Romano?

Le Donne hanno vesti lunghe, è corto intelletto.

Secunda. Sicuti vina vetula & edentula magis conducunt corpori phy-

phifico , quàm horna : ita consilia
Senilia plus profunt corpori Politico,
quàm Juvenilia.

*Senex vinum , sanum vinum : Se-
nex vir , sanum consilium.*

Tertia. Illud est optimum consi-
lium, cujus inventor non differt ab
executore.

*Nemo melius consilium dat , quàm
qui ipse facturus est.* Livius.

Quarta. Consilia sint multa , sed
non multorum.

*Multorum manus , paucorum consi-
lium.* Symbolum Ludov. IV. Imper.

*Quid fieri debeat , tractato cum mul-
tis : Quid verè facturus sis , cum pau-
cissimis & fidelissimis vel potius ipse te-
cum.* Vegetius.

Quinta. Maturum est consilium,
cui assederint timor & cunctatio.

In consiliis sis testudo , in factis aquila.

Precipitis consilij affecla est pœnitentia.

Sexta. Ubi est multa consideratio,
ibi est optima consultatio.

Omne opus trinâ consideratione de-

bet praveniri: an liceat, deceat, expediat.

Septima. Bonum consilium facit bona *scientia*, & bona *conscientia*.

Illi sunt boni Consiliarij, qui non plus habent ad suadendum *scientia*, quàm ad bene suadendum *conscientia*.

Octava. Consilia tam diu tuta, quam diu tecta.

Nulla consilia meliora sunt, quàm qua ignoravit adversarius antequam facias. Vegetius.

In Insulis Balearibus hæc olim consuetudo recepta fuit, ut quoties de arcano aliquo vellent deliberare Senatores, in campum exirent, ibique foveam effoderent; versùs quàm inclinabant ora, & vota invicem consiliaque communicabant: finitâ verò consultatione, foveam illam terrâ replebant, atque reliquo campo complanabant. Innuebant nimirum, consilia sub silentio sepelienda esse.

Nona.

Nona. Perinde noxium est consilio malo acquiescere, & bono non acquiescere.

Veritatem hujus dictaminis grandi malo suo experti sunt duo Almeidae, Lusitani Heroes, Franciscus & Laurentius: ille Pater, hic Filius.

Franciscus Indiae Prætor, rerum gestarum gloriâ clarissimus, domum revocatus à Rege Lusitaniae, cum à Promontorio Bonæ spei non procul abesset, aquationem facere constituit. Quidam è Lusitanis in oppidum, quod inde quatuor millibus passuum aberat, concessit. Hi hominem bene exceptum dimiserunt, & ingenti ariete in amicitiae signum donârunt. Almeida illum cum alijs duodecim socijs in oppidum remisit, ut oves & boves coëmerent. Incolæ eos ad epulas invitarunt, & muneribus, quæ telus illa profert, affectos, cum gregibus, quos emerant, dimiserunt. In via factus est illis obviam homo quidam cum arietibus,

ut eos cum muneribus commutaret. Hic quidam ex Lusitanis: hunc, inquit, per vim abducamus ad Almeida, ut cum vestibus excultus ad suos redierit, eos nobis, arctiore familiaritate conglutinet. Is cum impeteretur, clamorem ingentem sustulit. Oppidani festinanter occurrunt, hominem è Lusitanorum manibus extorquent, eos faxis & lapidibus malè mulctant, & gregibus etiam spoliant. Hi reversi, ne id eis fraudi esse posset, rem longè aliter atque acciderat, Almeidae retulerunt, eoque rem suis perversis suasionibus deduxerunt, ut Almeida malo suorum consilio obtemperans, cum eâ gente bellum suscipiendum decerneret. Itaque mediâ nocte, cum centum militibus egressus, in oppidum ante lucem pervenit. Oppidani continuo opem sublatis clamoribus implorant. Accurrunt undique permulti cum faccis è corio crudo confectis, in quibus vim

vim lapidum congefserant ; ut Lu-
 fitanos , qui jam cum præda redi-
 bant , opprimerent. Gefstabant præ-
 terea jacula innumerabilia , non lon-
 ga , quibus erant cuspides hamatæ
 trium palmorum longitudine præ-
 fixæ. Cùmq; eſſent ſummâ cele-
 ritate præditi , facillimè poterant
 conjeſtis ſaxis & jaculis curſu ſeſe
 proripere , & rûſus eâdem celeritate
 in Luſitanos incurſare : quos æſtus
 adurebat , laſſitudo conficiebat , ita
 ut vix plantas in arena altiffimâ al-
 tiùs impreſſas evelleret. Almeida
 jaculo guttur tranſfixus procubuit ,
 genibus in terram flexis , & oculis
 ſublatis manus in cælum tendens :
 Vir probitate & liberalitate , rebûſq;
 geſtis immortalitate dignis admi-
 randus. Mirandum fanè ac deplo-
 randum eſt , talem ac tantum virum ,
 cujus in bello Granatenſi tam clara
 virtus extiterat , qui maximos in India
 exercitus fuderat , qui Imperato-
 ris Ægypti opes fregerat , qui multis

Regibus frœnũ iniecerat , temerario
suasu & ausu suorum inductum , à
paucis hominibus , nudis & inermi-
bus , non procul à belluarum feritate
distantibus , occisum , & eorum pe-
dibus conculcatum esse : Quinque
& sexaginta Lusitani in ea pugna
interfecti sunt : in quibus erant Du-
ces undecim , qui maximis in rebus
suam probaverant strenuitatem.
Creditum est , illos , quòd se insolenti-
us in prosperis successibus extulif-
sent , & victoriã nimis crudeliter usi
fuissent , eas pœnas divino iudicio
pertulisse. *Orosius lib. 6. rerum Em-
manuelis.*

Laurentius Francisci Filius, con-
siliij boni non acceptati, uti Pater
mali acceptati pœnas dedit. Is mul-
tis victorijs clarissimus, tandem in
portuChaulensi contra classemCam-
pforis Præfecti Ægyptij, pugnans,
sagittâ confixus fuit. Qui illi
aderant, cùm hortarentur, ut,
quando æstus adversus esset, &
ideò

ideo minimè posset in hostium na-
 ves invehì, regrederetur. Quòd
 consilium ille juvenili audaciâ mo-
 tûs, accipere nolens, aliâ rursus sa-
 gittâ vulneratus, à prælio tamen
 non destitit, donec quinque hostium
 triremes cepit, reliquas fugavit Na-
 varchi, cùm illum viderent saucium,
 magnâque militum partem vulne-
 ribus impeditam, cùm hortabantur,
 ne cum hostium prostrata navè con-
 grederetur; sed eam, & alias tor-
 mentis eminus usque eò verberaret,
 dum omnes deprimeret. Id consi-
 lium Laurentius aspernatus est;
 cùm diceret, naves hostiles esse ma-
 gnas, & omnibus rebus instructas,
 adeoque melius esse eas omnes capi,
 quàm demergi. Sequenti die cùm
 hostium classis se collegisset, Lusita-
 ni post mediam noctem clam vela fa-
 ciunt. Hostes insequuntur, præto-
 riâmq; navem, quæ agmen coge-
 bat, emissis telis remorantur, eamque unâ
 multæ circumveniunt. Quæ tormētū
 majoris

majoris globo perforata, aquæ magnam vim intra sentinam admisit : cujus pondere gravata, clavo dirigi nequaquam poterat. Fuit Laurentius à suis admonitus, ut in paronem ad eam rem paratum desiliret, quod posset ad suos confugere. Quo salubri consilio graviter ille offensus, minimè sibi decorum fore dixit id periculum devitare, in quo commilitones suos desereret. Erant tunc in navi septuaginta homines vulnerati, & triginta tantum sani. Hostes, cum cernerent, quàm acri animo Lusitani se ad resistendum pararent, eminus tantum rem gerebant : crebris tormentorum ictibus omnia personantibus. Laurentius hortator & spectator aderat, & omnibus rebus occurrebat, optimique Imperatoris officio fungebatur. Tandem cum femur illius pilæ ictu dilaceratum esset, se in sellâ ad navis malum collocari præcepit, & inde animo maximo imperans, suos hortabatur,

batur, ut virtutem factis egregijs ostenderent. Hæc maximis vocibus admonentem alia pila in pectus emissa interemit. *Orosius lib. 5. rerum Emmanuel.*

*****:*****

CAPUT LXI.

Regimen Passivum, non excluso Activo, suadetur Principi.

Eorum Principum regimen est passivum, non excluso activo, qui reguntur & regunt: Eorum vero *Passivum, excluso Activo*, qui Regiminis aut ignari, aut pertæsi, non regunt ipsi alios, sed reguntur ab alijs, atque omnia per vicarios gerunt: ac proinde in vicarijs tantum & ministris inclarescunt, ac ditescunt.

Velle omnia facere manibus alienis, curare curis alienis, audire auribus alienis, ignavi, & rempublicam perdituri Principis indicium est.

Mi-

Miserrimum est Regnum , ubi hæ Principis voces audiuntur : *Videte , ut rectè omnia curentur : Facite prout vobis melius videbitur : Hæc Vestræ curæ commissa sunt.*

Hujusmodi Principes non sunt absimiles cuidam Prælato , omnia per Vicarios facienti, in quem non-nemo sic lusit.

*Ad noctis horas per Vicarium surgis ,
Horas diurnas per Vicarium cantas , A-
nimas tuorum per Vicarium pascis , A-
nimas vinclis per Vicarium solvis , Con-
vexa cæli per Vicarium vises.*

Optimè regit ille Princeps, qui & regit & regitur : regit Imperio , regitur Consilio.

Regere , & non regi , præsumptio-
nis : regi & non regere , infirmitatis :
regere pariter & regi, perfectæ virtu-
tis est.

Hæc duo proinde cordatus & ma-
gnanimus Princeps ita conjungat ,
ut alterum ab altero nocituro di-
vortio sejungi non patiatur.

Qua

Qua in re præclare se gessit Stephanus Batorius Rex Poloniæ. Qui cum à suis contemptui haberetur, talibus capistris frænari insolens, quâ erat animi fortitudine, generosè denunciavit sceptri reverentiam fastidientibus, liberum se hominem natum; nec victûs, nec amictûs, antequam in Poloniam veniret, indigum, ab ipsis vocatum, invitatum, rogatum venisse, atq; ab eorum manibus coronam capiti suo impositam; jam igitur non pîctum nec fictum, sed verum Poloniæ Regem se esse, qui regnare & possit & velit, quique ipsos imperandi Præceptores pati nolit.



CA-

CAPUT LXII.

*Ministri prioris Principis
prudenter retinentur à Suc-
cessore.*

SI prioris Principis Consiliarij & Ministri sint viri prudentia, fide, morumque integritate spectabiles, imprudenter à novo Principe amoventur : propterea quòd illi rebus gerendis jam exerciti, & prioris gubernationis magis gnari sint, quàm qui noviter officijs admoventur. *Ne derelinquas amicum antiquum ; novus enim non erit similis illi.* Ecclesiast. 19.

Ludovicus XI. Rex Galliae, quòd relictis sibi à Patre Consiliarijs minùs credidisset, eorumque salutaribus monitis atque consilijs non obtemperasset, in eas redactus fuit angustias, ut proximè abfuerit à perniciè, & Coronæ Regiæ amissione : exorto eam ob causam atroci bello, quod

quod *Commune bonum* appellabatur. Unde Ludovicus suomet periculo sapere doctus, ante mortem Carolum filium à mutatione veterum Consiliariorum gravi oratione dehortatus est.

CAPUT LXIII.

Ineptos Consiliarios & perversos Judices à Principe removendos esse.

CUM satius sit non admovere officijs peccaturos, quàm ubi peccaverint, amovere; ad prudentiam Principis pertinebit, ante electionem Officialium (præsertim Consiliariorum) accuratâ mentis indagine, maturoque judicio, aptos ab ineptis secernere.

Porro inter ineptos Consiliarios meritò inprimis numerantur illi, qui sibi ipsis malè consulunt. Nam qui rebus proprijs malè prospexerit,
nun-

nunquam ille benè consuluerit alienis.

Deinde à munere Consiliarij Politicorum quorundam iudicio (recto, an pravo?) rejiciuntur extranei, ob 4. causas. 1. quia tales solent turbare statum reipublicæ. 2. Quia rarò ipsi morum & ingeniorum totiùsque Reipublicæ periti sunt. 3. Quia, ut non desit ipsis peritia, sæpè tamen deest affectus & fides: & plerumque ad commodum suum, aut arbitrium Principis videbis plerumque ab ijs referri. 4. Quia usu comper- tum est, consilia externa ferè esse infau- sta. Ita sentiunt illi, sed ideò minùs prudenter, quòd acerbita- tem sententiæ suæ nullis mitigent exceptionibus.

Tertia classis eorum est, quorum intentio cùm prauitate aliquà infe- cta sit, tantò tamen artificio eam conte- gunt, ut vix ab oculatissi- mis Principibus satis perspici possit. Et sanè non leuium in Republica ma-
lorum

lorum fons est, quòd Principes in Concilijs non satis attendant, & perpendant, ad quam metam singulorum consiliariorum vota & suffragia colliment. Sæpè enim illi in consultationibus non publicum (quod Princeps intendit, & æquitas suadet) sed privatum quærunt commodum.

Misera est illius Principis conditio, qui iudicio proprio destitutus, consiliariorum in diversa tendentium dissentientibus consilijs distractus, neque fidem cujusque, neque occultos fines, favore, odio, ambitione, avaritiâ corruptos, discernere atque intelligere potest. Hanc bonorum consiliorum pestem, nec cautissimi Principes unquã satis coercuere.

Exemplis res innotescet. Ludovico XI. Galliæ Regi bellum contra Carolum Burgundiæ Ducem suadebat Comes S. Pauli, speciosis sanè argumentis, sed consultori, quàm Regi utilioribus. Nam minorem in pace aucto-

auctoritatem, in bello summam Comes potentiam, quadringentorum equitum cataphractorum stipendium, & triginta millia Francorum in pensionem annuam habiturus erat.

Post pugnam ad Tarum in Italia commissam, in Concilio Caroli Regis Galliae quærebatur, pax an bellum placeret? Et quanquam omnia Gallis adversa pacem suaderent, Trivultius tamen & Ferrariæ Dux bellum præferebant: Ille odio in Ludovicum Sfortiam: Hic spe recuperandi, quæ à Venetis sibi erepta querebatur, impulsus.

Georgius Cardinalis Ambosius Ludovici XII. Regis Galliae arma, in perniciem Alexandri VI. Pontificis & Cæsaris Borgiæ parata, suis consilijs divertit: privato beneficio sibi Papam obligaturus, & per famam defensi patrocínio suo statûs Ecclesiastici, ad Pontificiam dignitatem sibi paraturus aditû. *Gucciard. l. 5. hist.*

Inter

Inter Belgicorum motuum initia, cum in Aula Hispanica de modo reducendi Batavos, qui à Rege Hispaniæ delciverant, præsentè Rege disceptaretur: Proceres in duas oppositas sententias distrahebantur. Rodericus Dux Feriæ & Bernardus Freneda pacem: Dux Albanus & Cardinalis Granvellanus bellum suadebant. At omnes eò collimabant, ut suam quisque potentiam, excluso æmulo, conservaret. Nimirum Ducis de Feria, hominis in Aula dominantis, consilium erat pacificum; ne, si pax bello turbata esset, negotiorum arbitria essent penes alium rerum bellicarum peritum, & sua ipsi potentia, quæ pace duntaxat nitebatur, aut penitus periret, aut certè plurimum minueretur, Similia Freneda, artes aulicas edoctus, & miti vir ingenio cogitabat. At verò Dux Albanus arma spirabat, vehementi vir ingenio, & qui sibi summum armorum imperium commitrendum certò noverat.

Haëtenus de ineptis Consiliariis. Quod attinet ad perversos Judices, omnino Reipublicæ interest, eos aut tribunalibus nunquam admoveri, aut admotos quamprimum removeri. Etenim corruptâ per corruptos & corruptores Judices in aliquo Regno Justitiâ, omnem pariter in eo felicitatem corrumpi necesse est. Cùm enim Justitia sit Regnorum Imperiorumq; basis: hac per fraudes nequitiasque perversorum Judicum corruente, quo obsecro fulcro impulsa in ruinam Respublicæ prosperitas sustinebitur?

Perversi autem sunt Judices, qui cùm habeant centum manus ad capienda munera, unicam tantùm habent aurem ad audiendum.

Qui statuit aliquid parte inauditâ alterâ, æquum licet statuerit, æquus tamen non est.

Perversi Judices sunt, qui festinatis præcipitatisque sententiis de morte vitæque hominis decernunt. Contra quos Cæsar dictator ajebat, de vita
& spi-

& spiritu hominis, qui divinitatis pars est, laturum sententiam, diu multumque cunctari debere; nec præcipiti studio, cum factum sit irrevocabile, agitari.

Nunquam tardum existimari debet, quod est omnium ultimum.


Laudandus Mauritius Imperator, qui tardissimus erat ad irrogandam capitis poenam; quod delicta poenitentia, quam supplicio sanari melius putaret.

Perversi Judices censentur, qui vel Actori, vel Reo plus favent, quam æquitas causæ permittat.

Actori in principio litis, Reo in fine, utrique in medio favetur.

Perversi denique Judices sunt, qui dum se ab amore æqui bonique averunt, justitiam pervertant. Hi audiant (& contremiscant) illam Sapientia 6. comminatoriam allocutionem : *Audite Reges & intelligite: discite Iudices finium terra. Præbete aures vos qui continetis multitudines, & pla-*

cetis vobis in turbis nationum; quoniam data est à Domino potestas vobis, & virtus ab altissimo, qui interrogabit opera vestra & cogitationes scrutabitur; quoniam cum essetis Ministri Regni illius, non rectè judicastis, nec custoditis legem Iustitiæ, neque secundum voluntatem Dei ambulatis. Horrendè & citò apparebit vobis, quoniam iudicium durissimum in his, qui præsumunt, fiet. Exiguo enim conceditur misericordia; potentes autem potenter tormenta patientur.



CAPUT LXIV.


Rationabile esse, ut Princeps majorem indigenarum, quàm exterorum in distributione honorum & Officiorum rationem habeat.

TAmetsi spiritus nationalitatis, utpote laudans vel vituperans nationem, & non propter rationem, in viro Principe nequaquam laudandus sit

fit (cùm boni viri , uti & boni vini , non fit inquirenda origo : & serenissimæ Christianæ Reginae Sueciæ judicio , duæ tantùm sint nationes in mundo : una proborum , altera improborum) prudenter tamen censent politici , extraneos , cùm de promotione ad honores & officia agitur , indigenis à Principe nequaquam esse præferendos. Nihil enim esse potest hac ataxiâ potentius ad invidiam , civiumque indignationem , atque pericula seditionum : ut superiore sæculo accidit in Regno Castellæ imperante Carolo V. qui externos , posthabitis indigenis , illi Regno præfecerat. Existimant enim Subditi sibi injuriam irrogari , si ab exteris mandata accipiant , aut inter eos præcipuæ dignitates distribuantur. Quid enim istud est aliud , quàm palàm ostendere , deesse in regno proprio viros ad officia idoneos ?

Mihi placet prudens judicium Antonij Perezij , qui *in jure publico* de hoc argumento sic loquitur : Si leges fun-

damentales Regni peregrinos rejiciant, iis standum est: si verò nihil disponant, fuit illi nonnunquam admittendi, in quibus singularis viget virtus & prudentia: sed id cum modo, ne tandem in peregrinorum potestatem Regnum deveniat. Quibus tamen anteponendi indigenæ idonei; quia charitas ordinata à se incipit. Durum & crudelitati proximum esset, sitientibus agris propriis, ad aliorum usum ex tuis prædiis aquam propagari, ut ait Claudius Imperator *L. 6. de servis*. Hæcenus Perezius.



CAPUT LXV.

*Non expedire, ut Princeps
venda officia Reipublica, præ-
sertim Judicialia.*


Periculosæ sunt officiorum, præsertim judicialium, nundinationes.

nes. Verendum est enim, ne, qui potestatem sententiæ emit, sententiam ipsam divendat.

Aliter sentit Gallia, in qua ex venditionibus officiorum 20. annorum spatio in ærarium Regum 46. milliones Coronatorum illati fuere. Quam Venditionem Galli legitime fieri arbitrantur exemplo Venetorum, qui cum in bellum contra Ludovicum XII. Regem Gallia gestum quinque milliones ducatorum insumpsissent, ut exhaustum ærarium denuò reple-
rent, officia publica & Magistratus vendiderunt: unde 90. Milliones (si
vera narrat scriptor turbarum
Gallia) compara-
runt.

* * *

* *



CAPUT LXVI.

*Consilia de rebus agendis à
Principe occultanda, & ante
tempus non evulganda
esse.*

Consilia de negotiis alicujus momenti tam diu occultanda sunt, donec negotium vel ad exitum, vel certe eò usque perductum fuerit, ut jam impediri non possit. Nam aliàs multi, sive amore & spe commodi allekti, sive timore incommodi perterrefacti, vel invidiâ & æmulatione permoti, conatibus obsistent; imò vim totam consilij adversus auctorem illius convertent.

Quemadmodum cuniculi subterranei, magni aliàs in re bellica usûs (si effectum sortiantur) detecti plurimum fuisset auctoribus obesse solent; ita Principum Consilia in vulgus

gus edita, & non eâ, quâ decet, religione secreti occultata, hostes instruunt, & his potius, quàm ipsis consiliorum auctoribus profunt.

Inter omnia Reipublicæ Venetæ præclarissima instituta, quibus illa in hunc usque diem, raro Aristocratici Imperij exemplo, viget florétque; non aliud mirabilius esse Boccalinus asserit, quàm quòd præcipua negotia Senatui Rogatorum, qui plus quàm ducentis & quinquaginta Nobilibus constat, consultanda & expedienda permittat; & tamen summum horum omnium, simillimūque oblivioni silentium, cum summa fide conjunctum, expectariatur.






CAPUT LXVII.

*Non expedire, ut Princeps
in Concilio prapropere sen-
tentiam suam manifestet.*

DUm res aliqua in consultationem adducitur, non expedit Principem, quid sentiat, manifestare, antequam Consiliarij omnes sententiam suam exposuerint; ne ipsis *assentiendi necessitas imponatur*, Tacitus. 4. Annal. & loquendi libertas, quæ consiliorum est anima, eripiatur. *Silere autem* (inquit Polybius lib. 9. in princ.) *non linguâ tantum oportet, sed multo magis mente.* Multi enim sermone tantum celantes, ipso aspectu & vultu revelârunt sua decreta: Propterea quòd vultus atque frons sit animi janua, qua significat voluntatem abditam atque reclusam. Cicero de petit. Consul.

Imperator Tiberius dicere solebat,
ut scri-

ut scriptum reliquit Dio Cassius lib. 57. Principis animum nemini cognitum esse debere, eumque intellectum magnorum esse causam malorum: præsertim si de negotio gravi in Concilio disceptetur. Unde Polybius in narratione rerum gestarum à Philippo Macedonum Rege lib. 4. encomij loco ait: *Post omnes Rex sententiam dixit.*



CAPUT LXVIII.

Arcana Status non esse à Principe propalanda.

OMnia Imperia habent sua, quibus innituntur fundamenta, iisque accommodatas leges ac regulas, in quarum observatione totius Reipublicæ salus consistit. Atque hæc vocantur *Arcana Status*: quæ nemini nota esse convenit, nisi Principibus, & qui secreti Senatus pars sunt.

Hujusmodi secreta Imperij administran-

nistrandi mandata dedit. Carolus V. Cæsar Filio suo Philippo II. & Hic Philippo III..

Cleomenes Spartanus, teste Plutarcho in Vita illius, quòd Ægypti regni arcana perdidicisset, in illo ipso Regno jussu Ministrorum Regionum occisus est..

Apud Venetos nullum majus piaculum est, quàm nimia cum Senatoribus, quibus *Arcana Statûs* perspecta sunt, familiaritas. Nolunt enim illi (& sapientissimo sanè consilio) ab externis suæ Reipublicæ secreta explorari. Malunt haberi rustici, inhumani, contemptores, quàm Reipublicæ suæ arcana vulgari..



CAPUT LXIX.

Quòd Divisio Imperij à Principe vitanda sit..

PRudentes Reges & Principes plerumq; omnes Arithmeticæ Politicæ spe-

cæ species (præsertim *Additionem* & *Multiplicationem*) & addiscunt faciliè , & exercent libenter , præter *Disivio- nem* Imperij & potentiaë.

Anno 1501, Ferdinandus Hispaniæ, & Ludovicus Galliæ Rex, de dividendo Regno Neapolitano deliberarunt. Sed res intra deliberationem (rectiùs dixerim , simulationem) stetit. Nam impatiens societatis cupido regnandi , Arte Hispanicâ Gallum Regno depulit : & virtute Consalvi armante Ferdinandi Regis consilia , præclarissimum Regnum , magno Galliæ vulnere accessit Hispaniæ. Hic est illæ Consalvus , qui per 200. Urbes & 70. oppida Regi suo comparata , *Magni* cognomentum adeptus est. Qui tamen æmulatorum appetitus invidiâ tandem domi suæ doloris vehementia contabuit.



CAPUT LXX.

*De Arte medica, quâ periti
Principes morbis Reipublicæ
mederi solent.*

Irritati populi curandi sunt à Prin-
cipibus velut ikti à tarantula.

Hoc dictamen sequentibus verbis
declarat Danæus in Aphorismis Po-
iticiis. Is, inquit, qui læsus est à ta-
rantula (cujus punctura effugit visum)
jacet humi velut corpus mortuum, o-
culos & vultum inflammatum quasi
igne ostendens. Experientia docuit,
nullis medicamentis morbum hunc
tolli posse, nisi musicâ Utricularij.
Hic accersitus canere fistulâ incipien-
do, accuratè observat, quem mo-
tum corpore facturus sit læsus. Si
videt corpus immobile, mutat tonos
musicales: mox alios aliósque & di-
versos; nec cessat cantare diversimo-
dè, donec videat ægrotum incipere
habe-

habere aliquem sensum , movendo paulatim extremitates digitorum in manibus & pedibus : unde Utricularius conjectat, istum tonum esse accommodatum morbo illi abigendo. Fortiùs igitur insistit cantare illo tono , nec quicquam mutat , aut variat. Hac musicâ excitatus ægrotus, recipit spiritus, & quasi rumperet fortia quædam vincula, incipit robustè & furiosè movere pedes , crura, brachia, manus & totum corpus. Mox cum impetu è lectu profiliens, ac si demonibus corpus haberet repletum, incipit saltare integrum diem, adjunctos sibi quosdam habens saltum adjuvantes singulis diebus : qui non cessant, sed incumbunt isti operi , donec ægrotus veneno per motum istum penitus concocto, se sentiat à morbo liberatum.

Hoc modo beneficus Princeps & prudens Politicus conetur invenire aptum tonum & salutarem curam, morbis illis gravibus , quibuscum

Respon-

Respublica conficitur, tollendis;
 alioquin si ferro & igne velit curare
 malum, quod lenibus remediis curan-
 dum est; non tollet morbum in Re-
 publica, sed malo suo cum augebit.
Huc usque Danaus.



CAP. LXXI.

*Prudens accomodatio ad in-
 genia subditorum est lauda-
 bilis in Principe.*

Ille Princeps in regimine suo utitur
 ingenio, qui se subditorum suorum
 accommodat genio..

Hoc enim Deus ipse in gubernatio-
 ne mundi facere solet: ut observat
 Lipsius *lib. 2. de constantia cap. 9.* ubi
 ait: *Vides Hetrusca ingenia nimis alta,
 inquieta & excitata: Deus ea Principe
 coërcet; Helvetiorum sedata & mitia:
 libertatem indulget; Venetorum media:
 medium dat Regimen, scilicet Aristocra-
 citum..*

Præ.

Præterea Princeps consideret, & velut ex alto speculetur, quænam ingenia subditorum suorum sint magna, quæ exigua: quæ generosa, quæ abjecta & ignava. Ingenia generosa per *Verba*, abjecta & ignava per *Verbera*: illa *monendo* hæc *minando* gubernantur. Ingenia exigua, vel mediocria, facili negotio reguntur: secus magna & excelsa.

Magna Ingenia sunt magnis similia: navigiis, quæ merguntur faciliùs quòd magna sint, nisi gubernaculo pareant. Itaque Princeps cautè utatur operâ eorum. Ministrorum, qui Ingenio Magnò, Virtute non Magnâ præditi sunt.



CAPUT LXXII.

*Conservatio amicitia inter
Agnatos suadetur Principi.*

Boni Principes amicitiam cum suis Agnatis & Consanguineis magno studio

studio conservare conantur illaefam. Quòd si verò eventu aliquo sinistro (ut nihil est in rebus humanis firmum) violata fuerit, de eadem quamprimum reconcilianda & redintegranda anxie solliciti sunt. Sicut enim ex unitis humoribus bona corporis valetudo, ita ex Agnatorum amicitia firma sceptri securitas promanat.

Hinc Jacobus Magnæ Britanniae Rex, in Basilico suo amicitiam Fratrum Primogenito impensè commendat. Cyrus quoque Cambyfi filio suo sapienter suavit, ut agnatos & propinquos humaniter tractaret, ad evitandam discordiam, quæ plerumque inter Principes Consanguineos non sine sanguine terminatur.

Non è peggior lite, che tra sangue è sangue.

Inde enim oriuntur bella civilia (inquit Sprengerus in Bono Principe) quæ solis exteris emolumentum afferunt. Testis est Gallia, quæ ex discor-

ſcordia inter Regem & proximos Agnatos , vulgo *des Princes du ſang*, non rarò in maxima pericula conſecta , & plurimis incommodis affecta eſt.



CAP. LXXIII.

*Canta ſociorum electio eſt
actus Principalis Ingenij.*

NON eſt tibi eligendus in ſocium, qui tuus eſſe poſſit, cùm libuerit, Dominus.

Impacta eſt in hunc ſcopulum fortuna Joannis Palæologi, qui Anno Chriſti 1360. fœdus iniit cum Amurathe III. Turcarum Imperatore. Sed turpiſſimæ ſocietatis juſtiſſima pœna fuit, ſervitus Palæologi, qui Amurathis factus eſt vectigalis: titulo Socij in conditionem ſervi commutato.

CA-

te velut auxiliator, sit reipsa vitæ tuæ insidiator.

Audi fabellam Homericam. Mus felis sibi insidiantis ungues devitans, fuga ad lacûs ripam sese contulerat, ibique sitim pariter ac fatigationem haustâ aquâ levaturus constiterat: quem ubi rana conspicata esset, genusque muris non ignobile, atque etiam periculum vitæ impendens didicisset, aquarum illi hospitium, dorsumque, quo veheretur, amicè obtulit. Nec detrectavit Mus obsequium. Excipitur itaque mollibus Ranæ humeris, ferturque primo, insolita natatione lætus. Verum ubi spargi aqua vento, ranâque nonnunquam subsidere natatu altius cepisset, ac tandem hydrus ipsi infestus apparuisset, repentè rana sese ad tutiorem lacûs recessum recipere cepit; cum musculus serâ facti pœnitentiâ opem vectricis suæ inclamare, oblucri fluctibus, mergi aquis, rursûmque victor emergere; donec madido gravantè-

vantéque pilo , ac viribus sensim fractis , undisque vincentibus , hausta aqua animam interciperet.

Ita nonnunquam accidit inter homines , uti qui inani fiduciâ patrocinium alterius vel imploraverant, vel oblatum acceptaverant , versâ deinde Patroni benevolentia in malevolentiam, aut interveniente casu aliquo sinistro, pro speratâ salute incurrant perniciem , quam formidaverant.

Id accidit Pompejo , cùm post pugnam & cladem Pharsalicam se in Ægyptum contulisset , ubi ab Achillâ Servo Ægyptio interfectus est.

Illud denique sapientissimorum Politicorum consilium est , à Principe potentiore, sine multis cautelis , magnâque circumspectione , non esse petendum auxilium.

Docet nos hoc apologus, quo Hymerensibus olim ostendit Stesichorus, inconsultè ab illis Phalaris potentioris Principis protectionem admissam esse.

Equus

Equus, ait ille, pristinâ adhuc in protis libertate fruens, nullique jugo, aut habenæ obnoxius, dolebat infesta suis pascuis cervorum agmina imminere, & optimos quosque bolos præcerpere. Quare submovendi hujus consortij avidus, hominem adit, orâtque adversûs cervos ut sibi præstet suppetias. Non detrectat Homo. Itur in consilium, quâ ratione id optimè impetretur, ut ne tam impunè in pascua irrumpant cervorum agmina? ac denique placuit, ut armatum suis hominem telis equus in dorsum acciperet, atque habenas ore admitteret, quo consultam ab homine viam, directus ipse à prudentiore Magistro capesceret, Ita adversûs cervos felici expeditione processum est, partim fugatis, partim in prædam abstractis fenis. Sed equo deinde pristinam libertatem roganti; negavit homo id sibi fas videri; æquum enim esse, ut qui tam utilem ipsi navasset operam homo, rursus eodem ad suum com-

mo-

modum fruatur. Unde sub admissis
inconsultè habenis equo impofterum
serviendum fuit: exemplo pofteritati
relieto, non facile potentioris Do-
mini opem, nisi circumfpectè admo-
dum eſſe admittendam.



CAP. LXXV.

*Quòd electio mediorum &
executio intentioni finis à Princi-
pe constituti correfpondere
debeat.*


FAcile eſt Principem aliquid ani-
mo designare faciendum, ſed id
per idoneam electionem mediorum
executioni demandare, ſape eſt ad-
modum difficile.

*Multa designamus voluntate, quæ
non perficimus facultate.*

*E più facile volere, che volare. Ita-
que ad prudentiam Principis, & Con-
ſiliariorum ſagacem induſtriam per-
tine-*

tinebit, ita procedere in via *Intentionis*,
ut non aberrent à via *Executionis*: in
qua Politicorum iudicio, bonorum
consiliorum vis & efficacia potissi-
màm consistit.

*Consulere & non exequi, est concipe-
re & non parere.*




CAP. LXXVI.

*Periculosa & dubij eventûs
negotia per Ministros, & non
per Principem expedienda
esse.*

Non solent Principes prudentiæ
laude inclyti, personalem im-
pendere operam ijs negotijs expedien-
dis, quæ cùm sint gravia & ardua,
non carent insuper periculo, execu-
tioni annexo, & ancipiti eventui sub-
jecta sunt. Cùm enim ea sit Princi-
pum fortuna atque conditio; ut ne-
gotia, quæ sunt præcipua majorisque

momenti, ad famiam dirigere debeant: æquum est, eos non nisi tuta, & cum certa gloria conjuncta, sibi sumere expedienda; ardua verò, periculosa, & dubitabili successui obnoxia, Ministris atque Legatis permittere; ut si cœpta non succellerint, non Principis infelicitas, sed Ministri imprudentia appareat.




CAPIT LXXVII.

Quòd Præfecturæ immediatè & personaliter per Principem, non verò mediatè per substitutos Ministros conferenda sint.

O Status Cardinalis in Epistolis, imprudens quorundam Principum consilium improbat; qui non per se immediatè, sed per Provinciarum præsides, Civitatibus Recto-

res, præsidijsq; Præfectos imponunt. Hoc enim est munus Principis: ad quem pertinet, gratiosa per se, odiosa per suos distribuere. Nam aliàs si hic ordo invertatur, paulatim odium Principi, benevolentia Ministris conciliabitur: quorum alterum Principis dignitati, alterum securitati contrarium est.

Quo in genere, ut in plerisque aliis regnandi capitibus, graviter erravit Henricus III. Gallorum Rex: qui, cum Maximarum Provinciarum administrationem gratiosis in Aula hominibus tradidisset; ijsdem etiam, ut civitatibus, quos vellent Judices, arcibusque Tribunos ac Centuriones præficerent, potestatem fecit.





CAP. LXXVIII.

Quòd Conventuum publicorum, seu Comitiorum prudens ordinatio & directio ad Principem spectet.

IN Comitiiis cogendis Majestas, in ordinandis ac dirigendis prudentia Principis relucet.

Porro ad prudentem Comitiorum ordinationem ac directionem requiritur imprimis, ut qui illis intersunt, ad scopum boni publici, exclusis inutilium actionum ambagibus, colliment: ne cogamur credere verum esse, quod non ita pridem de Comitiiis Ratisbonensibus dixit quidam Politicus: *In protestatione convenimus, conveniendo compotamus, compotando consulimus, consulendo confundimus, confundendo concludimus, conclusa rejicimus, & salutem patrie non consideramus.*

Duo insuper in magnis Comitijis sunt præ aliis necessaria : annonæ abundantia , & animorum concordantia.

Eluxerunt hæc duo in Comitijis illis Polonicis , quibus Henricus Andium Dux in Regem Poloniæ electus fuit. Cùm enim eo tempore centum millia Equitum intra quatuor milliariū spatium circa urbem Warsaviensem diversarentur , quadraginta ampliùs dies non pabulum equis , non vinum hominibus , non carnes , non pisces , non cætera esculenta defuere : quòdque palmarium est , & fidem penè superat , nullæ simultates , aut rixæ toto eo tempore in tam numerosa nobilitate auditæ sunt.

In Comitijis Germanicis duo M.M. Multitudo & Mutabilitas : & duo P.P. Prolixitas & Prodigalitas vitanda sunt.

De multitudine Comitiorum Germanicorum scripsit Æneas Sylvius *Epist.* 72. in hæc verba : *Omnes Ger-*

manorum diata sunt fecunda, & qualibet in Ventre habet aliam. Estque credibile (quia femininum est nomen) libenter. impregnari dietas ac parturire.

De Mutabilitate Comitiorum nostrorum dixit Carolus V. Imperator, teste Lipsio *in Notis ad lib. 8. Politic. cap. 5.* Sicut viperæ Matres tollunt, ita Comitiorum Germanicorum posteriora decreta tollunt priora.

Prodigalitem denotat Conviviorum luxus & frequentia.

Prolixitatem efficiunt immodicæ & intempestivæ controversiæ de sessionibus: de quibus Joannes Samoisicius Magnus Poloniæ Cancellarius: *Germani, inquit, in suis Comitibus ferè nihil aliud agunt, quàm ut sessionibus digladiantur.*





CAP. LXXIX.

Quòd fœdera peritè à Principibus tractanda sint.

Fœdera prudenter & peritè tractantur à Principibus : Primò, si ea sanciant cum illis, de quorum fide & constantia, ac proinde de ipsorum firmitate fœderum prudenter dubitari non potest.

Cæterùm hujusmodi fœdera non censentur ea, quæ inter Reges & Respublicas seu civitates ineuntur. Hæc enim non sunt admodùm tuta & firma; propterea quòd Regum & liberarum civitatum res inter se naturâ suâ pugnent, ut scriptum reliquit Polybius : & rara sit Regum liberarumque civitatum concordia, ut asseruit Demosthenes.

Secundò, si mutabilitati fœderum congruenti aliquo remedio consula-

tur. Cæterum optima & expeditissima ratio conservandi fœdera illibata hæc est; ut ab ijs, qui fœdera paciscuntur, commune aliquod concilium, quod de eorum inter se controversiis postea cognoscat & judicet, communi consensu constituatur. *Fuit id observatum olim in fœderibus Atheniensium & Lacedæmoniorum.*

Tertiò, si fœdera paciscentes non nimiam in ijs fiduciam collocent; sed potiùs sibi persuadeant, in eorum firmitate fortunam suam tutò fundari non posse.

Fœderibus tantum inest efficacix, quantum mutabilis contrahentium voluntas permittit. Sæpe illa quàm facilè coalescunt, tam leviter rursus dissolvuntur.

A fœdere illo, quod inter Anglos & Hispanos contra Regem Gallix apud *Guicciardinum lib. II.* conflatum erat, post acquisitum Navarræ regnum, resiliit Ferdinandus Hispanus, nec adigi potuit ullo modo.

do, ut arma sua Anglis ultrà jungeret.

Cùm Clemens VII. Pontifex, Franciscus Rex Galliaë, ac Respublica Veneta, sociatis armis libertatem tueri, ac nimiaë Cæsaris potentiaë obsistere decrevissent; nullus initio erat, qui tanto copiarum militarium terrâ marique apparatû, brevi Italiam in pristinum statum restituendam non arbitraretur: re ipsâ tamen & experientiâ, ut sæpe aliàs, ita tunc quoque compertum est, fœdera plus auctoritate & famâ, quàm viribus pollere. Nam præter Laudem Pompejam occupatam & Cremonam deditione receptam, nihil memoratu dignum est gestum: quòd auxiliorum dilatione nihil satis utò tentari posset.

A fœdere illo, quod inter Pontificem Max. Hispaniarum Regem & Rempublicam Venetam adversùm Turcas initum est, primi omnium Veneti, quòd Hispanum suas tantùm utilitates consecrari suspicarentur,

M. S.

reces-

recesserunt. Quo facto ingens illa ad Naupactum victoria nihil omnino rei Christianæ profuit: & nostri, acquisitis navibus, regna amiserunt.

Et sanè non infrequenter Venetorum Respublica, non obstantibus fœderum vinculis, arbitrata est, fortunæ cursum propter incolumitatem publicam, obliquandum esse: ne navis Reipublicæ allisa scopulis naufragaretur, ut observat Forstnerus in notis Politicis ad Tacitum.

Docet id quoque Paulus Paruta Eques & Procurator S. Marci *lib. 5. histor. Venet.* ubi Dominicum Trevisanum, prudentissimum Reipublicæ Senatorem & S. Marci Procuratorem his verbis in senatu perorantem inducit: Cogimur parere necessitati temporum, & sæpe mutare voluntatem, propositum, amicos & inimicos, suspectam habere omnem externam potentiam, timere multa, fidere paucis, & perpetuâ vigiliantiâ aliorum actiones observare, ut ad illas insti-

instituamus nostras : habentes in ista inconstantia unum constantissimum propositum , conservationem statûs nostri, & magnitudinem Reipublicæ.

Trevisano adstipulatur Leonardus Hemus, homo gravis & prudens, variisq; tam domi, quàm foris pro salute patriæ negotijs exercitus. Ejus hæc sunt apud citatum Parutam *lib. 8. Histor.* verba. Non dubitavimus accedere modò huic, modò alij; quomodo nobis suadebat temporum ratio & utilitas nostra. Tertius decimus nunc annus est, cùm Regi Francisco fœdere juncti sumus. Verùm crescentibus Cæsareanarum partium viribus in Italia, nec comparentibus Francicis auxiliis; ita ut impossibile videretur impetum hostis sustinere, Cæsaris fortunæ cessimus : secuti consilium, quod nobis suggererat securitas rerum nostrarum, Cæsaris desiderijs morem gerentes, residuum copiarum Gallicarum Italiâ ejecimus. Verùm paulò pòst resurgente Galli-


câ factione , cùm ipse Franciscus Galliae Rex expeditionem suo ductu adornaret; relicto quod cum Cæsare nobis intercedebat, fœdere, veterem cum Gallo amicitiam confirmavimus: cui cùm adversè omnia, & præter opinionem successissent, dissipato exercitu ipsóque Rege capto, ut Victoris impotentiae tempestivè obviàm iremus, denuò cum Cæsare pacti sumus. Cujus magnitudo atque potentia cùm inciperet esse suspecta; ut primum in Rege Franciæ jam tunc liberato experiendorum armorum cupidinem advertimus, socios nos illis præbuimus, exigendis ex Italia Cæsareanis. Hæc non omnino duorum annorum spatio gesta sunt. Et certè sapiens fuit consilium servire temporibus; eo enim Rempublicam servavimus, eique cum dignitate pacem restituvimus. Hæc Hemus.

Henricus IV. Galliae Rex, cùm jam eò deducta res esset, ut pacem cùm Hispanis faceret, Anglis impedire

dire volentibus, fidemque datam re-
poscentibus, respondit : Reges non
aliter solere inter se pacem ac fœdera
facere, quàm cum hac tacitâ con-
ditione : ut quod rebus suis utile est,
semper amplectantur : quod perni-
ciosum est, cautè devitent. Itaque
à se exigì non debere, ut bellum pe-
riculosi eventûs cum iisdem pacem
rebus suis salutarem habere malit. *Os-
satus in Epistolis.*

Laudabile quidem est servare pa-
cta & fœdera, si salvis salvandis ser-
vari possint. At perditis fœderati
rebus, & nullâ nostrâ ope reparandis,
sejungere causam, & sibi consulere li-
cet. Stulta fides est, quæ tuum ami-
cum servare non potest, & te ipsum
pessumdat : præsertim si nihil sit,
quod illum tibi formidabilem reddat.
Cæterum tutissima reddit fœdera me-
tus mutuus. Quippe qui ea rumpere
vult, dum ambigit, an superior esse
possit, metuitque vindictam Socii,
absterretur.

Denique id universum de fœderibus dici potest, quòd incerta & anceps eorum sit conditio; sive illa cum vicinis, sive cum longè distitis ineantur. Priora enim sæpe insidiosa & periculosa (præsertim si fœderatus potentiâ prævaleat) posteriora plerumque infructuosa sunt; cum vix unquam auxilia necessaria in tempore transmittantur. Quod Itali significanter exprimunt hoc adagio: *L'acqua lontana non mai spegne fuoco vicino.*



CAPUT LXXX.

Monomachias, sive duella à Principibus Christianis nequaquam toleranda esse.

INter nocentissimas Christianæ Reipublicæ pestes, meritò numeratur feralis illa, & penitus rabiosa duellorum consuetudo, quæ cum tanto boni publici privatiq̃ue detrimento

mento conjuncta est , ut si illius incommoda accuratè perpenderent Principes , fieri non posset , quin ad eam efficacissimis remediis tollendam impellerentur.

Fateor equidem , non omnia prorsus duella , quæcunque ex causa vel oblata , vel acceptata , esse impietatis condemnanda ; quia etiam David cum Goliath decertavit duello , quod erat licitum & sanctum ; tum quia instigante DEO initum : tum quia auctoritate Regis Saulis ad necessariam Reipublicæ defensionem susceptum. Subinde enim licet bellum vertere in duellum , cum id publicâ authoritate fit , ut unius cæde multorum strages redimantur. Sic Romani bellum cum Albanis , verterunt in duellum trium Horationum cum tribus Curiatis , utrimque tergeminiis Fratribus. Similiratione S. Wenceslaus Rex Bohemiæ , à Radislao Duce Curmiensi Bohemiam invadente provocatus ad duellum , illud acceptavit ,

vit, ut bellum duello, & populi periculum suo discrimine redimeret. Deo igitur suppliciter invocato, equum vir sanctus conscendit; & mox ejus adversarius vidit illi ab Angelo hastam porrigi, se verò ab eodem hac voce moneri, *Noli ferire*. Quo viso perterritus ex equo defiliit, & ad pedes Sancti procidit veniam petens: quem ad parcendum, quàm ad ulciscendum paratiorem invenit.

Alia est ratio duellorum, quæ privatâ auctoritate, ad privatæ injuriæ vindictam, capeffuntur; hæc enim planè sunt vetita & inconcessa, nec à Principibus concedenda.

Sed nolo de hoc argumento quidquam ex meo sensu proferre. Habet enim modernus mundus impatientissimas aures, ad audiendum in hac materia veritatem: possétque videri periculosum, contra tot millia armatorum, in seipsos crudelium, ingratam proferre sententiam. Dixi, *tot millia*; quia constat ex Theophi-
lo

lo Raynaudo *lib. 5. de virtutibus*, in sola Gallia intra annos 30. tot cecidisse in duello, quot suffecissent ad numerosissimum exercitum constandum, ipsosque Turcas Christiani nominis hostes vexandos. Audiamus igitur, quid sentiant de hoc puncto alij me multò sapientiores.

Cornelius à Lapide, vir sapientissimus, & editis in scripturam sacram commentariis eruditissimis illustris, in Cap. 47. Ecclesiastici vocat duella planè illicita, injusta & scelerata, ideoque gravissimis pœnis à sacris Canonibus castigata.

À Concilio Valentino appellantur duellantes *Latrones cruenti, & homicide nequissimi*; prout observat Theophilus supra citatus.

Concilium Tridentinum *sess. 25. c. 19.* loquitur in hæc verba: Detestabilis duellorum usus, fabricante diabolo introductus, ut cruentâ corporum morte animarum etiam perniciem lucretur, ex Christiano orbe

penitus exterminetur. Imperator, Reges, Duces, Principes, Marchiones, Comites, & quocunque alio nomine domini temporales, qui locum ad Monomachiam in terris suis inter Christianos concesserint, eo ipso sint excommunicati, ac jurisdictione, & dominio Civitatis, castri, aut loci, in quo, vel apud quem duellum fieri permiserint, quod ab Ecclesia obtinent, privati intelligantur; &, si feudalia sint, directis Dominis statim acquirantur. Qui vero pugnam commiserint; & qui eorum Patrini vocantur, Excommunicationis, ac omnium bonorum proscriptionis, ac perpetuæ infamiæ pœnam incurrant; & ut homicidæ, juxta sacros Canones, puniri debeant, &, si in ipso conflictu decesserint, perpetuò careant Ecclesiasticâ sepulturâ. Illi etiam, qui consilium in causa duelli, tam in Jure, quàm facto dederint, aut alia quacunque ratione ad id suaserint, nec non spectatores, ex

com

communicationis, ac perpetuæ maledictionis vinculo teneantur: non obstante quocunque privilegio, seu pravâ consuetudine, etiam immemorabili. Hucusque Tridentinum Concilium.

Nicolaus Caussin, vir probitatis doctrinaque spectatissimæ, duella (inquit in *Aula sancta tom. 1. lib. 1.*) naturam hominis in omnimodam bestialitatem transferunt. Erutum è terræ visceribus ferrum quodammodo rubore suffunditur, dum se ad talem carnificinam videt adhiberi, & manu hominum exacui ad homines trucidandos. Hi miserandi homines, jam propter interpretationem unius voculæ, jam ex mera & futili cordis levitate, verbis aut scripto ad duellum se provocant; pugnae locum designant; arbitros, certaminis fautores, &, ut vulgò nuncupantur, patrones deligunt; orant, & exorant succedaneos, seu secundarios; qui cum sint animo tranquillo, & minimè accenso, probè animadvertunt, quòd

se vitæ periculo exponere contra hominem, qui se nunquam offenderit, imò nec innotuerit quidem, sit factum hominis cerebro destituti; nihilominus tamen eunt, tyrannicè tracti legibus vanissimi respectus, qui alio non nititur fundamento, quàm stultà hominum imaginatione. Speciem quidem exteriorem hominis nil formidantis præferunt, at verò cor interioris consideratione præsentis periculi timore incredibili concutitur. Locum secretiorem velut venificæ inquirunt, & nonnunquam ad splendorem lunæ hoc detestabile facinus perpetrant: non considerantes, quòd eos Deus tot oculis intueatur, quod lucent in firmamento sidera. Furor iste plusquam bestialis pro fine habet mortem corporis, æternam, & irreparabilem animæ jacturam, Dei inevitabilem iram, Principum & Magistratum manifestam indignationem, legum minas & fulmina, Justorum execrationem, ac tandē cæli terræq; maledictionem.

Conan-

Conantur illi, nescio qua honoris defendendi necessitate, inexcusabile hoc crimen quodammodo excusare, & veluti cohonestare; sed falluntur cæci, & se aliosque miserrimè fallunt. Longè alia honoris tuendi ratio ab homine Christiano miri & potest, & debet. In quem finem, duplicem à provocatis ad duellum doctrinam considerari velim.

Prima est, quam tradit Dominicus Bannez vir doctissimus, & primi subselli Theologis accensendus. Ne te abdas tenebris (inquit hic auctor) sed ambules in publico, non caperatâ, & contractâ sed exporrectâ & explicatâ fronte. Et si contigerit adversarios tuos tantæ esse temeritatis, ut te aggre-diantur, fac tunc ut te paratum inveniant ad justam tibi defensionem, quam lex naturæ cuiuslibet permittit.

Sed huic doctrinæ non acquiescit mundus. Responde ergo provocan-

voca.

vocanti ad duellum , quod Augustus Cæsar respondit M. Antonio , cum ab eo ad singulare certamen , seu duellum provocaretur. Is Antonio denunciari curavit , quòd ubi rerum suarum desperatione ad eam redactus fuerit rabiem , ut vitam oderit , alias se tunc inquisituro vias moriendi honestiores isto cruento furore.

Quid ad hæc ô Nobiles ? nōne & Augustus , qui oblatum duellum recusavit , nobilis fuit ? Quòd si dicas , illud Augusti responsum homine timido dignum esse : ajo ego , timidum illum interim primum mundi constituisse Imperium ; Antonium verò , qui eum ad duellum provocaverat , cum tota sua generositate , in sinu & brachiis feminæ obiisse inglorium.

Altera doctrina est S. Ephræsasyri , citati ab Aloysio Novarino *Opusc. Vari. Tom. VII. Epist. 42.* Ex qua duellantes , qui se necessariâ honoris sui


fui defensione excusare solent, liquidò intelligent, in quo verus Christianorum honor, & genuina gloria consistat. Gloria Christianorum (inquit sanctus ille) Dei præceptum est. Gloria Christianorum, Apostolorum & Prophetarum doctrina est. Gloria Christianorum, humilitas animi est, spiritalis paupertas, atque obedientia. Gloria Christianorum, psalmodia cum compunctione. Gloria Christianorum, pœnitentia cum lacrymis. Gloria Christianorum, mansuetudo & quies, omnibûsque se submittere, ac reverentiam tribuere. Gloria Christianorum est, dicere socio: peccavi tibi, ignosce mihi. Gloria Christianorum, advenarum & peregrinorum est receptaculum, atque compassio. Gloria Christianorum & salus est, semper mensâ suâ pauperes, orphanos, advenâsque excipere; hanc etenim domum Christus suâ præsentia nunquam destituet. Gloria Christianorum est, non sincere so-

lem

lem occidere super iracundiam suam, neque in inimicitia adversus aliquem obdormiscere. Gloria Christianorum, atque corona est, tribulationes sufferre, & non indignari.

Hucusque Sanctus Ephræsasyrus de vera Christianorum gloria: quam si duellantes præ oculis haberent, & pro scopo sibi præfigerent, de duellis, sub vanissimo honoris sui conservandi prætextu, ne cogitationem quidem susciperent.

*Non est Christiana generositas, sed
insana ferocitas, omnes de puncto hono-
ris exortas controversias acumine
gladij velle expun-
gere.*



CAPUT LXXXI.

De peritia Artis militaris Principibus necessaria.

CUm duo sint Regnorum vincu-
la adamantina, *Arma & Leges*;
non oportet Reges & Principes re-
rum bellicarum esse rudes & impe-
ritos. Constat autem ars militaris
permultis præceptionibus ac regulis,
ab ijs qui se rei Pemicæ Magistros
profitentur, traditis: ex quibus non-
nullas huic opusculo inferendas cen-
fui.

Regula 1. Princeps sit pacis amans,
dum bella gerit: bellorum providus,
dum pacem colit.

Regula 2. Nimia belli appetentia
amore pacis refrænanda est. Quam-
diu enim in pace vivere licet, non est
decorum Principi, ut arma sumat.
Hoc dictum semper in ore habebat
Martianus Imperator, pacis aman-
tissimus, cujus symbolum fuit: *Pax*
N bello

bello melior. Valeat igitur, & ad immanes Scythas relegetur symbolum illud Caracallæ: *Omnis in ferro salus.*

Si melior est una uncia pacis, quàm decem libræ victoriæ (ut ait Cardinalis Bellarminus) quanto melior erit una uncia pacis, quàm centum unciaë belli?

Tantò laudabilius est pace bellum avertere, quàm bello pacem quærere; quantò gloriosius est, in semente, quàm in segete mala excindere.

E meglio conservar la pace, che farla.

Regula. 3. De quovis bello suscipiendo prudenter & diu deliberandum est; præsertim de eo, quod est & longinquum, & periculosum; id est, quod adversus validum ac bellicosum hostem, & à nobis procul remotum, gerendum est. *Ex lib. 6.*

Thucydidis.

Regula 4. Quidquid ex æquitate & justitia faciendum est, licèt sæpe non ex dignitate Reipublicæ fieri videat-

deatur, nihilominus faciendum est, ut bellum, & imminens ex bello calamitas evitetur. *Thucydides loc. cit.*

Regula 5. Oportet Principem antequam bellum decernat, metiri vires suas, ne potentio rem laceſſat, non ſine honoris bonorũque fortunæ detrimento. Quâ in re videtur erraſſe Dux Sabaudia, quando uſus (rectiũs dixerim, abuſus) ſymbolo ſuo OPORTUNE, aggreſſus eſt Regnum Gallia viris & viribus longè potentius. At Rex Gallia Henricus IV. cuſâ monetâ, cujus altera facies inſcriptum exhibebat hoc vocabulum OPORTUNIUS, docuit non eſſe viri prudentis, fortio rem ſe provocare.

Non eſt tutum eos ledere, quos perdere non poſſis.

Regula 6. Cũ bellum perrarò eum finem habeat, qui ſperabatur, ut ait Thucydides *in oratione ad Lacedaemonios*, oportet Principes bella ge-

sturos cogitare, quis eorum exitus prudenter vel sperari possit, vel timeri debeat: neq; tantum de hoste invadendo, sed etiam de evadendo, deliberare.

Quod utinam præstitisset quondam Archidux Austriæ Leopoldus, qui habito cum Proceribus suis consilio, de invadendis Helvetis, & ad obedientiam revocandis, morionem suum, qui præsens omnia audiverat, percunctatus est, num consilia inita placerent? non placent mihi, respondit morio, quia omnes vestræ sententiæ ad invadendum spectant, nullus autem de evadendo mentionem facit. Præfagitio fuit, quam eventus ipse comprobavit; Dux enim cum suis occubuit.

Regula 7. Bellum aut inferimus, aut illatum repellimus ac propulsamus. Hoc Reipublicæ conservatio, illô Imperij propagatio quæritur. Ad illud spe impellimur, ad hoc metu cogimur. Hoc semper justum pi-
umque

simque est, & naturæ consentaneum, quæ vim vi repellendam suadet: Illud sæpe injustum, quia causæ, quibus res tam gravis cohonestetur, frequenter desunt.

Regula 8. Arma & leges fraternizant; quia arma legibus, & leges armis indigent. Itaque Principes inter arma legum, & inter leges armorum meminerint.

Regula 9. Arma sunt ingloria, quæ non suscipiuntur pro DEI gloria.

Quod agnoscens Henricus IV. Rex Gallia cognomento Magnus, Anno 1061. dexteræ filioli sui Ludovici XIII. recens nati capulum gladij inserens, DEUM exercituum precatus est, ut eo olim ad propagationem gloriæ suæ uteretur. *Bucelinus in Anal. Gallia.*

Regula 10. Non pietate minùs, quàm armis pugnatur in hostes.

Agnovit hoc Turcarum Imperator cùm dixit: *Ferdinandus* (hujus nominis Secundus, Roman. Imperator)

rator) *sanctus est, Deus cum illo est, & pro illo pugnat.* Refert Avancinus *tract. de virtut. Leopoldi Guilielmi Proleg. 1.*

Regula 11. Fortissimum in bello munimentum est fiducia in ope divina.

Veritatem hujus Regulæ Leopoldus Guilielinus Ferdinandi III. Frater chirographo suo contestari voluit, quando illo ipso die quo Cæsaris nomine primùm arma suscepit, hanc suæ virtutis tesseram hierothecæ de collo pendulæ inclusit: *Iesu quem timebo, quando tu non tantum mecum es, sed & meus es.* Idem laudatissimus Princeps, monentibus, ut adversùs glandes plumbeas loricâ pectus præmuniret respondit, *lorica nostra DEUS est.*

Regula 12. Auxilij divini imploratio, est optima ad victoriam præparatio.

Incluserat Serenissimus Leopoldus Archidux Augustissimi Imperatoris nostri Leopoldi Patruus, intra
ince-

mœnia Neoburgi ad fines Bohemiæ
Slangium, militiæ Suecicæ Ductorem,
cum numeroſo milite. Inſiſtebat
magnâ violentiâ mœnibus, ut ho-
ſtem ad deditiōem compelleret;
ſed nondum pertinaciâ expugna-
bat. Imminebat tempus aſſultui
deputatum, cū Archidux ad ſuos
converſus: *Miſſe, inquit, ſacrificium*
audiamus, & DEUS vecordem reddet
inimicum. Mirum dictū! ubi pri-
mū ſacra hoſtia præſentibus ſpe-
ctanda in altum ſublata fuit, audi-
tum è mœnibus deditiōis ſignum:
ad quod Sereniſſimus Archidux piè:
Sic hoſtes vincendi ſunt.

Regula 13. In formando exercitu à
ventre incipiendum eſt.

Ita ſenſit Colignius Admiralius
Galliæ, qui hoc dicto indicare vo-
luit, exercitui ante omnia de com-
meatu providendum eſſe. *Thuanus*
lib. hiſt. 42.

Regula 14. Gloria militaris non ce-
dendo, ſed cædendo: non feriendo,

sed feriendo: non fugiendo, sed fugando comparatur.

Regula 15. In bello lima ferri est aurum; & ferrum hebescit, quod ab auro non acuitur.

Regula 16. In bello locus medius est optimus; quia fortes tenent locum medium inter timidos & audaces.

Regula 17. In bello plus operatur largitio argenti, quàm explosio tormenti.

Li martel d'argento rompe le porte di ferro.

Regula 18. In bello maximarum momenta rerum sæpe momento temporis avertuntur & pereunt. Itaque celeritate opus est.

Anno 1620. Maximilianus Bavariae Dux, quinque dierum spatio superioris Austriae Proceribus concessio, intra quos velint necne mandatis Cæsareis parere, deliberarent; interim non elapsis adhuc illis quinque diebus, exercitum ad Provinciae limites

limites admovit : quâ celeritate percussos ad omnia obedientes Austriacos habuit.

Comes Mauritius Hollandicarum Copiarum Ductor, Anno 1591. Zutphaniam, Daventriam, Hulstam, Delfziel, Noviomagum, urbes egregiis propugnaculis munitas, paucorum spatium mensium in potestatem redegit : ut proinde non immeritò *Aquila volans, & Fulmineus terror Belgij* fuerit cognominatus.

Regula 19. In bello contra viros potius quàm contra muros dimicandum est.

Francisci Sfortiæ bellicosissimi Ducis sententia fuit, devicto hostili exercitu debellatum esse : at expugnatis Urbibus atque castellis, sæpe bellum longè majus superfuisse.

Regula 20 Patientia & constantia sunt duo Maxima ad bellum feliciter gerendum præsidia.

Cùm Anno 1550. sub auspiciis Mauritij Ducis Saxoniae Magdebur-

gum obsedisset Carolus V. Imperator, Urbs hæc licet in magnas redacta esset angustias, patientiâ tamen & constantiâ rem eo deduxerunt Magdeburgenses ut impetratis gratissimis pacis articulis, victores evaserint atque in gratiam ab Imperio recepti fuerint.

Regula 21. Felix belli eventus non tam quantitate militum, quàm qualitate obtinetur.

Roswurm egregius Polemarchus, septem Germanorum Militum millibus stipatus, quinquaginta Turcarum millia in fugam egit.

Alexander M. domiturus orbem terrarum, eduxit in aciem triginta millia peditum, & quatuor vel quinque millia equitum. Hac tam parvâ manu universum terrarum orbem utrum sit admirabilius, vicerit, an aggredi ausus fuerit, incertum est; cùm ad tam periculosum bellum delegerit. Alexander non juvenes robustos, ætate primâ florentes, sed

sed veteranos, & plerosque etiam emeritæ militiæ, qui cum Patre Patriisque militaverant: ut non tam milites, quàm Magistros militiæ electos putares. Ordines quoque nemo nisi sexagenarius duxit: ut si principia castrorum vidisses, Senatum te alicujus priscæ Reipublicæ conspexisse diceres. Itaque nemo in prælio fugam, sed victoriam cogitabat; nec in pedibus cuiquā spes, sed in laceratis erat. Ex adverso Rex Persarum Darius Alexandri adversarius, sexcenta millia militum æmulo suo opposuit: quæ non minùs arte Alexandri, quam virtute Macedonum terga verterunt.

Regula 22. Opulentum ærarium ad bellum est necessarium.

Bellum enim inexhaustus pecuniæ gurgis est: cui explendo non aurei Persarum montes, non fodinæ auri & argenti utriusque Indiæ suffecerint. Unde quidam Capitaneus Sebastiano Regi Lusitaniæ,

taniæ , cùm de expeditione in Barbariam suscipienda ageretur , ad id bellum tres torrentes requiri dixit. *Unum virorum, alterum commeatum, tertium pecuniarum.* Et Joannes Jacobus Trivultius Magni nominis Capitaneus, rogatus, quæ res in bello necessariae essent? respondit tres omnino necessarias esse: *pecunias, pecunias, pecunias.*

Atque hinc intelligere licet (inquit Klockius *de arario lib. i. cap. i.*) quanta plurimorum Principum sit incogitantia , qui tempore pacis nihil collegerunt pecuniæ , nihil seposuerunt ; sed omnia, quæ subditi volentes & nolentes contribuerunt, dilapidando perdiderunt, in res nihili profuderunt ; jam verò belli tempore vel solitas ad rapinas convertuntur, & subditos prorsus deglubunt & excoriant : pelli leoninæ plerumque vulpinam & vulpinæ leoninam asfuentes ; vel certè tantum æris alieni colligunt, ut solvendo non sint. Ita Klockius.

Re-

Regula 23. Bella ſuſtinent magis opes ſuperfluæ , quàm violentæ contributiones. *Ex lib Thucydidis.*

Regula 24. Bella conſilio, pecuniæ vi, & reſiſtendo magis, quàm aggrediendo conficiuntur. *Dictum Periclis.*

Regula 25. Bella vicinorum potentum , aut à vicinis quietis ſtatim extinguenta ſunt ; aut certè illi ipſi tandem ad eadem trahentur bella vel inviti, iſdémque magis involventur. Sic tota Græcia implicata fuit bello à Corinthijs & Corcyrenſibus primùm commoto.

Regula 26. Quando eodem tempore duo à diverſis Principibus bella imminent, non eſt utrumque ſimul ſuſcipiendum ; ſed cum eo , qui ſe æquiores præbet , priùs paciſcendum eſt , & ex parte metus tollendus. Sic Romani cum Carthaginiſibus fœdus iniêrunt ingruente tumultu Gallico. Sic Guſtavus Rex Sueciæ Germaniæ illaturus bellum, priùs inducias ſex annorum composuit

fuit cum Polonis , quæ postea accell-
sione 26. annorum auctæ fuerunt.

Regula 27. Polemarcho magnum
& longinquum bellum gesturo , nul-
lus hostilis locus ipsi infestus à ter-
go relinquendus est.

Ita Gustavus Rex Sueciæ in Ger-
maniam superiorem moturus , priùs
Pomeraniam , Marchiam , Saxoniam
subegit. E contrario Lautrechius
Dux militiæ Gallicanæ, quia Neapo-
lim adortus est, relicto, post se inex-
pugnato Mediolano, Ticinum po-
stea & Lombardiam perdidit.

Regula 28. Belli Ducem non o-
portet consumere tempus in occu-
pandis parvis oppidis & castellis, sed
primariam Urbem in hostico pri-
mùm aggredi.

Ita prudentissimè Maximilianus
Bavariæ Dux, bello aggressurus Bo-
hemos, qui à Rege suo Ferdinando
desciverant , recto tramite Pragam
perfectus est: quam Regni Bohemici
Metropolim, commisso prope illam
prælio,

prælio , relatâque victoriâ ; relictis minoribus Bohemiæ Civitatibus eodem diem mox expugnavit.

Erravit è contrario Comes Stabuli Galliæ Disdiguerius , qui cum Genuam expugnare debuisset , relicta illâ prius vim belli vertit in exigua quædam oppida & castella : Genuensibus interea vires colligentibus , quibus erepta est Gallis potentia urbem expugnandi.

Regula 29. Ad Prudentiam Imperatoris bellici pertinet , non temerè , sed magnâ adhibitâ cautela & circumspèctione adoriri eam gentem , in qua duæ factiones mutuis odijs dissidentes , intestinis armis hostiliter concurrunt.

Populos inter se divisos dissentientésque adoriri , successit interdum : sed sæpe etiam lacescenti nocuit.

Cogitanti mihi (inquit Forstner. in *Notis ad Tacit.*) quæ diversi eventûs causæ fuerint , succurrit : vocatos ab alterutra discordium parte prosperè
rem

rem gessisse; at suâ sponte alienam in se pugnam derivantes, suo sibi, quod ajunt, jumento malum advexisse. Quippe priori casu, & nostris alterutrius partis armis sociatis, facile est infirmiores opprimere; & ea odiorum civilium rabies est, ut partium altera, quæ externos vocat, plerumque neglectâ propriâ salute, nihil quàm æmulorum exitium quærat. Exterorum præda esse præoptant, quàm cum popularibus quietè agere: & quod suis viribus non possunt, excidio patriæ quærunt: peregrinis gentibus non magis ad bellum, quàm ad prædam & veluti patriæ possessionem accitis.

Altero verò casu, cum utramque partium externus hostem habeat, non idem sperari potest eventus. Imò probabilius est, descensuros ad consilium (quod unicum ad salutem superest) civilia odia ponendi, conjunctisque viribus eundi in hostem: cum

cùm libertati omnium strui insidias,
facilè omnes advertant.

Philippus Vicecomes Mediolani
Dux, sæpiùs Florentinorum dissidijs
imminens, cùm ultra vicijs cente-
na millia nummùm aureorum ex-
pendisset, nihil omninò profecit.

Hispani à Francisco Galliæ Rege
in suis finibus lacessiti, confestim
rebellionem sævissimam, animósque
suo regi infensos posuère. *Guicciar-
dinus lib. 14.*

Quoties Galli inter se digladiati,
mutuis sese vulneribus confecère;
toties, cùm adverterent Hispanos
inde occasionem captare res suas
agendi, proprijsque suis commodis
prospiciendi; positis odijs, contra
externum hostem conspiravère.

Tutius igitur est, dissentiente in-
ter se unâ gente hostili, quiescere,
dum mutuâ se cæde conficiant Ita
miseri patriam viris, armis, cæteris-
que belli nervis exhaurientes, tibi
pugnabunt; nec deinde superveni-
enti resistere poterunt. Sua-

Suadent quoque Cosmopolitici, ut parti debiliori occultè submittantur auxilia, non quæ finiendo, sed quæ trahendo in longum bello sufficiant. Sic Alcibiades Tiffaferni suavit, ne nimis enixè Lacedæmonios juvaret: quippe memorem esse debere, alienam se victoriam, non suam instruere: eatenus bellum sustinendum, ne inopia deseratur.

Cùm Pistorientes in Italia dissensionibus intestinis laborarent, & Florentini modò huic, modò alteri factioni faverent, brevi eò res deducta est, ut Pistorienses pertæsi tot molestiarum, sponte se suæque omnia in Florentinorū potestatem traderent.

Regula 30. Imperator in bello nihil magis timere debet, quàm ne timere videatur.

Hæc animi, pericula nulla formidantis generositas in Serenissimo Archiduce Leopoldo Gulielmo, cùm Castris Cæsareis Regijsque præesset Polemarchus, clarissimis notis eluxit, ut

ut refert P. Avancinus *in dissertat. de Virtut. & rebus gestis Leopoldi Gulielmi.*

Cum ad Saalfeldiam quinis exercitibus hostilibus, Sueco, Hassico, Luneburgico, Gallico, Vinariensi, ipse longè inferiore stipatus numero, majoribusque destitutus machinis, cinctus esset, suis veluti commilito semper adstitit Leopoldus, nec loco se movit, licet jam plures grandiorum globorum vi ad ejus latus occubuis-
sent; nec habitationem suam tran-
stulit, tametsi domum illam jam ter-
tius ab hoste globus perrupisset.

Pari virtute stetit ad Wolfenbitum, inter nutantes intrepidus, inter ca-
dentes erectus, sola generosæ animæ
constantia munitus. Luculentum est
& ab attestantis auctoritate in expu-
gnabile, Excell. Comitis Bernardi à
Martiniz supremi Bohemiæ Burggra-
vij datum elogium. Audivi, inquit
ipse, à Suecis hostibus, Serenissi-
mum Archiducem ad Wolfenbitum
(quia Exercitum non moveri loco,
belli

belli ratio exigere videbatur) eâ ipsâ statione, in quam centum & plures majorum balistarum jactus ceciderunt, intrepidum adeò constituisse, ut nec levi vel corporis, vel capitis motu volantia fulmina declinaverit: comitantibus verò, qui timoris quædam signa monstrassent, dixisse: qui pavidus est, recedat, ne suæ ignaviæ exemplum in intrepidè consistentes transfundat. Unde & hostes admirati constantiam, inter se agebant: Aut Angelus est Archidux, qui illic tam immotus consistit, aut ejus statua, aut spectrum aliquod ejus specie.

● Vidit & Belgium stupenda Leopoldinæ fortitudinis ac magnanimitatis exempla. Ad Armenteriam abrupta vi glandis plumbeæ galeri spirâ, ostendit quid hostis vellet, quid Deus nollet. Ad Landracum, nec discerptus muralis tormenti globo ad latus sibi assistentis Marchionis Palavicini equus, Principis animum percel-

percelluit : nec frequentiora fulmina militaria immissa tentorio , cùm convocatis Ducibus agenda mandaret, eum comoverunt. Ad Cor-
tracum repetitis ictibus trajectum
tugurium, quod incolebat, solâ ste-
tit Archiducis constantiâ , dum ea
pericula suâ non est dignatus formi-
dine. Vicinus adeò accessit arci cui-
dam, ut & ipse, & qui circum i-
psam instabant operi, loquentes è
mœnibus Gallos distinctè audirent,
cùm dicerent : En ille est Leopold-
us, qui strictum manu gladium
gerit. Paria ad Lendium occurrê-
re pericula , pari virtute contem-
pta.

Sæpe admonebarur à suis , ne
se , vitâmq; suam tantis periculis
objiceret ; quibus ipse aut illud Al-
berti olim Belgij Principis repone-
bat : *Considerent, belli Imperatorum*
neminem librato muralis machina glo-
bo perijsse : aut illud dignum maxi-
mo Imperatore Carolo V. dictum
Ferd-

Ferdinando III. ad Nordlingam Victore : *Nullum è Familia Austriaca Principem , in summis etiam bellorum astibus, balista majoris globo occubuisse. Hæc Avancinus citatus :*

Regula 31. Præstat belli Ducem in hostili, quàm in suo, vel Principis sui territorio cum hoste dimicare.

Ita Themistocles Atheniensium Dux contra Medos extra Græciam exercitum duxit. Hannibal ex Africa in Italiam ibat oppugnaturus Romanos, Scipio ex Italia in Africam contra Carthaginienses, Carolus V. consilio Andreae Doriæ & Antonij de Leva, cum exercitu irrupit in Galliam contra Franciscum I. Galliæ Regem, antequam is Italiam ingrederetur, bellum illaturus Cæsareanis.

Nam Princeps in suo territorio hostem expectans, cogitur suis sumptibus duos exercitus alere, & proprium & hostilem.

Deinde miles, qui hostem in sua terra aggreditur, plus animi habet, quàm

quàm qui se in sua domo ex inopinato oppressum videt.

Regula 32. Prudens belli Dux alienis consilijs alienoque ductu non temerè ducit copias in loca ignota, nisi & validus numerosusque sit exercitus, & rationem redditus planè compertam habeat; & à Duce viæ obsides acceperit. *Hac Regula usus est Demosthenes, in Aetolis suasu Messeniorum irruens.*

Regula 33. Sicut in patentibus campis nunquam ei sponte & ultro certamen suscipiendum est, qui equitata longè quàm hostis inferior est, ut censet Polybius; ita parvo exercitui cum magno in locorum angustijs, non verò in æqua planitie patentique campo confligendum est, ne minor exercitus à majore circumveniat.

Regula 34. Hostis superandi victoriæque reportandæ facillima ratio est, si arx & præsidium, quod habet hostis maximum, & in quo militum
anno-

annonam reposuit , capiatur. *Polybius histor. lib. 1.*

Regula 35. In prælio auxilium quantumvis exiguum ex insperato pro nobis hostibus ostentatum, vel in eos irruens, etiam illos jam victores in fugam vertit. Nam formidolosiores sunt hosti, qui pugnae interveniunt, quàm qui ipsi pugnant. *Thucydides lib. 5. in Oratione Brasida ad milites.*

Regula 36. Officium Belli Ducis est, militem, cui sua solvuntur stipendia, à rapinis, vi & concussione prohibere.

Tam strietè olim milites ex disciplina militari abstinebant à rapinis, ut memoriae tradiderit Scaurus, pomiferam arborem, quam in pede montis castrorum fuerat complexa metatio, postero die abeunte exercitu intactam fructibus relictam.

Frontinus 4. Stratagem. cap. 3.

Regula 37. Belli Duces sæpe meminert illius dicti, ab Albano Gubernat.

bernatore Belgij, eodémque veterano Duce prolati : *Si ut oportet castigaveris delinquentem, & premio affectus bene meritum, fortissimis tua castra viris redundabunt.*

Regula 38. Miles à Duce suo non est facile contemnendus. Nam si strenuus est, strenuus esse desinit : si ignavus, ignavior esse incipit. *Dilectum Cyri.*

Regula 39. In milite non est ferenda temulentia.

Inter bibaces Milites plures infundendo vinum, quàm effundendo sanguinem perierunt.

Cùm quatuor legiones Germanorum militum Romam Carolo Borbonio Duce occupassent, vix anno vertente dimidia Legio superstes in Germaniam rediit ; cùm nullam nisi à crapula offensionem accepissent. *Gnicciardini.*

Regula 40. Duo sunt sævissimi hostes in bello, & à nullo exercitu expugnabiles, ideoq; maximè cavendi : *fames & frigus.* O Ex.

Expertus Id Carolus V. Imperator in Obsidione Metensi: ubi cum Exercitus ejus inedia & frigore propemodum consumptus esset, obsidionem Urbis deserere coactus fuit.

Cum Anno 1568. instructissimus Batavorum exercitus Duce Guilhelmo Auraico prope hyemem trajecisset Mosam, & Dux Albanus omnem illi com meatum intercepisset, milites ejus partim inedia, partim frigore valde afflicti, dissipati, ac dilapsi sunt.

Regula 41. In castrorum metatione id observandum est, ut ea fiat forma circulari non quadrata: Deinde ut castra vallo & fossa semper muniuntur. Id Cyro, id Romanis semper in more positum fuit: nec hi sine castris praelia gessisse leguntur. Quorum quanta fuerit in re militari utilitas, Paulus Æmilius Belli Dux clarissimus gravioratione ad milites habitâ exposuit. Majores nostri, inquit, castra munita portum ad
omne

omnes casus exercitûs ducebant esse, unde ad pugnam exirent, quò jactati pugnae receptum haberent: & qui castris exut⁹ erat, pro victo habebatur.

Regula 42. Hoc curandum maximè, ut victi hostes castris quoque statim exuantur, & impedimentis suis spolientur, ut plena sit victoria, illique territi animum despondeant.

Julius Cæsar dicitur nullum unquam hostem fuisse, quem non castris quoque exuerit. Ita nullum perterritis spatium dabat. *Suetonius in Julio.*

Regula 43. Delectos ex toto exercitu esse oportet, qui prædam ex hoste fuso, & urbe captâ colligant ac dividant.

Ita olim prudenter faciebant Romani. Contrarium nunc imprudenter faciunt Germani.

Maximilianus Archidux Austriæ cum Mahomete III. Turcarum Imperatore prælio ad Agriam An. 1595 dimicans, victoriam adeptus est:

plurimis Turcarum trucidatis; At cum plerique militum contra Maximiliani edictū rapinis ante tempus inhiarent, & in castris hostium prædas agerent, Panico quodam terrore in fugam subitanæm sese effuderunt. Unde factum ut plures equorum ungulis in fuga proculcati, quàm ab hostibus trucidati fuerint; atque ita prædatores Germani non minimam victoriæ adeptæ partem amiserint. Quid quòd ipsum Turcarum Imperatorem capere potuissent victores, nisi miles ruptis ordinibus, missoque hoste, præproperas prædæ manus admovisset. Itaque spolia ex hostibus non nisi partâ plenè victoriâ legenda sunt. Idque ne priùs fiat, severè est in exercitu prohibendum.

Herodotus lib. 9.

Regula 44. Exploratorum opera Belli ducibus omnino est necessaria.

Exploratores sunt securitatis Procuratores.

Un uomo avvisato è mezzo salvato.

Porro

Porro illi sunt optimi Exploratores, qui sunt maximè exercitati in tegendis seipsis, & detegendis alijs.

Exploratorum vita est scire, & nesciri: Mors sciri, & nescire.

Regula 45. Belli Duces, qui cupiunt bello ditescere, non solent victorijs inclarescere:

Eos nonnemo hisce versiculis Satyricis insectatur:

*Ducunt, producunt longos fera bella per
annos,*

Et verè nomen commercière Ducum.

*Ducunt, adducunt argenti pondera
& auri*

*In proprios loculos, suntque manéntq;
Duces.*

Regula 46. Fortunâ in bello manifestè labente, rebûsque multùm inclinatis, satius est, quavis tutâ conditione pacem accipere, quàm viribus cum valentiore pugnare. *Consilium Julij Caesaris lib. 1. de bello Gallico.*

Regula 47. Pace suspectâ, aut inducijs in certum tempus pactis, dimittere

mittere & exauctorare omnem militiam, minimè consultum est. Sice-
nim exarmatur Majestas Principis,
hoc est, ludibrijs & periculis exponi-
tur. Quamobrem prudentes Prin-
cipes minorem pecuniæ, quàm mili-
tis jacturam rati, non cuius promi-
scuè millionem dare solent, sed ple-
ræque sub signis retentos, publicæ
securitati invigilare, & emergenti-
bus necessitatibus succurrere volunt.
Forstn. in notis ad Tacitum.

Ludovicus Gonzaga (inquit Pos-
sevinus 4. *histor. Mant.*) senes &
bello inutiles milites, provisis in to-
tam vitam alimentis, ad sua dimi-
sit: Eos verò qui viridi adhuc ætate
stipendia facere volebant, præsidio
civitatibus imposuit. Qui cæteris
juniores fortioresque erant, diurno
denario, quanquam pax esset, tam-
quam bello retenti, ducendis fossis,
expurgando Mincio, dilatandis por-
tibus insudabant.

Alij

Alij, quibus ad minuendos sumptus, exercitûs partem exauctorare visum fuit, illos dimiserunt, qui ubi opus esset, facîle iterum sacramento militari auctorari posse sperabantur: retentis ijs, qui difficulter ad signa redituri credebantur.


Ita post duodecennales in Belgio inter Hispanos & Hollandos inducias factas, exauctorati ab Hispanis fuerunt omnes Germani, tanquam mercenariæ militiæ nunquam defuturi: & retenti Hispani, Itali, Burgundi atque Hi-berni.

F I N I S.




Ad
145507











M.4s.

XVII
A-18